



Llywodraeth Cymru
Welsh Government

Bil Cymwysterau Cymru

Memorandwm Esboniadol

yn cynnwys
yr Aseiad Effaith Rheoleiddiol
a'r Nodiadau Esboniadol

Rhagfyr 2014

Bil Cymwysterau Cymru

Memorandwm Esboniadol ar gyfer Bil Cymwysterau Cymru

Paratowyd y Memorandwm Esboniadol hwn gan Adran Addysg a Sgiliau Llywodraeth Cymru ac fe'i gosodir gerbron Cynulliad Cenedlaethol Cymru.

Datganiad yr Aelod

Yn fy marn i, byddai darpariaethau Bil Cymwysterau (Cymru) a gyflwynwyd gennyf i ar 1 Rhagfyr 2014, o fewn cymhwysedd deddfwriaethol Cynulliad Cenedlaethol Cymru.

Huw Lewis AC

Y Gweinidog Addysg a Sgiliau
Yr Aelod Cynulliad sydd â chyfrifoldeb dros y Bil

1 Rhagfyr 2014

CYNNWYS

RHAN 1

1.	Disgrifiad	6
2.	Y cefndir deddfwriaethol.....	7
3.	Diben y deddfwriaeth a'r effaith y bwriedir iddi ei chael.....	8
4.	Ymgynghori.....	30
5.	Y pŵer i wneud is-ddeddfwriaeth	36

RHAN 2 - ASESIAID EFFAITH RHEOLEIDDIOL

6.	Datganiad.....	42
7.	Yr opsiynau	43
8.	Costau a manteision	51
9.	Asesiad o'r gystadleuaeth gan gynnwys asesiadau effaith penodol	60
10.	Adolygu ar ôl gweithredu.....	71

ATODIAD A - Nodiadau esboniadol

ATODIAD B - Priso'r Opsiynau

ATODIAD C – Geirfa

ATODIAD D – Tabl Tarddiadau

RHAN 1

1. Disgrifiad

1. Mae Bil Cymwysterau Cymru ('y Bil') yn darparu ar gyfer sefydlu Cymwysterau Cymru fel y corff rheoleiddiol annibynnol sy'n gyfrifol am gydnabod cyrff dyfarnu ac adolygu a chymeradwyo cymwysterau yng Nghymru nad ydynt ar lefel gradd. Bydd Cymwysterau Cymru hefyd, ynghyd â Gweinidogion Cymru, yn gyfrifol am baratoi rhestr o gymwysterau blaenoriaethol, ar sail pwysigrwydd y cymhwyster i anghenion dysgwyr a chyflogwyr yng Nghymru. Drwy sefydlu Cymwysterau Cymru, y bwriad yw cryfhau'r broses o oruchwylio cymwysterau a'r system gymwysterau yng Nghymru.

2. Y cefndir deddfwriaethol

2. Mae gan Gynulliad Cenedlaethol Cymru y cymhwysedd deddfwriaethol i wneud darpariaeth ym Mil Cymwysterau Cymru o dan Ran 4 Deddf Llywodraeth Cymru 2006 ("Deddf 2006"). Mae'r darpariaethau perthnasol yn Neddf 2006 yn cael eu nodi yn adran 108 ac Atodlen 7. Mae paragraff 5 yn Rhan 1 o Atodlen 7 yn nodi'r pynciau canlynol y caiff y Cynulliad ddeddfu arnynt, a hynny o dan y pennawd "Education and Training". Gweler isod:

Education and training

5. Education, vocational, social and physical training and the careers service.

Promotion of advancement and application of knowledge.

*Exception –
Research Councils.*

Pennod 3: Diben y ddeddfwriaeth a'r effaith y bwriedir iddi ei chael

Y Cyd-destun

Blaenoriaethau Strategol Llywodraeth Cymru

3. Mae cymwysterau yn hollbwysig, nid dim ond i ddysgwyr yng Nghymru, ond i economi Cymru. Yn hanesyddol, mae polisi Cymru o ran cymwysterau, i raddau helaeth, wedi dod dan ddylanwad Lloegr ac, i ryw raddau, mae anghenion dysgwyr Cymru wedi mynd yn eilradd i ofynion polisi Lloegr. Mae'n bryd bellach i Gymru ysgwyddo mwy o gyfrifoldeb o ran y cymwysterau a gynigir yng Nghymru, a darparu system gymwysterau ar gyfer ein dysgwyr a'n cyflogwyr y gallwn ddibynnu'n hyderus arni i gyflawni eu hanghenion a'u helpu i allu ymateb i'r heriau sy'n eu hwynebu. Mae twf a swyddi cynaliadwy yn ganolog i'r *Rhaglen Lywodraethu*, ac mae strategaeth *Cymwys am Oes* Llywodraeth Cymru yn ceisio sicrhau (drwy greu Gymwysterau Cymru) bod y cymwysterau a ddatblygir yng Nghymru yn cael eu cydnabod yn genedlaethol ac yn rhyngwladol ac yn drwydded gredadwy i ddysg a chyflogaeth bellach.
4. Yn yr *Adolygiad o Gymwysterau ar gyfer pobl ifanc 14 i 19 oed yng Nghymru*¹ (*Yr Adolygiad o Gymwysterau*), cymharwyd angen Cymru i fod yn annibynnol ar bolisi Lloegr â sefyllfa'r Alban, gan ddweud:

Dylai Llywodraeth Cymru sefydlu un corff (Cymwysterau Cymru) sy'n gyfrifol am reoleiddio a sicrhau ansawdd yr holl gymwysterau nad ydynt ar lefel gradd sydd ar gael yng Nghymru. Dros amser, dylai Cymwysterau Cymru fod yn gyfrifol am ddatblygu a dyfarnu'r rhan fwyaf o'r cymwysterau i ddysgwyr 14 i 16. I ddysgwyr ôl-16, dylai Cymwysterau Cymru ddatblygu a dyfarnu'r rhan fwyaf o'r cymwysterau cyffredinol a dylai hefyd reoleiddio cymwysterau sy'n cael eu darparu gan gyrff dyfarnu eraill. Dylai Llywodraeth Cymru a Chymwysterau Cymru gydweithio i lunio'r system gymwysterau genedlaethol ar gyfer Cymru a rhesymoli a chryfhau'r prosesau ar gyfer rheoleiddio a gwella'n barhaus, gan ddysgu oddi wrth y model sydd ar waith yn yr Alban.
5. Er bod y polisi wedi esblygu o'r cysyniad gwreiddiol hwn (gweler isod), mae'r weledigaeth ar gyfer corff cymwysterau annibynnol i Gymru yn parhau'n flaenoriaeth i Lywodraeth Cymru.

¹<http://wales.gov.uk/topics/educationandskills/qualificationsinwales/revofqualen/?skip=1&lang=cy>

Hyd a Lled y Bil

6. Mae'r Bil hwn yn darparu ar gyfer sefydlu Cymwysterau Cymru fel rheoleiddiwr annibynnol yng Nghymru. Mae'n rhoi dau brif amcan i Gymwysterau Cymru sy'n rhoi'r lle canolog i ddysgwyr o fewn y system gymwysterau ac yn ei gwneud yn ofynnol i Gymwysterau Cymru ysgwyddo cyfrifoldeb dros effeithiolrwydd cymwysterau a'r system gymwysterau - a thros hyder y cyhoedd yn y ddwy elfen hon. Wrth fynd i'r afael â'i brif amcanion, mae'r Bil yn amlinellu cyfres o faterion allweddol y mae'n rhaid i Gymwysterau Cymru roi sylw iddynt, ac mae'n rhoi nifer o swyddogaethau i Gymwysterau Cymru, gan gynnwys cydnabod cyrff dyfarnu a chymeradwyo cymwysterau. Mae'r Bil yn galluogi Gymwysterau Cymru i gydweithio â Gweinidogion Cymru i roi blaenoriaeth i gymwysterau ar sail eu pwysigrwydd i ddysgwyr a chyflogwyr, ac mae'n rhoi'r gallu i Gymwysterau Cymru gyfyngu ar nifer y fersiynau o gymhwyster y rhoddir blaenoriaeth iddynt. Gall ddewis, drwy broses agored, deg a chystadleuol, gorff dyfarnu i gydweithio ag ef i ddarparu pob cymhwyster y cyfyngir arno neu o blith nifer o gymwysterau.
7. Ar 1 Hydref 2013, cyhoeddwyd *Ein cymwysterau – ein dyfodol: Ymgynghoriad ar gynigion i greu corff cymwysterau newydd i Gymru* a daeth y cyfnod ymgynghori i ben ar 20 Rhagfyr 2013. Mae dadansoddiad o'r ymgynghoriad a gynhaliwyd ar gyfer y Bil hwn ac o'r ymatebion yn <http://wales.gov.uk/consultations/education/our-qualifications-our-future/?skip=1&lang=cy>
8. Ar ôl gweld yr ymatebion a ddaeth i law ac ymchwilio ymhellach i'r materion a godwyd, nid yw'r Bil hwn am roi rôl ddyfarnu i Gymwysterau Cymru ar hyn o bryd.
9. Bydd angen deddfwriaeth bellach er mwyn gwneud Cymwysterau Cymru yn gorff dyfarnu yn y dyfodol.

Craffu Cyn Deddfu

10. Ym mis Mai 2014, aethpwyd ati gan Bwyllgor Plant, Pobl Ifanc ac Addysg y Cynulliad Cenedlaethol i graffu ar Fil Cymwysterau Cymru cyn y broses ddeddfu. Fel rhan o'r broses, cyflwynwyd tystiolaeth ysgrifenedig a llafar gan:
 - Huw Evans, Cadeirydd yr *Adolygiad o Gymwysterau*, a Chadeirydd Bwrdd Cyngori Cymwysterau Cymru
 - Gareth Pierce, Prif Weithredwr CBAC
 - Arwyn Watkin (Prif Weithredwr), Jeff Protheroe (Rheolwr Gweithrediadau) a Faith O'Brien (Cadeirydd Dros Dro) Ffederasiwn Hyfforddiant Cenedlaethol Cymru.
11. Trefnodd y Pwyllgor ymweliadau hefyd â Quality and Qualifications Ireland (QQI) ac ag Awdurdod Cymwysterau'r Alban (SQA) er mwyn

cael gweld sut roedd systemau cymwysterau'r ddwy wlad honno yn gweithio.

12. Roedd adroddiad y Pwyllgor Plant, Pobl Ifanc ac Addysg a ryddhawyd ym mis Gorffennaf 2014 yn cynnwys sawl argymhelliad a oedd yn ategu darpariaethau'r Bil, ac yn mynegi'r un farn ar sawl agwedd ar y polisi.
13. Mae ymateb y Gweinidog Addysg a Sgiliau i'r Adroddiad yn: <http://www.senedd.cynulliadcymru.org/mglIssueHistoryHome.aspx?Ild=9151>

I ba ardal ddaearyddol y bydd hyn yn berthnasol

14. Mae'r Bil yn berthnasol i Gymru. Mae'r trafodaethau'n parhau gydag Adran Addysg Llywodraeth y DU a Swyddfa Cymru ynghylch rhai materion trawsffiniol sy'n deillio o'r newidiadau arfaethedig.

Cefndir

Yr Adolygiad o Gymwysterau ar gyfer Pobl Ifanc 14 i 19 oed yng Nghymru

15. Wrth ddatblygu'r argymhelliad i sefydlu Cymwysterau Cymru, bydd Llywodraeth Cymru yn cyfrannu at wireddu'r weledigaeth i ddatblygu system gymwysterau o'r radd flaenaf i Gymru, a fydd yn darparu cymwysterau ar gyfer dysgwyr sy'n cael eu parchu gan gyflogwyr a phrifysgolion ac sy'n fodd iddynt symud ymlaen ar hyd eu dewis lwybr.
16. Un o argymhellion yr *Adolygiad o Gymwysterau* oedd y dylai Cymru ddysgu oddi wrth y model sydd ar waith yn y Alban, dan Awdurdod Cymwysterau'r Alban.
17. Mae'r Gweinidog Addysg a Sgiliau, swyddogion Llywodraeth Cymru, ac aelodau o'r Pwyllgor Plant, Pobl Ifanc ac Addysg wedi ymweld â'r Awdurdod fwy nag unwaith. Mae swyddogion wedi parhau i gynnal y berthynas drwy gydol Prosiect Cymwysterau Cymru er mwyn cael cyngor a gwybodaeth.
18. Argymhellodd y Pwyllgor Plant, Pobl Ifanc ac Addysg, o ddeall y pwerau rheoleiddio a roddwyd i Awdurdod Cymwysterau'r Alban gan Ddeddf Addysg (yr Alban) 1996, y dylid ystyried sut i sicrhau a rheoleiddio ansawdd cymwysterau academiaidd, ac y dylai'r Bil wneud darpariaeth ar gyfer hyn.
19. Wrth ymateb i'r cynigion a amlinellwyd ar gyfer rhoi pwerau i Gymwysterau Cymru gael dyfarnu maes o law, mynegodd nifer sylweddol bryderon am gyfuno swyddogaethau rheoleiddio a dyfarnu mewn un corff, a phwysleisiwyd yr angen i fod yn dryloyw a chliir.

20. Nid yw'r Bil hwn yn sôn am swyddogaethau dyfarnu, ond rhoddir dyletswydd ar Gymwysterau Cymru i adolygu'n rheolaidd y rolau a gyflawnir ganddyn nhw fel corff a chan gyrff dyfarnu.
21. Yn ogystal, mae'r Bil yn rhoi'r pŵer i Gymwysterau Cymru ddod i drefniant gyda chyrff dyfarnu i sicrhau bod cymwysterau sydd wedi'u teilwra i Gymru yn cael eu datblygu ac yna'u dyfarnu.

Y sefyllfa ar hyn o bryd

Y system reoleiddio gyfredol yng Nghymru

Pwerau cyfredol Gweinidogion Cymru

22. O dan Ran 5 o Ddeddf Addysg 1997 (Deddf 1997), cyfrifoldeb Gweinidogion Cymru yw rheoleiddio cymwysterau perthnasol a datblygu polisi cymwysterau yng Nghymru. Caiff y swyddogaethau hyn eu cyflawni gan swyddogion Adran Addysg a Sgiliau Llywodraeth Cymru.
23. Mae Gweinidogion Cymru yn pennu'r gofynion ar gyfer cymwysterau perthnasol (cymwysterau academaidd neu alwedigaethol a ddyfernir neu a ddilysir yng Nghymru ac eithrio gradd sylfaen, gradd gyntaf, neu radd ar lefel uwch) a hefyd ar gyfer cyrff dyfarnu sy'n eu cynnig. Defnyddir nifer o adnoddau yn y gwaith rheoleiddio, gan gynnwys:
 - *Cydnabyddiaeth*
Y cadarnhad bod corff dyfarnu yn bodloni'r meini prawf cydnabod i gyrff dyfarnu sydd am ddyfarnu cymwysterau perthnasol yng Nghymru.
 - *Achredu*
Y cadarnhad bod cymhwyster perthnasol yn bodloni'r meini prawf angenrheidiol cyn ei gynnig. Mae natur y meini prawf yn amrywio yn ôl y cymhwyster.
24. Rhaid i gorff dyfarnu gyflawni 'amodau cydnabyddiaeth' yn barhaus. Mae Gweinidogion Cymru yn monitro i ba raddau y cydymffurfir â'r amodau hyn fel rhan o'u gwaith rheoleiddio.
25. Ar hyn o bryd, mae gan Weinidogion Cymru nifer o bwerau o dan Ddeddf 1997 yn adrannau 32A i 32BC y gallant eu defnyddio i orfodi amodau cydnabyddiaeth. Mae'r rhain yn cynnwys dirwyo, rhoi cyfarwyddyd a thynnu cydnabyddiaeth yn ôl. Gall cyfarwyddyd ei gwneud yn ofynnol i gorff dyfarnu gymryd cam penodol, neu beidio â'i gymryd, er mwyn sicrhau y cydymffurfir ag amodau cydnabyddiaeth neu achredu. Mae modd ei orfodi drwy orchymyn llys.
26. Mae Llywodraeth Cymru yn monitro cymwysterau a gynigir gan gyrff dyfarnu yng Nghymru, ac mae hefyd yn ymchwilio i gwynion a

chamymddwyn mewn perthynas â chymwysterau a gynigir yng Nghymru.

Gweithio ar draws tair gwlad

27. Cyfrifoldeb Gweinidogion Cymru yw rheoleiddio cymwysterau perthnasol a ddilynir gan ddysgwyr yng Nghymru. Fodd bynnag, lle cynigir yr un cymhwyster yng Nghymru, Lloegr a Gogledd Iwerddon, mae swyddogion Llywodraeth Cymru yn cydweithio'n agos â'u swyddogion cyfatebol ledled Lloegr a Gogledd Iwerddon.
28. Mae hyn yn cynnwys gweithio gydag Ofqual yn Lloegr, ac yng Ngogledd Iwerddon gyda'r Council for the Curriculum Examinations and Assessment (CCEA). Caiff llawer o'r cymwysterau galwedigaethol a gynigir yn y tair gwlad hon eu cynnig hefyd yn yr Alban a chaiff rhai eu hachredu gan Awdurdod Cymwysterau'r Alban.
29. Yn y gorffennol, mae llawer o'r gwaith i ddatblygu a chyhoeddi gofynion ar gyfer cymwysterau a reoleiddir wedi'i wneud ar y cyd â Lloegr a Gogledd Iwerddon.

Cynllunio, datblygu a rheoleiddio cymwysterau

30. Yn hanesyddol, mae cymwysterau wedi bod yn cael eu datblygu gan gyrrff dyfarnu i'w haddysgu yng Nghymru, Lloegr a Gogledd Iwerddon – ac, yn achos cymwysterau galwedigaethol, yn yr Alban.
31. Bu Llywodraeth Cymru yn cydweithio ag Awdurdod Cymwysterau a Chwricwlwm Lloegr (a aeth yn Awdurdod Cymwysterau, Cwricwlwm a Datblygu Lloegr yn nes ymlaen) i ddatblygu meini prawf ar gyfer cymwysterau newydd fel TGAU a Safon Uwch – gan ganolbwyntio ar newidiadau yn y cwricwla. Wrth ddatblygu'r meini prawf hyn, bu'r gyrrff yn trafod gyda rhanddeiliaid perthnasol y sector, arbenigwyr pynciau ac athrawon, ymhlith cynrychiolwyr eraill.
32. Mae lefel manylion y meini prawf ar gyfer cymwysterau a reoleiddir yn amrywio; mae gan rai cymwysterau, fel TGAU neu Safon Uwch, feini prawf manylach nag eraill.
33. Pennir lefel ar gyfer cymwysterau yn nodi pa mor anodd y maent, a chaiff rhai – cymwysterau galwedigaethol yn bennaf – werth credyd ar sail y lefel a'r amser y disgwylir i ddysgwr ei gymryd, ar gyfartaledd, i gwblhau'r cymhwyster.
34. Yn ystod y blynyddoedd diwethaf, mae Llywodraeth Cymru wedi ymgymryd â rôl fwy yn hyn o beth mewn dwy ffordd: mae wedi datblygu gofynion ar gyfer mwy o gymwysterau Cymru yn unig, ac mae wedi gweithio'n agosach gyda chyrrff dyfarnu i nodi gofynion manylach.

Dyfarnu cymwysterau yng Nghymru

35. Ar hyn o bryd, mae dyfarnu cymwysterau TGAU a Safon Uwch yn digwydd o fewn strwythur marchnad gystadleuol lle mae pump corff dyfarnu yn gallu cynnig y cymwysterau hyn yng Nghymru: AQA, CCEA, Edexcel, OCR a CBAC.
36. Cydnabuwyd dros 120 o gyrff dyfarnu eraill hefyd i gynnig cymwysterau eraill a reoleiddir yng Nghymru. Cymwysterau galwedigaethol a ddyfernir gan y rhain yn bennaf.
37. Mae cyrff dyfarnu yn rhydd i ddatblygu cymwysterau sy'n bodloni'r gofynion a gyhoeddwyd, gyda chynnwys a strwythur asesu sydd, yn eu barn nhw, yn ateb anghenion eu 'canolfannau' neu eu 'darparwyr dysgu' yn y ffordd orau; hy ysgolion, colegau, darparwyr hyfforddiant preifat ac amgylcheddau dysgu yn y gweithle sy'n paratoi ac yn cofrestru dysgwyr ar gyfer cymwysterau. Un o ganlyniadau marchnad gystadleuol yw bod cymwysterau gwahanol iawn yn dwyn yr un teitl neu deitlau tebyg yn aml.
38. Yn gyffredinol, mae sawl elfen yn gallu dylanwadu ar ddewis canolfan, er enghraifft:
 - anghenion dysgwyr a/neu'r hyn sy'n well ganddynt;
 - mesurau perfformiad ar gyfer sefydliadau;
 - cyfyngiadau o dan adrannau 96 i 102 o Ddeddf Dysgu a Sgiliau (2000) mewn perthynas â rhoi cyllid cyhoeddus i gyrsiau dysgwyr o dan 19 oed;
 - amodau cyllid ar gyfer sefydliadau addysg bellach a dysgu yn y gweithle;
 - yr hyn a ffefrir gan ymarferwyr o ran cynnwys penodol neu ddulliau asesu;
 - safbwyntiau sefydliadau addysg uwch neu gyflogwyr.
39. Bydd cyrff yn dyfarnu cymwysterau unwaith y byddant yn fodlon bod y dysgwyr wedi cyflawni'r gofynion. Yn achos rhai cymwysterau, er enghraifft TGAU a Safon Uwch, mae hyn yn golygu gwneud penderfyniad ynghylch pa raddau y mae dysgwyr wedi'u hennill. Yn achos TGAU a Safon Uwch, rheoleiddwyr Cymru, Lloegr a Gogledd Iwerddon sydd wedi llywio'r dull o wneud hynny, tan yn ddiweddar – er bod data am ddysgwyr yn Lloegr wedi dylanwadu'n gryf ar hyn.
40. Yn achos cymwysterau eraill, gan gynnwys llawer o gymwysterau galwedigaethol, mae penderfyniadau dyfarnu yn golygu penderfynu a yw dysgwyr wedi darparu digon o dystiolaeth eu bod wedi cyrraedd lefel y cymhwysedd sy'n ofynnol i ennill y cymhwyster.

Mwy am ddyfarnu cymwysterau yng Nghymru

41. Unwaith bydd cymwysterau wedi'u hachredu, gall cyrff dyfarnu farchnata a dyfarnu'r cymwysterau yng Nghymru fel rhai a achredwyd gan Lywodraeth Cymru. Mae'r gwaith y tu ôl i ddyfarnu cymhwyster yn cynnwys cynllunio, cynhyrchu, cyfieithu a dosbarthu papurau, tasgau, cynlluniau marcio, deunydd cymorth addysgu ac adnoddau eraill (cylchlythyrau, adnoddau sesiynau datblygiad proffesiynol parhaus/sesiynau un-i-un), recriwtio a hyfforddi arholwyr, trefnu cyfarfodydd i arholwyr a chymedrolwyr, creu data fel sail i benderfyniadau dyfarnu, cynhyrchu'r canlyniadau, ymateb i ymholiadau yn dilyn canlyniadau, a chreu tystysgrifau.
42. Mae canolfannau yn chwarae rhan fawr yn y gwaith o asesu cymwysterau, ac mae eu gwaith yn amrywio o gofrestru ar gyfer arholiadau, gweinyddu a goruchwyllo i ymrwymadau fel cynllunio tasgau neu brofion, marcio, cymedroli a dilysu. Beth bynnag yw lefel cyfraniad canolfannau i'r broses, mae'r corff dyfarnu yn atebol i Lywodraeth Cymru am ddyfarnu'r cymhwyster/cymwysterau.
43. Yn y bôn, rhywbeth gwirfoddol yw'r broses reoleddio gan nad yw'n ofynnol o dan y gyfraith i gyrff dyfarnu gael eu cydnabod gan Lywodraeth Cymru. Serch hynny, os caiff corff ei gydnabod a'i reoleiddio gan Weinidogion Cymru, gallai ei gymhwyster achrededig gael ei ddefnyddio ar raglenni dysgu a gyllidir gan gyllid cyhoeddus ar gyfer dysgwyr o dan 19 oed (Deddf Dysgu a Sgiliau (2000), a96 ac a99).
44. Dim ond cymwysterau a achredwyd a gaiff eu hystyried wrth fesur perfformiad darparwyr dysgu, felly bydd hyn yn gymhelliad pellach.
45. Yn ogystal, mae cyrff dyfarnu yn rhoi gwerth ar y statws a roddir iddynt yn sgil eu rheoleiddio, ac ar gael defnyddio logo Llywodraeth Cymru ar eu tystysgrifau, sy'n dynodi bod y cymhwyster wedi'i achredu.

Ffioedd

46. Mae cyrff dyfarnu yn codi ffi ar ganolfannau am gofrestru ymgeiswyr – sy'n tueddu i gynnwys pob gwasanaeth hyd at ddarparu tystysgrif (ond nid yw'n cynnwys ymholiadau yn dilyn canlyniadau oni bai bod y radd yn cael ei newid neu fod ymgeisydd yn cael ailsefyll).
47. Efallai y codir ffioedd ychwanegol am wasanaethau ychwanegol fel darparu deunyddiau dysgu.
48. Mae gan Weinidogion Cymru y pŵer o dan adran 30 o Ddeddf 1997 i godi ffioedd am gydnabod cyrff neu am achredu neu gymeradwyo cymwysterau.

Diffygion y system gyfredol

49. Ymhlith diffygion y system a'r ddeddfwriaeth gyfredol mae:
- y ffaith nad oes yna un sefydliad penodol sy'n ymroddedig i sicrhau effeithiolrwydd cymwysterau a'r system gymwysterau;
 - nad oes unrhyw bwerau i roi blaenoriaeth i rai cymwysterau a thrwy hynny sicrhau bod modd canolbwyntio ar y cymwysterau y mae angen eu rheoleiddio fwyaf - sy'n golygu bod yna nifer fawr o gymwysterau yn cael eu rheoleiddio ond bod yr adnoddau yn brin i sicrhau bod y gwaith yn effeithiol;
 - nad oes unrhyw bwerau i ddewis un darparwr ar gyfer cymhwyster penodol i sicrhau bod dysgwyr ledled Cymru yn cymryd yr un cymhwyster;
 - nad oes digon o gapasiti i hyrwyddo'r gwaith o ddatblygu cymwysterau yn strategol o fewn y trefniadau cyfredol - gan greu risg na chaiff cymwysterau Cymru eu parchu, yn genedlaethol ac yn rhyngwladol, gymaint â chymwysterau cenhedloedd eraill.

Diben y ddeddfwriaeth a'r effaith y bwriedir iddi ei chael

50. Bwriad y ddeddfwriaeth yw mynd i'r afael â'r pedwar mater uchod.

Nid oes yna un sefydliad penodol sy'n ymroddedig i sicrhau effeithiolrwydd cymwysterau a'r system gymwysterau

Prif Amcanion Cymwysterau Cymru

51. Mae adran 2 o'r Bil yn rhoi'r prif amcanion canlynol i Gymwysterau Cymru, a bydd yn rhaid iddo weithredu'n gydnaws â'r rhain wrth gyflawni ei swyddogaethau:
- a) Sicrhau bod cymwysterau, a system gymwysterau Cymru, yn llwyddo'n effeithiol i ddiwallu anghenion rhesymol dysgwyr yng Nghymru;
 - b) Ennyn hyder y cyhoedd mewn cymwysterau ac yn system gymwysterau Cymru.
52. Mae'r prif amcan cyntaf yn rhoi'r cyfrifoldeb i Gymwysterau Cymru dros sicrhau effeithiolrwydd cymwysterau o ran diwallu anghenion rhesymol dysgwyr yng Nghymru. Er bod hon yn dasg eang, mae'r Bil hefyd yn rhoi'r pwerau i Gymwysterau Cymru benderfynu ar ffocws ei weithgareddau (gweler Rhan 4) (cymeradwyo). Mae'r amcan hwn hefyd yn ei gwneud yn ofynnol i Gymwysterau Cymru ysgwyddo'r cyfrifoldeb

dros effeithiolrwydd y system gymwysterau yng Nghymru - yn ogystal â'r cymwysterau eu hunain. Y 'system' yw'r seilwaith sy'n sail i ddarparu cymwysterau ac yn gwneud y gwaith yn bosibl - mae'n cwmpasu *sut* y caiff cymwysterau eu datblygu, eu darparu a'u dyfarnu, yn ogystal â *beth* gaiff ei ddatblygu, ei ddarparu a'i ddyfarnu.

53. Mae'r ail brif amcan yn ei gwneud yn ofynnol i Gymwysterau Cymru ennyn hyder y cyhoedd yn y cymwysterau a'r system sy'n eu cynnal. Er mwyn i'r cymwysterau a'r system fod yn wirioneddol effeithiol, mae'n rhaid i'r cyhoedd fod yn hyderus ynddynt. Gallai asesiad o hyder y cyhoedd gynnwys, er enghraifft, lefel hyder cyflogwyr, darparwyr dysgu, dysgwyr a rhieni.
54. Y cysylltiad rhwng effeithiolrwydd cymwysterau, y system gymwysterau ac economi Cymru yw bod llawer o gymwysterau yn diffinio'r wybodaeth, y sgiliau a'r ddealltwriaeth sydd eu hangen ar ddysgwyr er mwyn gwneud cyfraniad effeithiol i economi Cymru. Ar yr un pryd, mae twf economi Cymru yn dibynnu ar weithlu medrus - ac mae cymwysterau yn rhoi amcan i gyflogwr o sgiliau darpar-weithwyr ac yn llinyn mesur wrth ddatblygu sgiliau'r gweithlu presennol.
55. Dylai'r system gymwysterau yng Nghymru adlewyrchu ei hethos addysgol gynhwysol a gallu ymateb yn effeithiol i anghenion cenedl ddwyieithog a'i chyfoeth o ddiwylliant. Ar hyn o bryd, mae'r dewis sydd ar gael o gymwysterau y gellir eu hastudio drwy'r Gymraeg yn amrywio, yn enwedig yn achos cymwysterau galwedigaethol, ac mae angen gwella'r ddarpariaeth ddwyieithog yn yr holl gymwysterau a gynigir yng Nghymru.
56. Yn ogystal â'r uchod, mae'r ddeddfwriaeth yn amlinellu rhestr anghyflawn o faterion y bydd yn rhaid i Gymwysterau Cymru roi sylw iddynt wrth gyflawni ei swyddogaethau (adran 3(2)):
 - Hyrwyddo twf cynaliadwy o fewn economi Cymru
 - Hyrwyddo a hwyluso'r defnydd o'r Gymraeg, gan gynnwys drwy gynnig trefniadau asesu yn y Gymraeg, a chymwysterau sy'n hyrwyddo neu'n hwyluso'r defnydd o'r Gymraeg mewn ffyrdd eraill
 - Amrywiaeth a natur y cymwysterau sydd ar gael, a'u trefniadau asesu
 - Gofynion rhesymol cyflogwyr, sefydliadau addysg uwch a phroffesiynau o ran addysg a hyfforddiant (gan gynnwys safonau cymhwysedd ymarferol gofynnol)
 - A yw'r wybodaeth, y sgiliau a'r ddealltwriaeth y mae gofyn i ddysgwyr eu dangos wrth benderfynu a ddylid dyfarnu cymhwyster iddo yn adlewyrchu'r wybodaeth a'r arferion gorau cyfredol

- A yw'r cymwysterau yn arwyddo lefel cyrhaeddiad sy'n gyson â'r cymwysterau y mae Cymwysterau Cymru yn eu hystyried yn rhai cyfatebol, p'un a gânt eu dyfarnu yng Nghymru neu yn rhywle arall
 - A yw'r cymwysterau yn cael eu darparu mewn ffordd effeithlon gan sicrhau gwerth am arian
 - Gwahanol rolau a chyfrifoldebau cyrff dyfarnu, darparwyr dysgu, Cymwysterau Cymru a Gweinidogion Cymru mewn perthynas â system gymwysterau Cymru, ac unrhyw un arall sy'n cyflawni swyddogaethau y mae Cymwysterau Cymru yn eu hystyried yn berthnasol i ddiben y system honno (gan gynnwys y cydweithredu rhwng yr unigolion hynny, a'u heffeithiolrwydd yn cyflawni eu rolau).
57. Nod y materion uchod i gyd yw gofalu mai amcan cyson y sefydliad fydd sicrhau budd hirdymor Cymru a'i dysgwyr. I ategu hyn ymhellach, mae'r Bil yn darparu y bydd yn rhaid i Gymwysterau Cymru roi sylw hefyd i bolisi perthnasol Llywodraeth Cymru a materion eraill lle bydd Gweinidogion Cymru wedi rhoi cyfarwyddyd iddo wneud hynny (gweler adran 48(1)).

Annibyniaeth y corff

58. Bydd Cymwysterau Cymru yn annibynnol ar Lywodraeth Cymru o ran ei brif amcanion a'i swyddogaethau yn ymwneud â chymwysterau, a bydd yn atebol i Gynulliad Cenedlaethol Cymru (y Cynulliad) (gweler Atodlen 1, para 28 o'r Bil).
59. Gan y caiff Cymwysterau Cymru ei gyllido gan Lywodraeth Cymru, bydd ganddo ddogfen 'fframwaith' a fydd yn amlinellu'r cyfrifoldebau sydd arno mewn perthynas â Llywodraeth Cymru (yn enwedig ei gyfrifoldebau ariannol). Uned noddi o fewn Llywodraeth Cymru fydd yn goruchwylio'r cyfrifoldebau a nodir.
60. Rhagwelir y bydd polisi – er enghraifft o ran y cwricwlwm a strategaethau sgiliau, capasiti'r gweithlu a dangosyddion mesur perfformiad – yn destun deialog reolaidd rhwng uwch-swyddogion Llywodraeth Cymru a Chymwysterau Cymru. Fodd bynnag, ni fydd hyn yn tanseilio annibyniaeth Cymwysterau Cymru wrth ddatblygu a gweithredu polisi rheoleiddio mewn perthynas â chymwysterau.
61. Er na fydd Llywodraeth Cymru yn pennu blaenoriaethau blynyddol na chynllun busnes Cymwysterau Cymru, mae'n debygol y bydd yna faterion polisi y bydd Llywodraeth Cymru yn awyddus i dynnu sylw Cymwysterau Cymru atynt, neu efallai weithgareddau ychwanegol y bydd yn dymuno gofyn i Gymwysterau Cymru eu cyflawni ar ei rhan (er enghraifft prosiectau ymchwil ym maes cymwysterau).
62. Cynhyrchir llythyr cylch gwaith blynyddol yn nodi meysydd penodol y dylid canolbwyntio arnynt neu weithgareddau a fyddai'n ategu'r

swyddogaethau craidd. Bydd hefyd yn setlo'r grant blynyddol a ddarperir ar gyfer Cymwysterau Cymru am gyflawni ei swyddogaethau. Mae'r Bil (Atodlen 1, paragraff 31) yn darparu'r pŵer ar gyfer Gweinidogion Cymru i gyllido Cymwysterau Cymru drwy grantiau.

63. Gweinidogion Cymru ac awdurdodau lleol fydd yn dal â'r pŵer i benderfynu pa raglenni dysgu i'w cyllido (mewn ysgolion a gynhelir).
64. Ar hyn o bryd, mae yna gyfyngiad ar y cyllid cyhoeddus a roddir i gyrsiau addysg neu hyfforddiant i ddysgwyr o dan 19 oed sy'n arwain at gymwysterau (adrannau 96-102 o Ddeddf Dysgu a Sgiliau 2000). Yn gyffredinol, ceir rhoi cyllid cyhoeddus i gwrs sy'n arwain at gymhwyster a achredwyd gan Weinidogion Cymru, er nad yw hyn yn golygu y cânt eu cyllido'n gyhoeddus. Mae'r Bil (adran 29) yn darparu na ddylid cyllido cyrsiau o'r fath yn gyhoeddus (hy eu cyllido gan Weinidogion Cymru neu gan awdurdodau lleol yng Nghymru, neu eu darparu gan neu ar ran ysgol a gynhelir yng Nghymru) oni bai bod y cwrs yn arwain at gymhwyster sydd wedi'i gymeradwyo gan Gymwysterau Cymru. Mae yna eithriadau o dan y Bil. Nid yw'r cyfyngiad hwn ar gyllid yn berthnasol i gwrs a ddarperir ar gyfer person ag anawsterau dysgu. Nid yw'n berthnasol chwaith i gyrsiau sydd wedi'u dynodi gan Weinidogion Cymru.
65. Er mai'r gobaith yw y bydd ysgolion annibynnol yng Nghymru yn dewis cynnig cymwysterau sydd wedi eu cynllunio'n benodol ar gyfer Cymru, byddant yn rhydd i gynnig unrhyw gymwysterau, ac ni fydd cyrff dyfarnu (p'un a ydynt yn cael eu cydnabod gan Gymwysterau Cymru ai peidio) yn cael eu gwahardd rhag cynnig unrhyw un o'u cymwysterau (boed hwnnw wedi ei gymeradwyo gan Gymwysterau Cymru ai peidio) i ysgol annibynnol.
66. Nid oes unrhyw ofyniad deddfwriaethol ar y sawl sy'n darparu rhaglenni ar gyfer dysgwyr dros 19 oed, a gyllidir yn gyhoeddus, i sicrhau bod y cymwysterau a ddewisir wedi eu hachredu neu wedi eu cymeradwyo mewn ffordd arall gan Weinidogion Cymru.
67. O ran rhai rhaglenni ôl-19, er ei bod yn debygol y bydd Llywodraeth Cymru yn ei gwneud yn ofynnol, o fewn telerau ac amodau unrhyw grantiau neu drefniadau cyllido, fod y cymwysterau a ddefnyddir ar rai rhaglenni yn cael eu dewis o blith y rheini a gymeradwyir gan Gymwysterau Cymru, ni ddarperir ar gyfer hyn yn y Bil.

Rôl bosibl Cymwysterau Cymru yn y dyfodol

68. Bwriad y polisi yn y tymor canolig a'r tymor hir yw rhoi'r swyddogaethau dyfarnu i Gymwysterau Cymru. Fodd bynnag, bydd angen deddfwriaeth ar wahân ar gyfer hynny. Yn y cyfamser, bydd y Bil yn gwneud darpariaeth bod yn rhaid i Gymwysterau Cymru adolygu ei berthynas â'r cyrff dyfarnu yn barhaus (adran 41(2)). Y disgwyl yw y bydd y sefydliad maes o law yn gyfrifol am gynnal adolygiad ffurfiol i roi sylw i'r modd y gallai ddod yn gorff dyfarnu ei hunan.

Nid oes unrhyw bwerau i roi blaenoriaeth i rai cymwysterau a thrwy hynny sicrhau bod modd canolbwyntio ar y cymwysterau y mae angen eu rheoleiddio fwyaf - sy'n golygu bod yna nifer fawr o gymwysterau yn cael eu rheoleiddio ond bod yr adnoddau yn brin i sicrhau bod y gwaith yn effeithiol

69. Mae Cymwysterau Cymru a Gweinidogion Cymru o dan ddyletswydd i gytuno ar restr o gymwysterau, neu ddisgrifiadau o gymwysterau, a fydd yn flaenoriaeth i Gymwysterau Cymru, a chyhoeddi'r rhestr honno (gweler adran 13). Bwriad y Rhestr o Gymwysterau Blaenoriaethol yw galluogi Cymwysterau Cymru i ganolbwyntio adnoddau cyhoeddus ar y cymwysterau pwysicaf yn y ffordd fwyaf effeithiol. Er mwyn i gymhwyster gael ei restru, rhaid i Gymwysterau Cymru a Gweinidogion Cymru fod yn fodlon bod hyder y cyhoedd ynddo yn flaenoriaeth, gan fod y cymhwyster yn arbennig o bwysig i ddysgwyr a/neu gyflogwyr yng Nghymru.
70. Bydd y Rhestr o Gymwysterau Blaenoriaethol yn galluogi Cymwysterau Cymru i roi blaenoriaeth briodol i'w ystyriaethau, gan roi'r hyblygrwydd hefyd i ystyried a ddylid cymeradwyo cymhwyster nad yw'n flaenoriaeth ai peidio.
71. Mae'r Bil yn darparu (adran 18), lle cyflwynir cymwysterau blaenoriaethol gan gyrff dyfarnu cydnabyddedig i'w cymeradwyo, fod yn rhaid i Gymwysterau Cymru ystyried a ddylid cymeradwyo'r fersiwn o'r cymhwyster i'w ddyfarnu yng Nghymru gan y corff dyfarnu dan sylw. Os bydd yn penderfynu ei bod yn briodol gwneud hynny, gall gymeradwyo'r cymhwyster. Bydd gan Gymwysterau Cymru y rhyddid (adran 19) i beidio ag adolygu cymhwyster i'w gymeradwyo os nad yw ar y Rhestr o Gymwysterau Blaenoriaethol, cyn belled â bod y penderfyniad i wneud hynny yn glir, ac yn unol â'r broses benderfynu a nodir mewn cynllun, y mae'n rhaid i Gymwysterau Cymru ei gyhoeddi.

Nid oes unrhyw bwerau i ddewis un darparwr ar gyfer cymhwyster penodol i sicrhau bod dysgwyr ledled Cymru yn cymryd yr un cymhwyster

72. Mae'r Bil hefyd yn sefydlu (adran 14) categori o gymwysterau a elwir yn gymwysterau blaenoriaethol cyfyngedig, sef cymwysterau blaenoriaethol fel y rhai a ddisgrifir uchod, y mae Cymwysterau Cymru wedi cyfyngu ar y fersiynau ohonynt i nifer penodol (cyn lleied ag un o bosibl). Mae'r Bil yn rhoi pwerau i Gymwysterau Cymru (adran 15) i wneud trefniadau er mwyn gweithredu cyfyngiad o'r fath. Trafodir y rhain isod.
73. Mae Cymru, Lloegr a Gogledd Iwerddon yn anarferol ymhlith gwledydd Ewrop yn yr ystyr bod strwythur i farchnad eu cymwysterau ar gyfer pobl ifanc mewn ysgolion a cholegau. O fewn y strwythur hwn, darperir y cymwysterau gan gyrff dyfarnu sy'n cystadlu â'i gilydd ac sy'n cynnig fersiynau gwahanol o'r 'un' cymhwyster. Er enghraifft, ar hyn o bryd, gall

ysgolion yng Nghymru sydd am i'w dysgwyr gymryd TGAU Ffrangeg ddewis o bum fersiwn wahanol o TGAU Ffrangeg, pob un yn cael ei gynnig gan gorff dyfarnu gwahanol (CBAC, OCR, AQA, Edexcel (Pearson) neu CCEA). Mewn rhai pynciau, cymhlethir hyn ymhellach gan y ffaith bod pob corff dyfarnu yn cynnig mwy nag un fersiwn o gymhwyster sydd â'r un enw. Er enghraifft, mae CBAC yn cynnig dwy fersiwn wahanol o TGAU Daearyddiaeth.

74. O fewn y strwythur cymhleth hwn, mae'n anodd sicrhau cyfatebiaeth. Mae'r rheoleiddwyr yn cymharu'r fersiynau gwahanol yn fanwl i sicrhau eu bod yn cyfateb i'w gilydd, er nid 'yr un fath' (ar hyn o bryd, gall cynnwys pob fersiwn fod yn wahanol a gellir eu hasesu'n wahanol, o fewn meini prawf sydd ar lefel uchel iawn).
75. Mae'r rheoleiddwyr a'r cyrff dyfarnu eu hunain yn treulio llawer o amser yn gwneud mwy o waith cymhleth i sicrhau bod y lefel cyrhaeddiad y mae'n rhaid i ddysgwr ei ddangos er mwyn ennill gradd benodol yn gyson ar draws gwahanol fersiynau o'r un cymhwyster. Ar hyn o bryd mae'r gwaith hwn yn dibynnu ar gymariaethau ystadegol soffistigedig.
76. Er gwaethaf y gwaith hwn, mae'r system yn dal i fod yn agored i honiadau (boed yn wir neu beidio) bod rhai cymwysterau yn 'haws' nag eraill. Gallai hyn ddigwydd, er enghraifft, yn achos fersiynau gwahanol o TGAU yn yr un pwnc, lle mae rhai yn honni bod manyleb un corff dyfarnu yn haws na manyleb cyrff eraill, neu awgrymiadau mwy cyffredinol bod holl gymwysterau un corff dyfarnu yn 'haws' na chymwysterau un arall.
77. Rhagwelir y bydd cyflwyno'r Rhestr o Gymwysterau Blaenoriaethol ac, o fewn honno, restr o gymwysterau cyfyngedig, yn helpu i symleiddio'r system gymwysterau drwy sefydlu un gyfres o gymwysterau ar gyfer rhai mathau o bynciau.
78. Lle dynodir cymhwyster blaenoriaethol yn gymhwyster cyfyngedig, bydd yn golygu bod Cymwysterau Cymru yn penderfynu mai hyn a hyn o fersiynau o'r cymhwyster y gellir eu cymeradwyo ar unrhyw un adeg. Er mwyn dynodi cymhwyster o'r fath, rhaid i Gymwysterau Cymru fod yn fodlon mai dyma'r peth gorau i'w wneud, o ystyried ei brif amcanion, a'i ddymuniad i osgoi anghysondeb rhwng gwahanol fersiynau o'r cymhwyster.
79. Rhoddir pŵer i Gymwysterau Cymru ddod i drefniant gyda chorff dyfarnu er mwyn iddo ddatblygu cymhwyster blaenoriaethol cyfyngedig, gyda'r nod o gymeradwyo'r cymhwyster hwnnw. Trefniant comisiynu yw hwn, a bydd Cymwysterau Cymru yn cyhoeddi cynllun yn amlinellu sut mae'n bwriadu cyflawni'r swyddogaethau hyn a sut y bydd yn gweithredu gweithdrefn sy'n agored, yn deg ac yn dryloyw fel y bydd cyrff dyfarnu ac eraill yn gwybod am y broses.
80. Nid oes angen i gorff gael ei gydnabod cyn cyflwyno trefniadau o'r fath, ond rhaid i'r corff dyfarnu sicrhau ei fod wedi cael cydnabyddiaeth cyn y

gellir cymeradwyo'r cymhwyster a ddatblygwyd. Pan wneir cais i gymeradwyo cymhwyster blaenoriaethol cyfyngedig a ddatblygwyd o dan y trefniadau y darperir ar eu cyfer yn y Bil, bydd yn rhaid i Gymwysterau Cymru ystyried a ddylid cymeradwyo'r cymhwyster ai peidio a gall gymeradwyo'r cymhwyster lle bydd hynny'n briodol (gweler adran 16).

81. Fel arall, gall cyrff dyfarnu hefyd gyflwyno cymwysterau blaenoriaethol cyfyngedig, lle na fydd Cymwysterau Cymru wedi gwneud unrhyw drefniadau comisiynu (gweler adran 17).
82. Lle gwneir cais i gymeradwyo cymhwyster blaenoriaethol cyfyngedig nad yw wedi'i ddatblygu o dan y trefniadau comisiynu, gall Cymwysterau Cymru ddewis y fersiwn neu'r fersiynau o gymhwyster y bydd yn ei/eu g/cymeradwyo. Unwaith eto, bydd yn ofynnol i Gymwysterau Cymru gyhoeddi cynllun yn amlinellu sut dylid gwneud ceisiadau a sut bydd yn ystyried y ceisiadau hynny ac yn dewis o'u plith. Mae o dan ddyletswydd i sicrhau bod ei weithdrefnau cymeradwyo yn agored, yn deg ac yn dryloyw, fel o'r blaen.
83. Yn y ffordd hon, lle bydd Cymwysterau Cymru o'r farn ei bod yn briodol gwneud hynny, gellir newid system gymwysterau Cymru o fod yn un sy'n ymateb i'r cyflenwad i fod yn un sy'n ymateb i'r galw, gan sicrhau bod nifer llai o gymwysterau, a'r rheini'n gymwysterau gwell, yn cynnig gwerth am arian a dewis syml i ganolfannau a dysgwyr sy'n diwallu anghenion dysgwyr a'r economi mewn ffordd well.
84. Rhagwelir y bydd galluogi Cymwysterau Cymru i wneud trefniadau â chyrrff dyfarnu (adran 15) i ddatblygu cymhwyster yn sicrhau y gellir teilwra cymwysterau yng Nghymru i'w hanghenion economaidd ac addysgol, gan eu cymharu'n drwyadl ar yr un pryd â chymwysterau cyfatebol mewn gwledydd cyfagos a gwledydd pellach i ffwrdd.
85. Os na fydd ond un corff dyfarnu a darparu ar gyfer cymhwyster penodol, mae'n bwysig bod Cymwysterau Cymru:
 - a) yn meddu ar y ddealltwriaeth angenrheidiol o'r farchnad iddo allu asesu effeithiau'r camau y mae'n eu cymryd ac ystyried yn ofalus strategaethau priodol;
 - b) yn creu dulliau o weithio'n agosach gydag athrawon a dysgwyr, o ran pennu gofynion a monitro'r hyn a ddarperir yn erbyn y gofynion hyn;
 - c) yn dilyn proses agored a thryloyw o wneud penderfyniadau.
86. Rhagwelir y bydd angen i Gymwysterau Cymru gymryd camau priodol i greu system arall ar gyfer comisiynu a chymeradwyo. Cymwysterau Cymru sydd yn y sefyllfa orau i reoli ei brosesau ei hun yn hyn o beth, ac mae Rhan 4 ac Atodlen 1 o'r Bil yn rhoi pwerau a strwythurau


corfforaethol o bob math iddo i'w alluogi i wneud hynny.

87. Mae'r Bil yn rhoi'r pŵer i Gymwysterau Cymru ddynodi unrhyw gymhwyster yn gymhwyster blaenoriaethol neu'n gymhwyster blaenoriaethol cyfyngedig. Er y bydd rhai cymwysterau galwedigaethol yn parhau i fodoli o fewn marchnad lle mae mwy nag un darparwr, bydd yn bosibl i Gymwysterau Cymru benderfynu mai sicrhau un gyfres sydd fwyaf priodol ar gyfer cymwysterau eraill.
88. Mae'n ofynnol i Gymwysterau Cymru (adran 42) greu a chyhoeddi datganiadau polisi am ei swyddogaethau cydnabod, cymeradwyo a gorfodi, yn ogystal â'i bwerau adolygu, er mwyn rhoi syniad clir i gyrff dyfarnu ac eraill sut mae'n bwriadu cyflawni'r swyddogaethau hynny.

Nid oes digon o gapasiti i hyrwyddo'r gwaith o ddatblygu cymwysterau yn strategol o fewn y trefniadau cyfredol - gan greu risg na chaiff cymwysterau Cymru eu parchu, yn genedlaethol ac yn rhyngwladol, gymaint â chymwysterau cenhedloedd eraill

Pŵer i wneud gwaith ymchwil

89. Mae'r Bil yn gwneud darpariaeth (adran 41(3)) i Gymwysterau Cymru allu cynnal rhaglenni ymchwil i unrhyw fater sy'n ymwneud â chymwysterau, a allai gynnwys maes cynllunio a darparu cymwysterau, gyda'r nod o ddatblygu'r arferion gorau, asesu sut mae cymwysterau yng Nghymru yn cymharu â chymwysterau gwledydd eraill, a nodi cyfleoedd ar gyfer arloesi. Bydd yn gallu defnyddio'r ymchwil i'w helpu i ddatblygu polisi rheoleiddio a meini prawf, ac i hyrwyddo'r arferion gorau ym maes cymwysterau - yn ogystal â rhoi cyngor i Weinidogion Cymru, pan ofynnir amdano (adran 46) neu fel arall. Mae'r diagram isod yn grynodedb gweledol o sut y rhagwelir y bydd swyddogaethau Cymwysterau Cymru yn rhyng-gysylltu.



90. Mae gwaith rheoleiddio'r sefydliad a'i waith rheolaidd yn adolygu effeithiolrwydd cymwysterau a'r system gymwysterau yng Nghymru (monitro a sicrhau ansawdd) yn debygol o ddarparu gwybodaeth i ategu swyddogaethau ymchwil a pholisi strategol y sefydliad. Bydd y gwaith hwn, yn ei dro, yn nodi pa gymwysterau fydd yn cynnig y budd mwyaf i ddysgwyr Cymru a'r economi, ac a ddylai felly gael eu cynnwys ar y rhestr o gymwysterau blaenoriaethol Cymru. Bydd y gwaith datblygu a chomisiynu wedyn yn gweithio i sicrhau bod cymwysterau blaenoriaethol cyfyngedig yn cael eu datblygu i ddiwallu anghenion dysgwyr yng Nghymru. Bydd cymeradwyo cymwysterau sydd wedi'u datblygu ac sy'n bodloni'r meini prawf cymeradwyo yn cwblhau'r cylch sicrwydd cyntaf hwn.

Amodau cydnabod a chymeradwyo

91. Bydd Cymwysterau Cymru yn gallu cyflawni ei swyddogaethau mewn perthynas â chymwysterau academaidd neu alwedigaethol a ddyfernir yng Nghymru, ac eithrio graddau sylfaen; graddau cyntaf; neu raddau ar lefel uwch (adran 51).
92. Gall cyrff dyfarnu sydd wedi'u cydnabod gan Gymwysterau Cymru (Rhan 3) gyflwyno cymhwyster i'w gymeradwyo. Gall Cymwysterau Cymru bennu meini prawf cydnabod ar gyfer cyrff dyfarnu a, cyn belled â bod y cyrff dyfarnu yn bodloni'r meini prawf, bydd yn rhaid i Gymwysterau Cymru eu cymeradwyo (adran 5). Mae dau fath o gydnabyddiaeth - cyffredinol a phenodol. Bydd y gydnabyddiaeth y bydd yn rhaid i'r cyrff dyfarnu ei hennill yn dibynnu ar y cymwysterau y ceir eu darparu wedyn. Mae'r Bil (Rhan 3) yn nodi manylion y gweithdrefnau ar gyfer gwneud cais am gydnabyddiaeth ac yn rhoi'r pŵer i Gymwysterau Cymru wneud rheolau ynghylch ceisiadau am gydnabyddiaeth (adran 10). Mae Rhan 4 o'r Bil hefyd yn nodi manylion gweithdrefnau ar gyfer cymeradwyo cymwysterau, gyda phŵer tebyg i Gymwysterau Cymru i greu rheolau am geisiadau am gymeradwyaeth.
93. Mae'n bosibl y bydd yna amodau ar gyfer cydnabod (Atodlen 3) a chymeradwyo (Rhan 4). Os torrir yr amodau, gallai Cymwysterau Cymru gymryd camau gorfodi (Rhan 6), sef dirwyo, rhoi cyfarwyddyd neu fynd i safle a'i arolygu (ar ôl cael gorchymyn llys i gael gwneud hynny, ac mewn achosion prin a ddisgrifir yn y Bil).
94. Mae yna ddarpariaethau manwl hefyd ar gyfer tynnu cydnabyddiaeth yn ôl oddi wrth gorff (Atodlen 3, paragraff 19) neu dynnu'n ôl statws cymhwyster fel un a gymeradwywyd (adran 27). Mae sawl amod ynghlwm wrth hyn yn y Bil, gan gynnwys rhoi gwybod i'r corff dyfarnu a rhoi cyfle iddo ymateb cyn cymryd y camau arfaethedig.

Cyfatebiaeth

95. Mae'r Bil yn darparu bod cyfatebiaeth rhwng cymwysterau yn fater y mae'n rhaid i Gymwysterau Cymru roi sylw iddo. Rhagwelir y bydd

Cymwysterau Cymru yn gwneud hyn drwy sefydlu rhaglenni adolygu (gweler adran 41) a thrwy gynnwys rhanddeiliaid yn helaeth yn ei waith. Drwy wneud yn siwr bod Cymwysterau Cymru yn gallu pennu ei feini prawf cymeradwyo ei hun a bod Cymwysterau Cymru yn gorfod dangos sut mae wedi gwneud hynny yn ei adroddiad blynyddol, sydd hefyd yn gorfod nodi a yw Cymwysterau Cymru wedi cynnwys rhanddeiliaid a sut, rhagwelir y bydd y cymwysterau a gaiff eu creu a'u dyfarnu yng Nghymru yn cymharu'n bositif â'r rheini yng ngweddill y DU ac mewn gwledydd eraill. Mae hyn yn arbennig o bwysig, gan fod arfer dysgwyr o symud i Addysg Uwch a chyflogaeth yr ochr draw i ffiniau Cymru yn dibynnu ar yr hyder sydd gan sefydliadau Addysg Uwch a chyflogwyr yng nghymwysterau a system gymwysterau Cymru.

96. Mae nod y ddeddfwriaeth arfaethedig yn ddeublyg. Y gobaith yw, drwy'r darpariaethau a ddisgrifir uchod, sicrhau bod cymwysterau a system gymwysterau'r dyfodol yn diwallu anghenion dysgwyr yng Nghymru ac yn sicrhau hyder rhanddeiliaid ehangach - yng Nghymru, ac yn rhyngwladol.

Ar bwy y bydd y ddeddfwriaeth yn cael effaith?

Dysgwyr

97. Un o brif egwyddorion prosiect creu Cymwysterau Cymru yw sicrhau na fydd unrhyw ddysgwr yng Nghymru yn cael mantais annheg, nac ychwaith o dan anfantais annheg, o ganlyniad i drosglwyddo swyddogaethau o Weinidogion Cymru i Gymwysterau Cymru.
98. Yng nghyd-destun gweithredu'r diwygiadau ehangach a argymhellwyd gan yr Adolygiad o Gymwysterau, mae Llywodraeth Cymru wedi creu dulliau o gyfathrebu â rhanddeiliaid ar draws yr holl sectorau, gan gynnwys grwpiau sy'n cynrychioli dysgwyr. Drwy ddefnyddio'r dulliau hyn, rhagwelir y bydd y broses o drosglwyddo i'r sefydliad newydd yn digwydd mor esmwyth â phosibl, ac y bydd y sefydliad yn dechrau ar ei waith gyda hyder llawn yr holl grwpiau o rhanddeiliaid y tu ôl iddo.
99. Ymhen amser, disgwylir y bydd y dysgwyr yn elwa ar y cymwysterau gwell a gynigir ac ar y ffaith bod gan gyflogwyr posibl a sefydliadau addysg fwy o hyder ynddynt. Drwy roi trwydded gredadwy iddynt ddysgu a chael gwaith yn y dyfodol, ar ffurf cymwysterau cydnabyddedig ac uchel eu parch, bydd Cymwysterau Cymru yn helpu Llywodraeth Cymru i gyflawni ei hamcanion addysgol a chenedlaethol o ran twf economaidd ac addysgol Cymru yn y dyfodol.

Cyflogwyr a Sefydliadau Addysg

100. Y prif faen prawf ar gyfer mesur llwyddiant y ddeddfwriaeth hon yw'r hyder sy'n cael ei feithrin ymhlith y cyflogwyr, y darparwyr addysg uwch,

y rheini sy'n darparu'r cymwysterau, y dysgwyr a'r cyhoedd yn ehangach, yn y system gymwysterau yng Nghymru.

101. Bydd Cymwysterau Cymru yn gallu ymgysylltu â chynrychiolwyr o'r sector a'r byd addysg mewn perthynas ag amrywiaeth eang o gyd-destunau, gan gynnwys datblygu meini prawf ar gyfer cymwysterau ac asesu a yw cymwysterau'n addas i'w diben. Mae'r Bil yn ei gwneud yn ofynnol i Gymwysterau Cymru gyhoeddi gwybodaeth am ei waith ymgysylltu â rhanddeiliaid (adran 42(3)), a'r gobaith yw y bydd hyn yn hybu mwy byth o ymgysylltu.
102. Disgwylir i'r cyflogwyr sy'n darparu cyfleoedd dysgu yn y gweithle, neu brentisiaethau, elwa ar y ffaith bod cymwysterau'n bodloni eu hanghenion yn well, yn ogystal ag elwa'n economaidd yn sgil unrhyw fuddsoddi sy'n gwella cymwysterau eu gweithlu. Disgwylir y bydd effaith gronol i'w gweld ar draws economi Cymru yn ei chyfanrwydd. Disgrifir arwyddocâd hyn yn yr wyth prif fater (adran 3(2)) sydd ymhlith y materion eraill y bydd yn ddyletswydd ar Gymwysterau Cymru i'w hystyried yn sgil y Bil fel rhan o'i weithgarwch parhaus.

Cyfrifoldebau Ofqual

103. Mae'r Bil yn egluro cyfrifoldebau Ofqual a Chymwysterau Cymru mewn amgylchiadau penodol (adran 30).

Y staff yn Llywodraeth Cymru sy'n gyfrifol am gymwysterau ar hyn o bryd

104. Er y bydd yna ymgyrch recriwtio allanol, disgwylir y bydd cyfran sylweddol o staff Is-adran Rheoleiddio a Chymwysterau Llywodraeth Cymru yn trosglwyddo i Gymwysterau Cymru, gyda nifer bach yn symud i'r uned noddi yn yr Adran Addysg a Sgiliau.
105. Is-adran Bontio Cymwysterau Cymru sy'n rheoli'r rhaglen newid ar gyfer y staff. Mae hynny o reidrwydd yn cynnwys trosglwyddo asedau ffisegol, dogfennau a gwybodaeth (gweler Atodlen 2).

Canolfannau

106. Prin y bydd unrhyw aflonyddu ar waith canolfannau o ganlyniad i'r Bil. Ni fydd pasio'r Bil yn amharu ar y diwygiadau i gymwysterau a gyflwynir o ganlyniad i'r Adolygiad o Gymwysterau. Hefyd, bydd y gofyniad i Gymwysterau Cymru ddatblygu polisi cwynion – gan greu ffordd o ymateb yn deg, nid dim ond i gwynion am Gymwysterau Cymru ei hun, ond hefyd am gyrrff dyfarnu a chymwysterau – yn rhoi gweithdrefn glir i ganolfannau (yn ogystal â rhanddeiliaid eraill) ei dilyn wrth ymateb mewn unrhyw achos o annhegwch, amhriodoldeb neu faterion eraill o bryder (gweler adran 43).

Cyrff dyfarnu

107. Ni fydd y rhan fwyaf o gyrff dyfarnu yn y DU yn gorfod newid ar unwaith oherwydd darpariaethau'r Bil. Dros amser, mae'r newidiadau canlynol yn debygol o gael effaith ar gyrff dyfarnu:

- a) Pan fydd y Rhestr o Gymwysterau Blaenoriaethol wedi'i chyhoeddi (adran 13), bydd Cymwysterau Cymru mewn sefyllfa i wrthod ystyried cymwysterau na roddir blaenoriaeth iddynt ar gyfer eu cymeradwyo (adran 19). Ni chaiff cyrff dyfarnu eu hatal rhag cynnig cymwysterau o'r fath yng Nghymru, ond ni chaiff y cymwysterau eu rheoleiddio a'u cymeradwyo gan Gymwysterau Cymru ac ni fyddai'r cyrff yn gallu defnyddio ardystiad na logo Cymwysterau Cymru. Gall Cymwysterau Cymru hefyd gyflwyno ffioedd y gellir eu codi, er enghraifft, mewn perthynas â chymwysterau na roddir blaenoriaeth iddynt yn unig (adran 44).
- b) Unwaith bydd y sefydliad mewn sefyllfa i weithredu pwerau i gyfyngu ar gymwysterau a dod i drefniadau gyda chyrff dyfarnu, ni fydd y cyrff dyfarnu hynny na fuont yn llwyddiannus yn y gystadleuaeth i ddarparu'r cymhwyster blaenoriaethol cyfyngedig yn gallu darparu'r cymhwyster blaenoriaethol cyfyngedig ar gyfer cyrsiau mewn ysgolion a gynhelir (nac mewn darpariaeth a gyllidir yn gyhoeddus ar gyfer dysgwyr o dan 19 oed) yng Nghymru am gyfnod y gymeradwyaeth a roddir. I'r rhan fwyaf o gyrff dyfarnu, canran fach iawn o'u gwaith yw marchnad Cymru. Caiff cyrff dyfarnu gyfle i gystadlu am gymwysterau cyfyngedig yn rheolaidd. Mae Is-adran Bontio Cymwysterau Cymru yn cyfathrebu'n rheolaidd â chyrff dyfarnu i sicrhau eu bod yn ymwybodol o'r datblygiadau arfaethedig, ac mae'r Bil yn ei gwneud yn ofynnol i Gymwysterau Cymru roi gwybod i'r rheini y gallai penderfyniad o'r fath effeithio arnynt, ac ymgynghori â nhw, yn ogystal â threfnu proses agored, deg a chystadleuol ar gyfer dewis y darparwr.
- c) Bydd gan Gymwysterau Cymru y pŵer i bennu meini prawf cydnabod penodol mewn perthynas â rhai cymwysterau neu ddisgrifiadau o gymwysterau (adran 9). Ni fydd y cyrff dyfarnu hynny nad ydynt yn bodloni'r meini prawf cydnabod penodol yn gallu gwneud cais i gymeradwyo fersiynau o'r cymhwyster hwnnw na disgrifiad o'r cymhwyster. Mae gan Gymwysterau Cymru y pŵer hefyd i bennu amodau safonol ac arbennig wrth gydnabod cyrff (Atodlen 3, paragraffau 2 i 5) ac i'w gorfodi, lle na chydymffurfir neu lle mae'n debygol na chydymffurfir, drwy bŵer i roi cyfarwyddyd (adran 32). Gall Cymwysterau Cymru hefyd bennu na ddylai corff dyfarnu penodol fod yn ddarostyngedig i amod safonol neu arbennig. O ran yr amodau arbennig, gallai'r rhain gynnwys, ymhlith pethau eraill:
 - i) amodau capio ffioedd sy'n cyfyngu ar y ffioedd y gall corff dyfarnu eu codi am gymwysterau a ddyfernir i ddysgwyr ar gyrsiau addysg neu hyfforddiant a gyllidir yn gyhoeddus;

- ii) trosglwyddo amodau (sy'n galluogi Cymwysterau Cymru i roi cyfarwyddyd bod rhai pethau yn cael eu trosglwyddo o un corff dyfarnu i un arall, er enghraifft er mwyn ei gwneud yn bosibl i gymhwyster sydd wedi'i gymeradwyo ac a ddyfarnwyd gan y corff dyfarnu gael ei ddyfarnu gan gorff dyfarnu arall). Fodd bynnag, cyn rhoi cyfarwyddyd o'r fath, rhaid i Gymwysterau Cymru ystyried bod angen gwneud hyn er mwyn osgoi effeithiau andwyol sylweddol ar ddysgwyr.

Mae'r weithdrefn ar gyfer gosod, adolygu ac amrywio'r amodau capio ffioedd a'r amodau trosglwyddo wedi'i hamlinellu yn Atodlen 3, ac yn cynnwys y camau ar gyfer hysbysu, rhoi rhesymau, rhoi ystyriaeth i sylwadau, a threfn adolygiadau o benderfyniad Cymwysterau Cymru.

- d) Bydd gan Gymwysterau Cymru y pŵer i bennu amodau o ran cymeradwyo cymwysterau (adran 22) ac i'w gorfodi, lle na chydymffurfir neu lle mae'n debygol na chydymffurfir, drwy bŵer i roi cyfarwyddyd (adran 32). Bydd y pwerau hyn yn golygu bod Cymwysterau Cymru mewn sefyllfa gryfach i fynnu bod gwelliannau yn cael eu gwneud nag y mae'r drefn reoleiddio bresennol yn ei ganiatáu. Bydd hefyd yn golygu y bydd yn bwysicach i gyrff dyfarnu gymryd camau i sicrhau bod eu cymwysterau yn parhau i gael eu cymeradwyo.
- e) Bydd cyrff dyfarnu yn fwy diogel rhag camau rheoleiddio annheg yn eu herbyn, drwy ddarpariaeth glir yn y Bil ar gyfer adolygiad annibynnol o rai penderfyniadau rheoleiddio, er enghraifft unrhyw benderfyniad i roi cyfarwyddyd neu dynnu cydnabyddiaeth yn ôl (Atodlen 3, paragraffau 16 a 22).
- f) Gallai cyrff dyfarnu orfod ildio'u cydnabyddiaeth a'u cymeradwyaeth ar sail cytundeb Cymwysterau Cymru neu gallent gael eu tynnu'n ôl gan Gymwysterau Cymru. Mae darpariaethau manwl yn rheoli'r amgylchiadau a'r weithdrefn ar gyfer ildio a thynnu'n ôl gymeradwyaeth a chydabyddiaeth (adrannau 25-28 ac Atodlen 3 paragraffau 17 i 23).
- g) Rhoddir mwy o ddiogelwch i gyrff dyfarnu mewn perthynas â phwerau mynediad ac arolygu. Nid yw'r ddarpariaeth yn y Bil ar gyfer mynediad ac arolygu ar ffurf amod bellach (fel y mae ar gyfer Gweinidogion Cymru). Mae nawr yn bŵer i Gymwysterau Cymru wneud cais i'r llys am Orchymyn lle bodlonir gofynion penodol (adran 39). Rhaid i Gymwysterau Cymru fod â sail resymol dros gredu bod y corff dyfarnu wedi methu â chydymffurfio ag amod cydnabyddiaeth neu gymeradwyaeth, a bod angen y Gorchymyn; un ai am fod corff wedi gwrthod mynediad i Gymwysterau Cymru i'w safle neu fod mynediad yn debygol o gael ei wrthod, neu fod gofyn am fynediad yn debygol o danseilio pwrpas cael mynediad (er enghraifft, pan amheuir bod rhoi rhybudd ynghylch ymweliad yn debygol o olygu y

bydd corff dyfarnu yn dinistrio dogfennau allweddol). Rhaid i fynediad fod yn angenrheidiol er mwyn cael gwybod a dorwyd yr amod dan sylw ai peidio. Mae'r Bil yn nodi proses glir felly sy'n ei gwneud yn ofynnol i Gymwysterau Cymru brofi pam mae angen Gorchymyn ac yn ei gwneud yn ofynnol i ynad heddwch benderfynu ar y mater er mwyn cael mynediad i'r safle.

- h) Bydd gan Gymwysterau Cymru y pŵer i roi cyfarwyddyd i gyrff dyfarnu os ydynt wedi methu â chydymffurfio ag amod cydnabyddiaeth neu gymeradwyaeth, neu os ydynt yn debygol o fethu â chydymffurfio. Pwrpas rhoi cyfarwyddyd yw sicrhau y cydymffurfir ag amod drwy ei gwneud yn ofynnol i gorff dyfarnu gymryd camau penodol neu beidio â'u cymryd. Mae'r Bil yn nodi gweithdrefn benodol y mae'n rhaid ei dilyn wrth roi gwybod i gorff dyfarnu o fwriad Gymwysterau Cymru i roi cyfarwyddyd, ac mae hefyd yn gwneud darpariaeth i Gymwysterau Cymru roi ystyriaeth i sylwadau'r corff dyfarnu wrth benderfynu a ddylid rhoi cyfarwyddyd ai peidio.
- i) Mae sancsiynau eraill ar gael i Gymwysterau Cymru sy'n rhoi'r pŵer iddo osod cosbau ariannol. Unwaith eto, dim ond os yw'n ymddangos i Gymwysterau Cymru bod y corff dyfarnu wedi methu â chydymffurfio ag amod cydnabyddiaeth neu gymeradwyaeth neu os yw'n methu â gwneud hynny ar hyn o bryd, y ceir defnyddio'r pwerau hyn. Mae'r Bil yn nodi'r weithdrefn benodol ar gyfer gosod cosb, gan gynnwys darpariaethau bod Gymwysterau Cymru yn rhoi hysbysiad o'i fwriad i osod cosb, yn caniatáu cyfnod sylwadau, yn rhoi hysbysiad am y penderfyniad i osod cosb, swm y gosb a'r cyfnod pryd y mae'n rhaid gwneud y taliad (adran 33). Rhaid i Gymwysterau Cymru hefyd amlinellu'r sail dros y gosb, sut i dalu, canlyniadau peidio â thalu a'r hawl i apelio o dan y Bil. Ar hyn o bryd, o dan Ddeddf Addysg 1997, mae gan Weinidogion Cymru bŵer i amlinellu swm cosb ariannol, na chaiff fod yn fwy na 10% o drosiant corff dyfarnu. Dylid pennu trosiant corff dyfarnu yn unol â gorchymyn a wneir gan Weinidogion Cymru. O dan y Bil hwn, caiff swm y gosb ariannol ei bennu yn unol â rheoliadau a wneir gan Weinidogion Cymru.
- j) Mae'r Bil yn galluogi corff dyfarnu i apelio i'r Tribiwnlys Haen Gyntaf yn erbyn penderfyniad i osod cosb ariannol neu i apelio ynghylch swm y gosb ei hun (adran 34). Mae yna ddarpariaethau yn y Bil sy'n ei gwneud yn bosibl codi llog os na thelir y gosb ariannol (adran 35). Caiff cyfradd y llog ei phennu yn adran 17 Deddf Dyfarniadau 1838 ac mae'r Bil yn darparu na chaiff cyfanswm y llog fod yn fwy na swm y gosb.
- k) Mae'r Bil yn cynnwys darpariaeth bod Gymwysterau Cymru yn cael ei gwneud yn ofynnol i gorff dyfarnu dalu'r costau sy'n dod i Gymwysterau Cymru mewn perthynas â gosod sancsiwn ar y corff dyfarnu (adran 36). Diffinnir y sancsiynau fel rhoi cyfarwyddyd, gosod

cosb ariannol neu dynnu cydnabyddiaeth yn ôl. Mae'r Bil yn amlinellu ystyr y costau a gofynion yr hysbysiad, sy'n gorfod cynnwys y cyfnod a roddir i'r corff dyfarnu wneud taliad i Gymwysterau Cymru. Rhaid i'r hysbysiad amlinellu hefyd sut i dalu, canlyniadau peidio â thalu a'r hawl i apelio yn erbyn y taliad.

- l) Mae'r Bil yn galluogi corff dyfarnu i apelio i'r Tribiwnlys Haen Gyntaf yn erbyn penderfyniad i dalu costau, neu i apelio yn erbyn cyfanswm y costau (adran 37), ac yn darparu bod llog yn daladwy ar gostau na thelir (adran 38). Pennir y llog yn unol â'r gyfradd yn Neddf Dyfarniadau 1838, ac ni chaiff cyfanswm y llog fod yn fwy na swm y costau (yn debyg i'r hyn a nodir yn adran 34).
- m) Mae'n ofynnol i Gymwysterau Cymru hefyd gyhoeddi ei ddull o wneud penderfyniadau rheoleiddio a chymryd camau gorfodi mewn datganiad polisi (adran 42). Gallai hyn roi dealltwriaeth i gyrff dyfarnu o'r mathau o faterion y bydd Cymwysterau Cymru yn eu hystyried wrth gyflawni ei swyddogaethau, a gallai egluro'r penderfyniadau y mae wedi'u gwneud.

4. Ymgynghori

Y Papur Ymgynghori ynghylch Bil Cymwysterau Cymru

108. Yn ei ddatganiad deddfwriaethol ym mis Gorffennaf 2011, cafwyd ymrwymiad gan Brif Weinidog Cymru i ymgynghori'n briodol ac i ymgysylltu'n ystyrion gyda phartneriaid wrth ddatblygu deddfwriaeth. Yn unol â'r datganiad hwnnw, cyhoeddodd yr Adran Addysg a Sgiliau bapur ymgynghori ffurfiol ar 1 Hydref 2013, sef '*Ein cymwysterau - ein dyfodol: Ymgynghoriad ar gynigion i greu corff cymwysterau newydd i Gymru*'. Roedd y Papur Ymgynghori yn gwahodd sylwadau am y cynigion i greu Cymwysterau Cymru, fel corff newydd i fod yn gyfrifol am gymwysterau yng Nghymru, ac fe'i cyhoeddwyd ar wefan Llywodraeth Cymru yn: <http://wales.gov.uk/consultations/education/our-qualifications-our-future/?skip=1&lang=cy>
109. Roedd y Papur Ymgynghori yn gofyn i randdeiliaid am eu barn am gynigion fel:
- Sefydlu Cymwysterau Cymru fel y corff sy'n gyfrifol am reoleiddio a sicrhau ansawdd cymwysterau nad ydynt yn raddau yng Nghymru;
 - Bod Cymwysterau Cymru yn datblygu ac yn dyfarnu'r rhan fwyaf o gymwysterau cyffredinol yng Nghymru;
 - Symleiddio'r system gymwysterau yng Nghymru, gan dynnu ynghyd swyddogaethau allweddol sy'n ymwneud â dylunio cymwysterau, eu datblygu, eu dyfarnu, trefniadau cefnogi a sicrhau ansawdd cymwysterau o fewn un corff annibynnol ac awdurdodol;
 - Bod Cymwysterau Cymru yn gyfrifol am sicrhau ansawdd cymwysterau a ddarperir yng Nghymru ac a gynigir gan gyrrff dyfarnu;
 - Y byddai Cymwysterau Cymru, fel corff statudol annibynnol, mewn sefyllfa well i sicrhau bod y cymwysterau a gynigir yng Nghymru yn gwasanaethu anghenion diwylliannol ac economaidd Cymru ac yn diwallu anghenion dysgwyr yng Nghymru;
 - Mai Cymwysterau Cymru fyddai'r prif awdurdod ar gymwysterau yng Nghymru, gan roi cyngor proffesiynol i Weinidogion Cymru ar faterion perthnasol, yn ogystal â gwybodaeth, cyngor a chymorth i amrywiaeth eang o randdeiliaid;
 - Bod Cymwysterau Cymru yn cyfathrebu â rhanddeiliaid o fewn i Gymru a'r tu allan i Gymru ynghylch gwerth y cymwysterau a gynigir yng Nghymru;

- Bod Cymwysterau Cymru, maes o law, yn ysgwyddo'r cyfrifoldeb dros ddyfarnu'r rhan fwyaf o gymwysterau ar gyfer pobl ifanc 14 i 16 oed yn ogystal â Safon Uwch a Bagloriaeth Cymru.

110. Roedd yr ymgynghoriad yn gofyn y cwestiynau canlynol i randdeiliaid:

Y ddadl dros newid

- 1) A oes unrhyw beth arall sy'n rhwystr i effeithiolrwydd y system bresennol, neu a oes unrhyw wendidau eraill?
- 2) A oes unrhyw beth penodol o fewn y system bresennol yr hoffech ei weld yn newid?

Ein Gweledigaeth

- 3) Beth yw eich barn am ein gweledigaeth arfaethedig ar gyfer Cymwysterau Cymru?

Sut byddwn yn gwireddu ein gweledigaeth

- 4) Yn eich barn chi, a fydd y gweithgareddau a'r swyddogaethau arfaethedig hyn yn gwireddu'r weledigaeth ar gyfer Cymwysterau Cymru? Esboniwch.
- 5) Beth yw eich barn am y trefniadau llywodraethu arfaethedig ar gyfer Cymwysterau Cymru?
- 6) Beth yw eich barn am gylch gorchwyl a swyddogaethau arfaethedig Cymwysterau Cymru? Ydych chi'n credu bod y cylch gorchwyl a'r swyddogaethau yn briodol, neu a ddylid eu haddasu?
- 7) Beth ddylai Cymwysterau Cymru ei wneud i gryfhau hyder y cyhoedd yn y cymwysterau a gynigir yng Nghymru?
- 8) Yn eich barn chi, sut ac i ba raddau y bydd y cynigion hyn yn effeithio arnoch chi, eich sefydliad, dysgwyr a/neu unrhyw gategoriâu rhanddeiliaid penodol?

111. Parodd yr ymgynghoriad am ddeuddeg wythnos gan ddod i ben ar 20 Rhagfyr 2013. Mae'r tabl isod yn crynhoi faint o ymatebion a gafwyd gan bwy.

Cyrff dyfarnu	15
Cymdeithasau athrawon	7
Sgiliau Sector / Busnesau / Cyflogwyr	9
Awdurdodau Lleol	3
Ysgolion / Colegau	2
Addysg Uwch	6
Addysg Bellach	6
Myfyrwyr	2
Cyrff cenedlaethol	6
Unigolion	6
Cyfanswm	62

Ymatebion o Gymru'n unig	36
Ymatebion o Gymru â buddiant ar lefel y DU	1
Ymatebion o'r tu allan i Gymru â buddiant ar lefel y DU	25
Cyfanswm	62

112. Defnyddiwyd canlyniadau'r ymarfer ymgynghori hwn i lywio'r broses o ddatblygu polisi.
113. Cyhoeddwyd crynodeb o'r ymatebion i'r Papur Ymgynghori ar 2 Mehefin 2014 ac mae ar gael yn:
<http://wales.gov.uk/consultations/education/our-qualifications-our-future/?skip=1&lang=cy>
114. Yn ei Ddatganiad Ysgrifenedig, dywedodd y Gweinidog Addysg a Sgiliau fod mwyafrif llethol yr ymatebion yn ategu'n gyffredinol ei weledigaeth ar gyfer y corff newydd a bod llawer o'r ymatebwyr wedi cynnig helpu i'w ddatblygu. Mae'r Datganiad Ysgrifenedig i'w weld yn:
<http://wales.gov.uk/about/cabinet/cabinetstatements/2014/qualwalesbillconsultationresponse/?skip=1&lang=cy>
115. Mae'r prif themâu a ddaeth i'r amlwg yn yr ymatebion i'r ymgynghoriad wedi'u crynhoi isod.

Crynodeb o'r ymatebion

116. Yn gyffredinol, roedd yna gefnogaeth gref iawn i sefydlu corff annibynnol i reoleiddio a sicrhau ansawdd y tu allan i'r Llywodraeth.
117. Roedd yna bryderon mawr a rhywfaint o wrthwynebiad i'r syniad o gynnwys cyfrifoldebau dyfarnu yng nghylch gwaith Cymwysterau Cymru. Roedd yr ymatebion yn pwysleisio'n benodol yr angen i greu rhaniad clir

o ran y dyletswyddau pe bai pwerau dyfarnu yn cael eu cynnwys, er mwyn osgoi gwrthdaro buddiannau.

118. Roedd yna bryderon hefyd ymhlith cyrff dyfarnu, yn benodol am greu un gyfres o gymwysterau, rhag lleihau'r dewis i ddysgwyr a chyfyngu ar y cymhellion i fod yn arloesol.
119. Roedd llawer yn pwysleisio'n gryf, beth bynnag oedd y system a ddatblygid yng Nghymru ac i Gymru, fod yn rhaid i'r cymwysterau fod yn drosglwyddadwy, o ansawdd uchel ac yn ddilys yng ngwledydd eraill y DU ac Ewrop. Rhaid i gymwysterau sydd â theitlau cyffredin fel TGAU a Safon Uwch, hyd yn oed os ydynt yn amrywio o ran eu strwythur, fod yn gyfwerth o ran safon a dilysrwydd yn llygaid rhanddeiliaid, er mwyn i ddysgwyr fod yn rhydd i symud a theithio, a hwyluso'r ffordd iddynt gael mynd ymlaen i addysg uwch a byd gwaith.
120. Roedd yr ymatebwyr yn gryf o blaid sicrhau bod Cymwysterau Cymru yn ymgysylltu'n helaeth â rhanddeiliaid ac yn parhau i ymgysylltu â rheoleiddwyr eraill gan gynnwys Swyddfa Rheoleiddio Cymwysterau ac Arholiadau (Ofqual). Pwysleisiodd rhai hefyd y dylai Cymwysterau Cymru ymgysylltu'n drylwyr â chyrrff cenedlaethol eraill yng Nghymru fel Estyn a'r Cyngor Addysgu Cyffredinol, a bod angen eglurder o ran y berthynas rhwng y cwricwlwm a'r corff cymwysterau, gan sicrhau cydlyniant yn ogystal â sefydlogrwydd.
121. Roedd cefnogaeth gref i Fagloriaeth Cymru fel prif gymhwyster Cymru yn ogystal â rhoi cyfrifoldeb fframweithiau prentisiaethau i Gymwysterau Cymru. Nodwyd hefyd fod angen i Gymwysterau Cymru fod yn gynhwysol a sicrhau cymwysterau o ansawdd uchel i bob dysgwr, gan gynnwys y rheini ag anabledau.
122. Roedd llawer o ymatebwyr o wahanol gefndiroedd yn awyddus i gymryd rhan mewn datblygiadau yn y dyfodol a mynegwyd eu hymrwymiad i weithio ar y cyd â Chymwysterau Cymru wrth i'r sefydliad ddatblygu er mwyn sicrhau system gymwysterau dryloyw a chadarn.

Ymgynghoriad ar gyfer Plant a Phobl Ifanc

123. Fel rhan o gydymffurfiaeth Llywodraeth Cymru â Chonfensiwn y Cenhedloedd Unedig ar Hawliau'r Plentyn, cynhaliwyd ymgynghoriad a oedd wedi'i deilwra'n benodol i blant a phobl ifanc, gan ddefnyddio hwylusydd allanol, Cognition.
124. Mae'r fersiwn plant a phobl ifanc o'r ddogfen ymgynghori ar gael ar wefan Llywodraeth Cymru yn:
<http://wales.gov.uk/consultations/education/our-qualifications-our-future/?skip=1&lang=cy>

125. Fel rhan o'r ymgynghoriad, cynhaliwyd amrywiaeth o weithdai ar draws Cymru drwy'r Gymraeg a'r Saesneg i holi barn plant a phobl ifanc ar:
- fodel y sefydliad newydd ar gyfer rheoleiddio, sicrhau ansawdd ac, ymhen amser, dyfarnu cymwysterau yng Nghymru,
 - enw'r gyfres newydd o gymwysterau TGAU i Gymru - (ym mhynciau Saesneg a Mathemateg) a graddau Bagloriaeth Cymru yn y dyfodol,
 - sut gellid diwallu eu hanghenion drwy'r rhyngwyneb ar-lein â'r sefydliad, er enghraifft yr hyn y byddent yn disgwyl ei weld, beth maent yn ei feddwl o rif unigryw'r dysgwr, cofnod o gyrhaeddiad dysgu, a chyngor gyrfaoedd.
126. Yn ystod Rhagfyr 2013 a Ionawr 2014, siaradodd Cognition â 124 o blant a phobl ifanc mewn 12 sefydliad gwahanol ledled Cymru. Mae'r tabl canlynol yn rhoi mwy o fanylion.

Ysgolion (grwpiau oedran hŷn)	52
Ysgolion (grwpiau oedran iau)	13
Colegau	35
Darparwyr hyfforddiant	16
Prifysgolion	8
Cyfanswm	124

Crynodeb o'r ymatebion gan blant a phobl ifanc

127. Yn gyffredinol, roedd y plant a'r bobl ifanc yn ystyried y cynigion ar gyfer Cymwysterau Cymru yn ddatblygiad cadarnhaol iawn ar gyfer dyfodol addysg yng Nghymru, a chanmolwyd yn benodol y ffaith bod y system yn decach ac yn symlach.
128. Gwnaethant sylwadau cadarnhaol hefyd ar y manteision posibl i siaradwyr Cymraeg, y ffaith y bydd cymwysterau o ansawdd gwell yn meithrin mwy o hyder, a'r ffaith y bydd yn haws i fyfyrwyr allu symud o ysgol i ysgol yng Nghymru.
129. Ond yn ogystal â nodi'r manteision hyn, mynegwyd pryderon hefyd am y ffordd y câi'r system newydd ei chyflwyno a'i rheoli.

Themâu cyffredin a gododd yn yr ymatebion i'r ddau ymgynghoriad

130. Dyma'r themâu cyffredin a gododd yn yr ymatebion i'r ddau ymgynghoriad:
- yr angen i gynyddu hyder y cyhoedd;

- yr angen i sicrhau trefniadau pontio cadarn;
- yr angen i sicrhau bod cymwysterau yn dal yn drosglwyddadwy;
- annibyniaeth y sefydliad newydd.

131. Yn gyffredinol, roedd y rheini a ymatebodd yn cefnogi'r cynigion yn y ddogfen ymgynghori, ond mynegodd llawer gryn bryderon am wrthdaro buddiannau wrth gyflawni dyletswyddau dyfarnu cymwysterau a sicrhau eu hansawdd.

Ymgysylltu ychwanegol

132. Mae swyddogion hefyd wedi ymgysylltu'n uniongyrchol â rhanddeiliaid allweddol; yn benodol:

- Awdurdod Cymwysterau'r Alban, mewn perthynas â'r gwersi a ddysgwyd yn sgil sefydlu un corff cymwysterau i'r Alban;
- Ofqual, mewn perthynas â'r gwersi a ddysgwyd yn sgil sefydlu rheoleiddiwr annibynnol ac â'r pwerau a'r dyletswyddau posibl a allai gael eu rhoi i Gymwysterau Cymru;
- CBAC a chyrrff dyfarnu eraill, mewn perthynas â datblygu'r pŵer i Gymwysterau Cymru wneud trefniadau i ddatblygu a darparu cymwysterau blaenoriaethol cyfyngedig;
- Adran Addysg Llywodraeth y DU, mewn perthynas â'r cyfyngiadau ar gyllido cyrsiau i ddysgwyr o dan 19 oed, lle mae'r cyrsiau hynny yn arwain at gymwysterau, ac â diddymu pwerau cyfredol Gweinidogion Cymru.

133. Cyn i'r ddeddfwriaeth gael ei drafftio, cynhaliwyd cyfarfodydd pellach gyda rhanddeiliaid eraill, gan gynnwys y sectorau addysg uwch ac addysg bellach, mewn perthynas â'r angen am reoleiddiwr annibynnol ar gymwysterau yng Nghymru.

134. Mae'r gwaith ymgysylltu yn parhau ag Adran Addysg Llywodraeth y DU a Swyddfa Cymru i fynd i'r afael â rhai materion trawsffiniol sy'n codi yn sgil y newidiadau arfaethedig.

5. Y pŵer i wneud is-ddeddfwriaeth

135. Mae'r Bil yn cynnwys darpariaethau i wneud is-ddeddfwriaeth. Mae'r tabl isod yn dangos, mewn perthynas â phob darpariaeth:

- yr unigolyn neu'r corff y rhoddir y pŵer iddo;
- ar ba ffurf y caiff y pŵer ei arfer;
- priodoldeb y pŵer dirprwyedig;
- y weithdrefn a ddefnyddir os o gwbl, ynghyd â'r rhesymau pam y tybir ei bod yn briodol.

Adran	I bwy y rhoddir y pŵer	Y ffurf	Priodoldeb y pŵer dirprwyedig	Gweithdrefn	Rheswm dros y weithdrefn
21(1)	Gweinidogion Cymru	Rheoliadau	O dan y pŵer hwn, gall Gweinidogion Cymru wneud rheoliadau yn nodi'r gofynion sylfaenol y mae'n rhaid eu cyflawni mewn perthynas â chymhwyster ar unrhyw ffurf a gymeradwyir gan Gymwysterau Cymru. Gellir arfer y pŵer dim ond os yw Gweinidogion Cymru yn fodlon ei bod yn briodol nodi gofynion o'r fath er mwyn sicrhau bod y cwricwlwm a ddilynir gan ddysgwyr sy'n cymryd cwrs sy'n arwain at y cymhwyster yn briodol i'w hanghenion rhesymol.	Gweithdrefn gadarnhaol	Mae gweithdrefn gadarnhaol yn briodol gan fod y rheoliadau yn effeithio ar allu Cymwysterau Cymru i benderfynu ar yr hyn y mae'n ofynnol ei gynnwys mewn cymhwyster. Y bwriad yw y dylai Cymwysterau Cymru fod yn annibynnol ar Weinidogion wrth gyflawni ei swyddogaethau mewn perthynas â chymwysterau. Fodd bynnag, rhoddir y pŵer i Weinidogion Cymru amlinellu mewn rheoliadau faterion y mae'n rhaid i gyrrff dyfarnu eu hystyried mewn cymhwyster sydd i'w gymeradwyo gan Gymwysterau Cymru. Mae'r weithdrefn hon yn rhoi cyfle

Adran	I bwy y rhoddir y pŵer	Y ffurf	Priodoldeb y pŵer dirprwyedig	Gweithdrefn	Rheswm dros y weithdrefn
			<p>Mae angen hyblygrwydd, gan fod y pŵer yno i fynd i'r afael ag amgylchiadau penodol a allai godi neu beidio â chodi yn y dyfodol. Yr opsiwn arall fyddai i'r Bil roi pŵer cyfarwyddo i Weinidogion Cymru. Ystyrir bod pŵer i wneud rheoliadau yn fwy priodol am ei fod yn ymyrryd â disgresiwn Cymwysterau Cymru mewn perthynas â'i swyddogaethau cymeradwyo cymwysterau.</p>		<p>i'r Cynulliad graffu ar ac adolygu'r hyn y mae Gweinidogion Cymru yn ei ystyried yn sylfaenol o ran yr wybodaeth, y sgiliau a'r ddealltwriaeth y dylai dysgwr ei arddangos cyn i'r cymhwyster dan sylw gael ei ddyfarnu.</p>
33(3)	Gweinidogion Cymru	Rheoliadau	<p>Rhaid i'r rheoliadau nodi terfynau o ran sut mae Cymwysterau Cymru yn pennu swm cosb ariannol y mae'n ei gosod. Mae adran 32AB o Ddeddf Addysg 1997 yn gwneud darpariaeth ar i gosb ariannol a osodir gan Weinidogion Cymru fod yn gyfyngedig i 10% o'r trosiant, ac i'r trosiant gael ei benderfynu yn unol â gorchymyn a wneir gan</p>	Gweithdrefn gadarnhaol	<p>Mae gweithdrefn gadarnhaol yn briodol gan fod hyn yn effeithio ar y swm y gallai fod gofyn i gorff dyfarnu ei dalu fel cosb ariannol ac mae'n rhoi cyfle i'r Cynulliad drafod a chraffu ar swm y gosb.</p>

Adran	I bwy y rhoddir y pŵer	Y ffurf	Priodoldeb y pŵer dirprwyedig	Gweithdrefn	Rheswm dros y weithdrefn
			<p>Weinidogion Cymru, sy'n ddarostyngedig i weithdrefn gadarnhaol.</p> <p>Efallai y bydd angen newid y terfynau dros amser, er enghraifft i adlewyrchu newidiadau yn safonau cyfrifyddu.</p>		
54(1)	Gweinidogion Cymru	Rheoliadau	<p>Mae Atodlen 4 yn gwneud diwygiadau canlyniadol i ddeddfwriaeth sylfaenol sydd eisoes yn bodoli. Efallai y bydd angen hyblygrwydd er mwyn diwygio is-ddeddfwriaeth neu ddeddfwriaeth sylfaenol (gan gynnwys unrhyw ddeddfwriaeth ddrafft a allai gael ei gweithredu wedi hynny) i wneud y Bil yn gwbl weithredol. Hefyd gallai fod angen gwneud y ddarpariaeth arall a gwmpesir gan y pŵer (cysylltiedig, atodol, trosiannol, darfodol, arbed) i ddelio ag amgylchiadau penodol.</p>	<p>Gweithdrefn gadarnhaol os yn diwygio/diddy mu Deddf Seneddol y Deyrnas Unedig, Mesur neu Ddeddf Cynulliad; fel arall, gweithdrefn negyddol.</p>	<p>Cadarnhaol - gan y byddai hyn yn effeithio ar ddeddfwriaeth sylfaenol, felly mae ei gwneud yn ofynnol i'r Cynulliad graffu drwy'r weithdrefn gadarnhaol yn briodol.</p> <p>Negyddol - mae hyn yn briodol i ddarpariaethau eraill, a fyddai'n gymharol fân a thechnegol, heb fod yn diwygio deddfwriaeth sylfaenol, a rhaid iddi fod yn ddarpariaeth y mae Gweinidogion Cymru yn ei hystyried yn angenrheidiol at ddibenion, neu o ganlyniad i weithredu'n llawn unrhyw un o ddarpariaethau'r Bil.</p>

Adran	I bwy y rhoddir y pŵer	Y ffurf	Priodoldeb y pŵer dirprwyedig	Gweithdrefn	Rheswm dros y weithdrefn
55(2)	Gweinidogion Cymru	Gorchymyn	<p>Addas ar gyfer gorchymyn gan fod y ddarpariaeth hon yn galluogi Gweinidogion Cymru i ddarparu ar gyfer cychwyn y Bil. Gall gorchymynion o dan y ddarpariaeth hon wneud darpariaeth drosiannol, ddarfodol neu arbed.</p> <p>Mae angen hyblygrwydd er mwyn gallu cychwyn darpariaethau amrywiol y Bil ar adeg briodol, pan fydd y gwaith paratoi wedi'i wneud, ac er mwyn gwneud unrhyw ddarpariaeth drosiannol, ddarfodol neu arbed briodol (sy'n ymwneud â'r drefn a fydd yn parhau mewn grym ar ôl cael Cydsyniad Brenhinol).</p>	Dim gweithdrefn	Nid yw Gorchymynion Cychwyn yn newid polisi. Maent yn caniatáu i bolisi Bil fod yn weithredol.

136. Mae Atodlen 2 (a gyflwynir gan adran 2(3)) yn rhoi pŵer i Weinidogion Cymru wneud cynlluniau trosglwyddo, gan wneud darpariaeth ar i staff Llywodraeth Cymru, eiddo, hawliau a rhwymedigaethau Gweinidogion Cymru gael eu trosglwyddo i Gymwysterau Cymru. Ni ellir gweithredu cynllun trosglwyddo o'r fath drwy offeryn statudol. Fodd bynnag, o dan baragraff 5 o Atodlen 2, rhaid ei osod gerbron Cynulliad Cenedlaethol Cymru.

RHAN 2

ASESIAD EFFAITH RHEOLEIDDIOL

6 Datganiad

137. Mae asesiad effaith rheoleiddiol wedi'i gwblhau yn unol â Rheol Sefydlog 26.6(vi) ar gyfer y Bil arfaethedig, ac mae'n dilyn ym mhenodau 7 ac 8.
138. Mae asesiad o'r gystadleuaeth a'r asesiadau o effeithiau penodol ym mhennod 9.
139. Nid oes unrhyw ddarpariaethau penodol o fewn y Bil yn galw am arian o Gronfa Gyfunol Cymru.

7 Yr Opsiynau

140. Amlinellir isod dri opsiwn ar gyfer sefydlu Cymwysterau Cymru fel corff rheoleiddiol a sicrhau ansawdd, a nodir manteision ac anfanteision pob un.
141. Mae pob opsiwn a amlinellir yn seiliedig ar roi swyddogaethau rheoleiddio i Gymwysterau Cymru, a swyddogaethau i gomisiynu'r gwaith o ddyfarnu cymwysterau drwy broses gystadleuol. Nid ydynt yn seiliedig ar roi pwerau dyfarnu uniongyrchol i Gymwysterau Cymru, er y gellid datblygu pob model i'r perwyl hwn drwy ddeddfwriaeth yn y dyfodol.

Opsiwn 1

142. Gwneud dim yw Opsiwn 1 – hynny yw, peidio â sefydlu Cymwysterau Cymru. Mae'r opsiwn hwn wedi'i ddadansoddi fel dau is-opsiwn: y cyntaf yw cadw pethau'n gyfangwbl fel yr oeddent cyn cychwyn gweithredu'r Adolygiad o Gymwysterau pan gâi cymwysterau eu cynnig ar lefel tair neu bedair gwlad ledled y DU i raddau helaeth. Mae'r ail is-opsiwn yn fwy realistig gan ei fod yn ystyried diwygiadau sy'n gydnaws â datblygu'r Bil ac a gyflawnwyd ar sail y disgwyliad y câi Cymwysterau Cymru ei sefydlu.

Opsiwn 1a - Gwneud dim: Gweinidogion Cymru i gadw eu swyddogaeth reoleiddio.

143. Dyma'r opsiwn cychwynnol - parhau â'r system bresennol.
144. Ar hyn o bryd caiff cymwysterau yng Nghymru eu darparu drwy fodel sy'n seiliedig ar y farchnad, ac mae amrywiaeth o gyrff dyfarnu yn ei defnyddio i gynnig cymwysterau i ysgolion a cholegau ledled Cymru. Ar hyn o bryd, Gweinidogion Cymru sy'n gyfrifol am reoleiddio'r gwaith o ddarparu cymwysterau yng Nghymru, gan ddefnyddio'r pwerau a roddwyd iddynt o dan Ran 5 o Ddeddf Addysg 1997.
145. Caiff cyrff dyfarnu sydd wedi dewis ymuno â'r system gymwysterau a reoleiddir eu cydnabod gan reoleiddwyr Cymru, Lloegr a Gogledd Iwerddon. Mae'r cyrff dyfarnu hyn yn cydymffurfio ag Amodau Cydnabyddiaeth Cyffredinol tebyg. Datblygwyd yr amodau hyn gan Ofqual, ar y cyd â swyddogion rheoleiddio yng Nghymru a Gogledd Iwerddon, a chawsant eu mabwysiadu a'u diwygio ychydig gan reoleiddwyr Cymru (Gweinidogion Cymru) a Gogledd Iwerddon.
146. Mae Ofqual yn chwarae rôl bwysig yn y gwaith o weinyddu'r system tair gwlad, ac mae ganddo gryn adnoddau i wneud hynny. Mae hyn yn golygu cost fechan i Lywodraeth Cymru (gweler Tabl 26 yn Atodiad B).

Os parheir i weithio ar lefel tair gwlad, bydd Gweinidogion Cymru yn cadw eu llais uniongyrchol, gan ganiatáu iddynt ymyrryd lle bo'n briodol (fel a ddiwyddodd yn achos ailraddio TGAU Saesneg Iaith yn haf 2012).

Opsiwn 1b: Gwneud dim, ond parhau i ymateb i'r gwahanu graddol sy'n digwydd rhwng arferion y tair gwlad, gyda swyddogion yn Is-adran Rheoleiddio a Chymwysterau Llywodraeth Cymru yn llywio'r gwaith o ddiwygio cymwysterau yng Nghymru (yn dilyn yr *Adolygiad o Gymwysterau*).

147. Dyma'r opsiwn 'gwneud dim' realistig sy'n adlewyrchu'r angen, hyd yn oed heb 'Gymwysterau Cymru' i ymateb i newidiadau yn Lloegr drwy gryfhau prosesau ymchwil a rheoleiddio yng Nghymru. Câi argymhellion yr *Adolygiad o Gymwysterau* eu datblygu gymaint â phosibl gan Is-adran Rheoleiddio a Chymwysterau Llywodraeth Cymru.

Manteision

148. Byddai gwaith Is-adran Rheoleiddio a Chymwysterau yr Adran Addysg a Sgiliau o ddiwygio cymwysterau yn parhau.

149. Mae yna gyfleoedd o hyd i gryfhau sefyllfa Llywodraeth Cymru heb wneud newidiadau strwythurol - er enghraifft y cytundeb diweddar ar gongordat rhwng Llywodraeth Cymru ac Ofqual er mwyn creu fframwaith ar gyfer cydweithio yn y dyfodol, neu gynnwys Llywodraeth Cymru yng ngwaith CBAC mewn perthynas â Bagloriaeth newydd Cymru.

Anfanteision

150. Hyd yn oed gyda'r adnodd mwy yn Opsiwn 1b, byddai capasiti Llywodraeth Cymru i sicrhau bod cymwysterau yn cael eu llunio a'u datblygu i fodloni anghenion penodol Cymru yn dal yn ddifrifol o gyfyngedig.

151. Caiff gallu Llywodraeth Cymru i gyflawni argymhellion yr *Adolygiad o Gymwysterau* ei gyfaddawdu'n ddifrifol yn sgil cyfyngiadau ar adnoddau ac ar gyfleoedd i weithredu'n annibynnol.

152. Byddai gallu Llywodraeth Cymru i wella darpariaeth ddwyieithog ar draws y cymwysterau a gynigir yng Nghymru yn gyfyngedig.

153. Byddai diffyg llais arbenigol annibynnol yng Nghymru i ennyn hyder y cyhoedd yn y system gymwysterau - yng ngoleuni'r ffaith bod gan Loegr reoleiddiwr annibynnol clir, hyderus.

154. Heb reoleiddio annibynnol ac arbenigol, gallai enw da cymwysterau yng Nghymru ddioddef yn genedlaethol ac yn rhyngwladol, gan niweidio mewnfuddsoddi yn y blynyddoedd i ddod.

155. Gallai cyhuddiadau godi o ymyrryd â phenderfyniadau am gymwysterau am resymau gwleidyddol, os yw'r Gweinidogion yn cadw'r cyfrifoldebau rheoleiddio uniongyrchol.
156. Byddai rheoleiddwyr yng Nghymru yn parhau i orddibynnu ar Ofqual. Byddai parhau i ddibynnu ar y rheoleiddiwr yn Lloegr ac ymdrechu i gydblethu polisiau a phrosesau yn gwastraffu cyfleoedd ac adnoddau y gellid eu defnyddio i ymchwilio i system gymwysterau i Gymru a datblygu honno.
157. Ni fyddai parhau i ddibynnu ar y rheoleiddiwr yn Lloegr yn ein galluogi i ddatblygu'n iawn ein polisi cymwysterau i wahanol gyfeiriadau yng Nghymru. Byddai'r polisi yn ymateb i newidiadau mewn mannau eraill ac ni fyddai ei swyddogion yn gallu cymryd yr awenau a mynd ati'n rhagweithiol i ymateb i anghenion Cymru.
158. Byddai rhoi gwybodaeth i'r cyfryngau ac i'r cyhoedd ynghylch agweddau positif ar y system gymwysterau yng Nghymru yn parhau i gael ei ystyried yn ymgais i gyfleu neges wleidyddol yn hytrach na'i fod yn seiliedig ar farn arbenigol broffesiynol.

Crynodeb

159. Nid yw hwn yn opsiwn derbyniol. Cyn i'r *Adolygiad o Gymwysterau* ddod i gasgliadau, ystyriwyd amrywiaeth eang o dystiolaeth ac arbenigedd. Mae cefnogaeth gref i'r opsiwn o gael rheoleiddiwr annibynnol i Gymru, fel y mae'r ymateb i'r ymgynghoriad cyhoeddus yn ei ddangos.
160. Cyflwynir yr opsiwn hwn felly fel gwrth-opsiwn yn unig i'r ddau opsiwn isod.

Opsiwn 2

Gwneud cyn lleied â phosibl: Creu rôl a swyddfa ar gyfer Comisiynydd annibynnol i graffu ar weithgarwch uned o fewn Llywodraeth Cymru.


161. Wrth ystyried yr opsiynau ar gyfer rheoleiddio annibynnol, edrychwyd ar y syniad o sefydlu Cymwysterau Cymru fel uned reoleiddio annibynnol o fewn Llywodraeth Cymru, gan adrodd yn ôl drwy Weinidog gwahanol i'r Gweinidog Addysg a Sgiliau, drwy drefniant tebyg i'r hyn sy'n digwydd yn achos Arolygiaeth Gofal a Gwasanaethau Cymdeithasol Cymru.
162. Yn hytrach na chreu corff statudol, byddai'r cynnig hwn yn golygu creu deddfwriaeth i ddiddymu neu ddiwygio swyddogaethau Gweinidogion Cymru o dan Ddeddf Addysg 1997, a'u disodli â fframwaith statudol newydd a fyddai'n caniatáu ar gyfer datblygu, rheoleiddio, sicrhau ansawdd a chomisiynu cymwysterau o fewn economi marchnad gymysg yng Nghymru. Byddai'r fframwaith hwn yn rhoi'r rhan fwyaf o'r swyddogaethau statudol newydd i Weinidogion Cymru, i'w hymarfer drwy'r uned newydd. Byddai hyn yn rhoi cryn annibyniaeth weithredol i

Gymwysterau Cymru ac yn golygu ei fod yn cael ei ystyried yn go annibynnol. Y disgwyl oedd i staff Is-adran Rheoleiddio a Chymwysterau Llywodraeth Cymru symud i'r uned newydd.

163. Roedd yr opsiwn hwn hefyd yn golygu creu 'Comisiynydd Cymwysterau' annibynnol, i oruchwyllo a chraffu ar waith yr uned reoleiddio (Cymwysterau Cymru), yn ogystal â chyflawni unrhyw swyddogaethau eraill. Gallai Cynulliad Cenedlaethol Cymru (neu Weinidogion Cymru) benodi'r Comisiynydd Cymwysterau, a byddai gofyn iddo gyflwyno adroddiadau blynyddol gerbron y Cynulliad ar waith Cymwysterau Cymru. Byddai swydd y Comisiynydd yn gyfreithiol annibynnol ar Gymwysterau Cymru a Llywodraeth Cymru yn ehangach, gan sicrhau rhywfaint o warant o graffu allanol.
164. Byddai gan y Comisiynydd dîm swyddfa, tîm gweinyddol a tîm technegol, a Phwyllgor Cynghori.

Manteision

165. Byddai prif ffigwr system gymwysterau Cymru - y Comisiynydd Cymwysterau - yn gweithio ar wahân i'r Llywodraeth, ac yn gallu ymarfer rhywfaint o annibyniaeth.
166. Byddai brand a statws gan y Comisiynydd Cymwysterau, gan godi proffil cymwysterau yng Nghymru, a chreu ymdeimlad o hyder ynghylch datblygu'r agenda.
167. Byddai maint uned Cymwysterau Cymru o fewn Llywodraeth Cymru a'r pwerau newydd yn ei gwneud yn bosibl symud oddi wrth fodel cydweithredol y tair gwlad o reoleiddio cymwysterau.
168. Ni fyddai angen i staff Llywodraeth Cymru symud allan o Lywodraeth Cymru.



Anfanteision

169. Nid yw'r model hwn yn rhoi'r annibyniaeth i Gymwysterau Cymru y mae'r Cynulliad a'i randdeiliaid yn gofyn amdani, ac mae'n creu llinellau atebolrwydd dryslyd o ran cymwysterau yng Nghymru. Gallai hyn danseilio hyder y cyhoedd yn system cymwysterau Cymru.
170. Mae'r model hwn yn gymhleth, ac nid yw'n caniatáu'r symlrwydd i Gymru a ddisgrifiwyd yn nogfen ymgynghori'r Bil.

171. Byddai angen swyddfa gymorth ar y Comisiynydd a fyddai'n creu cost ychwanegol. Fel rhan o'i waith, byddai'r Comisiynydd yn gwneud gwaith gwirio a fyddai wedi'i wneud eisoes gan uned Cymwysterau Cymru. Byddai hyn yn dyblygu gwaith ac yn weithredu aneffeithlon.
172. Nid yw'r opsiwn hwn yn cyflawni bwriad y polisi yn ei gyfanrwydd, a byddai angen creu deddfwriaeth sylfaenol er mwyn diddymu rhai o swyddogaethau Gweinidogion Cymru a rhoi pwerau penodol i'r Comisiynydd.
173. Roedd yn aneglur sut, o weithredu'r model hwn, byddai modd datrys gwrthdaro o ran bwriadau polisi, neu sut byddai'r berthynas rhwng Gweinidogion atebol a Gweinidogion noddi, y Comisiynydd, cyrff dyfarnu a Chynulliad Cenedlaethol Cymru yn gweithio mewn ffordd gynhyrchiol.


Crynodeb

174. Y farn yw y byddai'r sefydliad - a'i staff yn weision sifil - yn rhy agos i'r Llywodraeth i allu bod yn ddigon annibynnol, ac nid dyma'r defnydd gorau o adnoddau. Nid hwn, felly, yw'r opsiwn a ffefir.

Opsiwn 3

Yr opsiwn a ffefir: Creu corff rheoleiddiol hyd braich

175. Mae'r opsiwn hwn yn golygu diddymu swyddogaethau rheoleiddio Gweinidogion Cymru, a rhoi swyddogaethau dyfarnu a rheoleiddio i gorff statudol a noddir gan Lywodraeth Cymru, Cymwysterau Cymru.
176. Byddai'r sefydliad yn cyflawni ei swyddogaethau cymwysterau yn annibynnol ar Lywodraeth Cymru. Byddai'n ddyletswydd arno i roi sylw i bolisiau perthnasol Llywodraeth Cymru y byddai Gweinidogion Cymru am ddod â nhw i'w sylw a gallai Llywodraeth Cymru gomisiynu gwaith ychwanegol sy'n ymwneud â chymwysterau.
177. Byddai'r corff yn gyfrifol am reoleiddio a sicrhau ansawdd cymwysterau a gymeradwyir yng Nghymru, ac am gomisiynu cymwysterau penodol - fel y gall ymateb yn fwy effeithiol a phenodol i anghenion dysgwyr Cymru, yn unol â gweledigaeth Adolygiad 2012.
178. Byddai'r corff yn derbyn cytundeb cyllid blynyddol a llythyr cylch gwaith oddi wrth Lywodraeth Cymru, yn amlinellu ei gyfrifoldebau gweinyddol ac ariannol. O ran ei swyddogaethau cymwysterau, byddai'n atebol i Gynulliad Cenedlaethol Cymru.



179. Byddai'r corff yn gallu mynd ati'n annibynnol i wneud gwaith ymchwil a rhoi cyngor i Weinidogion Cymru, Cynulliad Cenedlaethol Cymru, neu unrhyw unigolyn arall ar fater cymwysterau Cymru.
180. Er na fydd y Bil hwn yn rhoi swyddogaethau dyfarnu i Gymwysterau Cymru, bwriad y polisi yw ei wneud yn gorff dyfarnu maes o law, er y byddai'n rhaid creu mwy o ddeddfwriaeth sylfaenol yn gyntaf. Mae'r swyddogaeth ddyfarnu y tu hwnt i gwmpas y Bil hwn.
181. Y disgwyl yw i'r corff gael ei staffio gan y rhan fwyaf o weithwyr Is-adran Rheoleiddio a Chymwysterau'r Adran Addysg a Sgiliau.
182. Rhoddir uned fasnachu i'r sefydliad ar wahân i'w swyddogaethau cymwysterau, er mwyn iddo allu ymgymryd â gweithgarwch economaidd o fewn ffiniau cymhwysedd Gweinidogion Cymru.

Manteision

183. Câi Cymwysterau Cymru ei sefydlu fel corff sy'n annibynnol ar y Llywodraeth o ran ei swyddogaethau cymwysterau.
184. Gallai'r sefydliad ddarparu llais arbenigol clir a brand cydnabyddedig, gan godi proffil cymwysterau Cymru a'u gwerth yng ngolwg y cyhoedd. . Bydd hyn yn cynyddu hyder y cyhoedd yn y gwaith o ddatblygu cymwysterau Cymru a'i system gymwysterau, ac yn sicrhau bod dysgwyr yn elwa ar gymwysterau sy'n cael eu cydnabod yn rhyngwladol.
185. Mae'r opsiwn hwn yn ei gwneud yn bosibl symud oddi wrth fodel cydweithredol y tair gwlad o reoleiddio cymwysterau, gan leihau gorddibyniaeth ar Ofqual. Bydd Cymwysterau Cymru yn gallu ymarfer mwy o reolaeth dros y system gymwysterau yng Nghymru a mynd ati i ddelio ag anghenion Cymru.

186. Byddai cael gwared â swyddogaeth rheoleiddio cymwysterau (cyffredinol a galwedigaethol) yng Nghymru o'r Llywodraeth yn cael gwared ag unrhyw ganfyddiad o ymyrraeth wleidyddol wrth wneud penderfyniadau rheoleiddio yng Nghymru.
187. Gall deddfwriaeth sylfaenol roi pwerau i Gymwysterau Cymru sy'n mynd y tu hwnt i'r rheini sydd gan Weinidogion Cymru ar hyn o bryd. Bydd y rhain yn cynnwys y pŵer i gomisiynu a rheoli'r rhan fwyaf o gymwysterau cyffredinol yng Nghymru; gan ei gwneud yn bosibl i Gymru symud oddi wrth y dull o ddarparu cymwysterau ar sail y farchnad a thuag at un gyfres o gymwysterau i Gymru. Bydd hyn, yn ei dro, yn symleiddio'r system gymwysterau ac yn helpu i gryfhau gwaith rheoleiddio.
188. Efallai y bydd creu incwm o weithgarwch busnesau annibynnol yn ei gwneud yn bosibl i'r sefydliad ysgafnhau ar y baich ar y pwrs cyhoeddus yn y tymor hirach.
189. Bydd Cymwysterau Cymru yn gallu gweithredu'r *Adolygiad o Gymwysterau* yn llawn a pharhau i adeiladu ar yr uchelgeisiau hynny, gan y bydd yn gallu ymateb i newidiadau yn anghenion dysgwyr a'r sefyllfa o ran cymwysterau.

Anfanteision

190. Byddai gweithredu'r opsiwn hwn yn golygu gwneud newidiadau a gwelliannau sylweddol i ddeddfwriaeth sylfaenol i sefydlu'r corff.
191. Byddai angen i staff Llywodraeth Cymru sy'n cytuno i ymuno â'r sefydliad newydd symud allan o Lywodraeth Cymru, gan roi baich ychwanegol arnynt, a gallai hyn amharu ar y gwaith rheoleiddio.
192. Gallai sefydlu Cymwysterau Cymru yn gorff hyd braich y tu allan i'r Llywodraeth beri i bobl ei gymharu ag ACCAC gynt a unwyd â'r Llywodraeth – er y dylid nodi bod gan ACCAC gyfrifoldebau mewn perthynas â'r cwricwlwm, swyddogaethau sydd yn yr achos hwn yn parhau gyda'r Llywodraeth.

Crynodeb

193. Hwn yw'r unig opsiwn sy'n cyflawni'n llawn amcanion annibyniaeth, symleiddio a chryfhau'r broses reoleiddio ac sy'n creu model sy'n gallu ymateb i newidiadau yn y sefyllfa gymwysterau yn y dyfodol a'r uchelgais yn y tymor hirach ar gyfer system gymwysterau i Gymru.

8 Costau a Manteision

194. Mae'r costau a'r manteision sy'n gysylltiedig â phob opsiwn wedi'u cyfrifo dros gyfnod o bum mlynedd. Lle bo'n briodol, caiff y costau eu nodi yn nhermau eu gwerth presennol, gan ddefnyddio cyfradd ddisgownt o 3.5%. Mae hyn yn unol â chyfarwyddyd Llyfr Gwyrdd Trysorlys EM.
195. Mae'r asesiad hwn yn darparu'r amcangyfrif gorau o'r costau ar sail:
- Ymarfer prisio lefel uchel PwC a gomisiynwyd gan Lywodraeth Cymru
 - Prosiect Cwmpasu TGCh Cymwysterau Cymru, a gomisiynwyd fel rhan o Brosiect Pontio Cymwysterau Cymru a gynhaliwyd gan Lywodraeth Cymru ei hun
 - Dadansoddiad o'r opsiynau ar gyfer gwasanaethau i gefnogi Cymwysterau Cymru, a gomisiynwyd o PwC, gan Dîm Pontio Cymwysterau Cymru.
196. Mae'r opsiynau a nodir isod yn amlinellu goblygiadau pob opsiwn o ran costau i Lywodraeth Cymru. Fel yr esbonnir ymhellach ym mharagraffau 254 a 255 ym Mhennod 9, ni ddisgwylir i'r opsiynau gael effaith ariannol ar sefydliadau eraill (megis awdurdodau lleol, ysgolion, colegau, darparwyr hyfforddiant neu gyflogwyr). Disgwylir i unrhyw gostau ychwanegol fod yn fach iawn.
197. Lluniwyd yr Asesiad Effaith Rheoleiddiol hwn mewn ymgynghoriad â chydweithwyr yn Llywodraeth Cymru, yn:
- Yr Uned Cyngor Economaidd
 - Cyllid Llywodraeth Cymru
 - Cyllidebu a Monitro Strategol
198. Ymgynghorwyd â'r rhanddeiliaid perthnasol ar y polisi dan sylw. Rhoddir manylion pob ymarfer ymgynghori ym Mhennod 4 y ddogfen hon.
199. At ddibenion y gwaith costio hwn, ar gyfer pob opsiwn cymerir y bydd y sefydliad yn cychwyn gweithredu ym Medi 2015, yn unol â'r bwriad. Bydd modd gwneud hyn drwy gychwyn y darpariaethau i sefydlu'r corff yn gynnar, gan ei gwneud yn bosibl sefydlu seilwaith y corff, a hyfforddi a pharatoi staff i ymgymryd â'u swyddogaethau.
200. Rhoddir mwy o fanylion y fethodoleg a ddefnyddiwyd i amcangyfrif y costau yn Atodiad B.

Opsiwn 1

Opsiwn 1a - Gwneud dim: Gweinidogion Cymru i gadw eu swyddogaeth reoleiddio.

Opsiwn 1b - Gwneud dim, ond parhau i ymateb i'r gwahanu graddol sy'n digwydd rhwng arferion y tair gwlad, gyda swyddogion yn Is-adran Rheoleiddio a Chymwysterau Llywodraeth Cymru yn llywio'r gwaith o ddiwygio cymwysterau yng Nghymru (yn dilyn yr *Adolygiad o Gymwysterau*)

Costau

201. Yn dechnegol, fel opsiwn 'gwneud dim', ni ddylai'r opsiwn hwn olygu unrhyw gostau ychwanegol - dangosir hwn fel Opsiwn 1a.

202. Mae'r tabl isod yn rhoi amcan o gostau cynnal Is-adran Rheoleiddio a Chymwysterau AdAS am y pum mlynedd nesaf (gan ddefnyddio cyllidebau 2015-16 fel llinell sylfaen), costau sy'n daladwy gan Lywodraeth Cymru (gweler Tablau 5, 6 a 28 yn Atodiad B).

Tabl 1

Costau i Lywodraeth Cymru	2015-2016	2016-2017	2017-2018	2018-2019	2019-2020
Costau Refeniw: Staff - Swyddogaethau cymwyster: £	1,562,000	£ 1,562,000	£ 1,562,000	£ 1,562,000	£ 1,562,000
Costau Refeniw: Staff - ac eithrio cyflogau £	64,000	£ 64,000	£ 64,000	£ 64,000	£ 64,000
Cyllideb y rhaglen £	2,380,000	£ 2,380,000	£ 2,380,000	£ 2,380,000	£ 2,380,000
CYFANSWM	£ 4,006,000	£ 4,006,000	£ 4,006,000	£ 4,006,000	£ 4,006,000

203. Serch hynny, er nad yw creu Cymwysterau Cymru wedi'i gynnwys o fewn yr opsiwn hwn, byddai Gweinidogion (drwy Is-adran Rheoleiddio a Chymwysterau Llywodraeth Cymru) yn ceisio ymateb i'r camu graddol oddi wrth weithredu ar lefel tair gwlad ac yn parhau, i'r graddau posibl, i weithredu argymhellion eraill yr *Adolygiad o Gymwysterau*. Yn ymarferol, byddai hyn yn ei gwneud yn ofynnol i swyddogion ymgymryd â gweithgareddau ychwanegol.

204. Ni fyddai'n gywir, felly, cyflwyno'r opsiwn 'gwneud dim' fel opsiwn sydd heb unrhyw gostau ychwanegol, ac felly Opsiwn 1b yw'r opsiwn 'gwneud dim' realistig. Mae'r gweithgareddau canlynol wedi'u prasio o fewn yr opsiwn hwn er mwyn darlunio'n well wir gost peidio â mynd ati i sefydlu corff statudol:

- *Symud oddi wrth drefn gydweithredol y tair gwlad*
Prisiwyd staff cymwysterau/rheoleiddio ychwanegol i gryfhau'r swyddogaeth reoleiddio a chyflawni dyletswyddau ychwanegol tebyg i'r tasgau a gyflawnir ar hyn o bryd gan Ofqual ar ran Llywodraeth Cymru. Mae'r rhain yn cynnwys, er enghraifft, amrywiaeth o dasgau sy'n ymwneud â datblygu trefniadau achredu, monitro, adolygu a rheoleiddio.

- *Gwaith ymchwil*
Câi mwy o ymchwil ei wneud a'i reoli i helpu i ddiwygio cymwysterau a gweithgareddau rheolaidd eraill yng Nghymru.
- *Comisiynu cymwysterau*
Prisiwyd staff i oruchwylio'r gwaith o gaffael contractau yn ôl y gofyn a gomisiynir mewn perthynas â chymwysterau blaenoriaethol cyfyngedig i'w comisiynu i Gymru.

205. Mae'r tabl isod yn rhoi amcan o gostau Opsiwn 1b. Mae mwy o fanylion yn Nhablau 5, 6, 7, 8 a 28 o Atodiad B.

Tabl 2

Costau i Lywodraeth Cymru	2015-2016	2016-2017	2017-2018	2018-2019	2019-2020
Costau Refeniw: Staff - Swyddogaethau cymwyster: £	2,228,000	£ 2,703,000	£ 2,703,000	£ 2,703,000	£ 2,703,000
Costau Refeniw: Staff - ac eithrio cyflog £	64,000	£ 64,000	£ 64,000	£ 64,000	£ 64,000
Costau Refeniw: Staff Ychwanegol (ac eithrio cyflog: £	117,000	£ 76,000	£ 76,000	£ 76,000	£ 76,000
Costau Refeniw: TGCh £	289,000	£ 79,000	£ 79,000	£ 79,000	£ 79,000
Cyllideb y rhaglen £	2,380,000	£ 2,380,000	£ 2,380,000	£ 2,380,000	£ 2,380,000
CYFANSWM	£ 5,078,000	£ 5,302,000	£ 5,302,000	£ 5,302,000	£ 5,302,000

206. Ni ddisgwylir unrhyw gostau ychwanegol i gyrff dyfarnu, dysgwyr na chyflogwyr yn sgil yr opsiwn hwn.

207. Gwerth presennol costau Opsiwn 1b ar gyfer y cyfnod 2015-16 i 2019-20 yw £23,722,000.

Manteision

208. Prif fantais yr opsiwn hwn yw osgoi costau sefydlu a chostau rhedeg yr opsiwn a ffefrir.

209. Drwy ddod â dibyniaeth Cymru ar Ofqual i ben, a'r angen presennol i alinio polisiau a phrosesau, mae'r opsiwn hwn yn rhoi rhyddid i swyddogion ddefnyddio cyfleoedd ac adnoddau mewn ffordd a fydd yn sicrhau'r fantais fwyaf i Gymru.

210. Fodd bynnag, bydd symleiddio'r farchnad gymwysterau at ddibenion rheoleiddio yn lleihau'r amser a dreulir gan swyddogion yn deall cymwysterau, yn cymharu'r gwahaniaethau rhwng cymwysterau sydd â'r un enw ac yn eu monitro. Bydd hefyd yn ei gwneud yn bosibl gwella'r broses reoleiddio ac yn creu'r cyfle i'r sefydliad ganolbwyntio ar ei gyfeiriad strategol. Nid yw'n bosibl cyfrifo gwerth ariannol y fantais hon, gan nad yw'n gwbl hysbys eto pa gymwysterau y cyfyngir arnynt a pha rai a gomisiynir. Mater i Gymwysterau Cymru fydd penderfynu ar hynny.

Opsiwn 2

Gwneud cyn lleied â phosibl: Creu rôl a swyddfa ar gyfer Comisiynydd annibynnol i graffu ar weithgarwch uned o fewn Llywodraeth Cymru.

Costau

211. Mae yna gostau ychwanegol i'r opsiwn hwn o gymharu ag Opsiynau 1a ac 1b.

212. Mae'r tabl isod yn rhoi amcan o gostau sefydlu rôl Comisiynydd Cymwysterau allanol a swyddfa ategol, a chostau rhedeg Cymwysterau Cymru fel adran o fewn Llywodraeth Cymru am y pum mlynedd nesaf, gyda'r disgwyliad y byddai'r uned yn parhau i ddatblygu agenda'r *Adolygiad o Gymwysterau* cyn belled â phosibl. (Esbonnir y costau hyn ymhellach ym mharagraffau 36 i 58 o Atodiad B.)

213. Llywodraeth Cymru fyddai'n talu'r costau hyn.

Tabl 3

Costau i Lywodraeth Cymru	2015-2016	2016-2017	2017-2018	2018-2019	2019-2020
COSTAU SEFYDLU					
Costau Refeniw: Cost y prosiect i roi'r sefydliad newydd	£ 1,090,000				
Costau Refeniw: Staff - ac eithrio cyflogau	£ 164,000				
Costau Refeniw: TGCh	£ 356,000				
Costau Cyfalaf: TGCh	£ 119,000				
Costau Cyfalaf: Gosodiadau a Ffitiadau	£ 90,000				
COSTAU GWEITHREDOL					
Costau Rhedeg					
Costau Refeniw: Staff - Corfforaethol	£ 830,000	£ 1,305,000	£ 1,305,000	£ 1,305,000	£ 1,305,000
Costau Refeniw: Staff - Swyddogaethau cymwysterau	£ 2,228,000	£ 2,703,000	£ 2,703,000	£ 2,703,000	£ 2,703,000
Costau Refeniw: Staff - ac eithrio cyflogau	£ 189,000	£ 218,000	£ 218,000	£ 218,000	£ 218,000
Costau Refeniw: TGCh	£ 29,000	£ 138,000	£ 138,000	£ 138,000	£ 138,000
Costau Refeniw: Safle	£ 136,000	£ 235,000	£ 235,000	£ 235,000	£ 235,000
Costau Refeniw: Eraill, Cyfreithiol a Phroffesiynol	£ 130,000	£ 222,000	£ 222,000	£ 222,000	£ 222,000
Dibrisiant	£ 25,000	£ 42,000	£ 42,000	£ 42,000	£ 42,000
Gwariant Rhaglen Cymwysterau Cymru (Ymchwil etc)	£ 2,380,000	£ 2,380,000	£ 2,380,000	£ 2,380,000	£ 2,380,000
CYFANSWM	£ 7,766,000	£ 7,243,000	£ 7,243,000	£ 7,243,000	£ 7,243,000

214. Mae'r costau cychwynnol mwyaf sylweddol yn ymwneud â'r buddsoddiad sy'n ofynnol ar gyfer systemau TGCh er mwyn cynnal swyddfa allanol y Comisiynydd, a chostau recriwtio staff ychwanegol y model.

215. Mae'r model hwn yn ymgorffori strwythur llywodraethu ychwanegol, sef rôl Comisiynydd a thîm gweinyddol ategol o 20, yn ogystal â Bwrdd Llywodraethu o 11 o Aelodau, gan gynnwys Cadeirydd.

216. Yn ogystal, prisiwyd 15 o staff ychwanegol i ganolbwyntio ar gymwysterau, er mwyn cryfhau'r swyddogaeth reoleiddio a chyflawni dyletswyddau ychwanegol tebyg i'r tasgau a gyflawnir ar hyn o bryd gan Ofqual ar ran Llywodraeth Cymru. Mae'r rhain yn cynnwys, er enghraifft,

amrywiaeth o dasgau sy'n ymwneud â datblygu trefniadau achredu, monitro, adolygu a rheoleiddio.

217. Hefyd, prisiwyd 8 o staff pellach, i helpu'r sefydliad i gomisiynu ac ymchwilio.
218. Ni ddisgwylir unrhyw gostau ychwanegol i gyrff dyfarnu, dysgwyr na chyflogwyr yn sgil yr opsiwn hwn.
219. Gwerth presennol costau Opsiwn 2 ar gyfer y cyfnod 2015-16 i 2019-20 yw £33,208,000.
220. Dylid nodi bod costau'r opsiwn hwn wedi'u hamcangyfrif gan ddefnyddio data cyfrifyddu o swyddfeydd Comisiynwyr o faint tebyg yng Nghymru, ac addasu'r data hynny ar gyfer 20 o staff ar gyfer Swyddfa'r Comisiynydd Cymwysterau. Ni ymchwiliwyd yn fanwl i'r opsiwn hwn, gan fod penderfyniad wedi'i wneud yn fuan i beidio â bodloni gofynion polisi, ac felly gallai costau'r opsiwn hwn amrywio, yn dibynnu ar union hyd a lled gwaith y Comisiynydd ac felly nifer y staff sy'n ofynnol. Amcan ceidwadol yw'r opsiwn a gyflwynir yma o gostau Swyddfa Comisiynydd lle byddai 20 o staff cymorth, gan gostio £2,172,000 yn ei blwyddyn gyntaf. Serch hynny, mae gan swyddfeydd Comisiynwyr eraill strwythur staffio o ryw 50, a fyddai'n gallu dyblu costau Swyddfa'r Comisiynydd i £5,010,000 yn ei blwyddyn gyntaf (gweler tabl 12 yn Atodiad B).

Manteision

221. Gwerth am arian: mae'r model hwn yn elwa ar wasanaethau corfforaethol Llywodraeth Cymru, swyddfeydd presennol a'r trefniadau pensiwn sy'n bodoli eisoes. Mae'n ddull, felly, o sicrhau parhad busnes mewn ffordd sy'n ddiogel yn ariannol, gan leihau'r risgiau i ddysgwyr ar wahanol adegau'r cylch cymwysterau.
222. Nid yw'r opsiwn hwn yn golygu costau yn ymwneud â materion adnoddau dynol, megis Rheoliadau Trosglwyddo Ymgymeriadau (Diogelu Cyflogaeth) 1981 a phensiynau.
223. Gan y byddai'r rhan fwyaf o'r staff sy'n ofynnol i weithredu'r system newydd yn parhau'n weision sifil i Lywodraeth Cymru, nid oes perygl bod arbenigedd yn cael ei golli pe na bai staff yn dymuno symud i gorff allanol.
224. Drwy ddod â dibyniaeth Cymru ar Ofqual i ben, a'r angen presennol i alinio polisiâu a phrosesau, mae'r opsiwn hwn yn rhoi rhyddid i swyddogion ddefnyddio cyfleoedd ac adnoddau mewn ffordd a fydd yn sicrhau'r fantais fwyaf i Gymru.
225. Fodd bynnag, bydd symleiddio'r farchnad gymwysterau at ddibenion rheoleiddio yn lleihau'r amser a dreulir gan swyddogion yn deall cymwysterau, yn cymharu'r gwahaniaethau rhwng cymwysterau sydd â'r

un enw ac yn eu monitro. Bydd hefyd yn ei gwneud yn bosibl gwella'r broses reoleiddio ac yn creu'r cyfle i'r sefydliad ganolbwyntio ar ei gyfeiriad strategol. Nid yw'n bosibl cyfrifo gwerth ariannol y fantais hon, gan nad yw'n gwbl hysbys eto pa gymwysterau y cyfyngir arnynt a pha rai a gomisiynir. Mater i Gymwysterau Cymru fydd penderfynu ar hynny.

Opsiwn 3

Yr opsiwn a ffeirir: Creu corff rheoleiddiol hyd braich i ddechrau, gyda'r bwriad o'i wneud yn gorff dyfarnu maes o law.

Costau

226. Mae cryn gostau ychwanegol yn gysylltiedig â'r opsiwn hwn o gymharu ag opsiynau 1 a 2. Mae'r costau hyn wedi'u nodi yn nhabl 4 isod, ac wedi'u hesbonio ymhellach ym mharagraffau 59 – 85 o Atodiad B.

227. Bydd Cymwysterau Cymru yn Gorff a Noddir gan Lywodraeth Cymru, ac a ariennir gan Lywodraeth Cymru drwy grant cymorth. Gallai fod yn bosibl hefyd i Gymwysterau Cymru greu incwm ychwanegol drwy werthu gwasanaethau yn y dyfodol, ond gan ei bod yn amhosibl rhagweld gweithgarwch busnes yn y dyfodol, mae'r costau hyn yn seiliedig ar y rhagdybiaeth y bydd Llywodraeth Cymru yn darparu'r cyllid 100%.

Tabl 4

Costau i Lywodraeth Cymru	2015-2016	2016-2017	2017-2018	2018-2019	2019-2020
COSTAU SEFYDLU					
Costau Refeniw: Staff - Cost y prosiect i roi'r sefydliad newydd	£ 1,202,000				
Costau Refeniw: Staff - Corfforaethol	£ 240,000				
Costau Refeniw: Staff - ac eithrio cyflogau	£ 294,000				
Costau Refeniw: Safle	£ 232,000				
Costau Refeniw: TGCh	£ 580,000				
Costau Cyfalaf :TGCh	£ 664,000				
Costau Cyfalaf: Gosodiadau a Ffitiadau	£ 226,000				
COSTAU GWEITHREDOL					
Costau Refeniw: Staff - Corfforaethol	£ 869,000	£ 1,490,000	£ 1,490,000	£ 1,490,000	£ 1,490,000
Costau Refeniw: Staff - Swyddogaethau cymwysterau	£ 1,862,000	£ 2,422,000	£ 2,422,000	£ 2,422,000	£ 2,422,000
Costau Refeniw: Staff - ac eithrio cyflogau	£ 95,000	£ 163,000	£ 163,000	£ 140,000	£ 123,000
Costau Refeniw: Staff - Uned Noddi	£ 102,000	£ 203,000	£ 203,000	£ 203,000	£ 203,000
Costau Refeniw: Safle	£ 436,000	£ 748,000	£ 748,000	£ 748,000	£ 748,000
Costau Refeniw: TGCh	£ -	£ 326,000	£ 326,000	£ 326,000	£ 326,000
Costau Refeniw: Eraill, Cyfreithiol a Phroffesiynol	£ 180,000	£ 306,000	£ 306,000	£ 306,000	£ 306,000
Costau Cyfalaf: TGCh	£ -	£ -	£ -	£ 178,000	£ -
Dibrisiant	£ 50,000	£ 86,000	£ 86,000	£ 86,000	£ 86,000
Gwariant Rhaglen Cymwysterau Cymru (Ymchwil etc)	£ 2,380,000	£ 2,380,000	£ 2,380,000	£ 2,380,000	£ 2,380,000
Cyfanswm	£ 9,412,000	£ 8,124,000	£ 8,124,000	£ 8,279,000	£ 8,084,000

228. Mae'r costau uchaf a ddangosir yn ymwneud â chostau staffio sydd, yn achos staff swyddogaethau, eisoes yn cael eu talu, i raddau helaeth, o gyllidebau Llywodraeth Cymru. Mae'r costau cychwynnol mwyaf sylweddol yn ymwneud â chostau adeiladau a chostau seilwaith TGCh.

229. Ar lefel bob dydd, mae'r costau mwyaf sylweddol (ac eithrio costau staff cymwysterau) yn ymwneud â chostau adeiladau, a chostau staffio corfforaethol.
230. Mae'r model hwn yn cynnwys creu Corff a Noddir gan Lywodraeth Cymru. Mae ei strwythur llywodraethu yn cynnwys Prif Weithredwr, a Bwrdd o 10 Aelod, yn ogystal â Chadeirydd.
231. Amcangyfrifir y byddai angen 73 o staff ar y sefydliad, sy'n cynnwys 3 a secondiwyd ar hyn o bryd o Lywodraeth Cymru i CBAC.
232. Ni ddisgwylir unrhyw gostau sylweddol i gyrff dyfarnu, dysgwyr na chyflogwyr yn sgil yr opsiwn hwn. Lle bydd Cymwysterau Cymru yn arfer ei hawl i adennill costau am gymeradwyo cymwysterau na roddir blaenoriaeth iddynt, byddai cyrff dyfarnu sy'n ceisio cymeradwyaeth yn gorfod talu'r ffi benodedig. Byddai cyrff dyfarnu sy'n cyflwyno cynigion mewn perthynas â chymwysterau a gomisiynwyd yn wynebu'r costau gweinyddol cysylltiedig. Beth bynnag yw'r costau sy'n codi, dyna fydd y ffioedd a godir. Ond mater i Gymwysterau Cymru fydd penderfynu ar y prosesau perthnasol ar gyfer yr achosion hyn, ac felly ni ellir amcangyfrif lefel y ffi eto nes inni wybod mwy am y prosesau. Er mwyn sicrhau nad yw'r costau yn afresymol o uchel, mae'r Bil yn darparu bod yn rhaid i unrhyw ffioedd a gynigir gael eu cymeradwyo gan Weinidogion Cymru. Bydd yn rhaid i benderfyniad Gweinidogion Cymru ynghylch y drefn ffioedd fod yn seiliedig ar asesiad o effaith.
233. Gwerth presennol costau Opsiwn 3 ar gyfer y cyfnod 2015-16 i 2019-20 yw £38,026,000.

Manteision

234. Nid oes unrhyw fanteision ariannol uniongyrchol i'r opsiwn hwn.
235. Fodd bynnag, bydd symleiddio'r farchnad gymwysterau at ddibenion rheoleiddio yn lleihau'r amser a gaiff ei dreulio gan swyddogion yn dod i ddeall, cymharu a monitro'r gwahaniaethau rhwng cymwysterau sydd â'r un enw, yn ei gwneud yn bosibl rheoleiddio'r system yn well ac yn rhoi cyfle i'r sefydliad ganolbwyntio ar ei gyfeiriad strategol. Nid yw'n bosibl cyfrifo gwerth ariannol y fantais hon, gan nad yw'n gwbl hysbys eto pa gymwysterau y cyfyngir arnynt a pha rai a gomisiynir. Mater i Gymwysterau Cymru fydd penderfynu ar hynny.
236. Mae cost ychwanegol uchel i'r opsiwn hwn, ac fel'i cydnabuwyd gan y Cabinet fel cost y gellir ei chyfiawnhau er mwyn cael system gymwysterau annibynnol yng Nghymru. Ni ystyriwyd bod cadw'r status quo, fel yn Opsiwn 1, na chreu sefydliad ffug-annibynnol, fel yn Opsiwn 2, yn werth am arian, er gwaethaf y costau is.
237. Mae cost sefydlu Cymwysterau Cymru yn cynrychioli cost annibyniaeth; mae'n darparu swyddogaeth reoleiddio gref i Gymru nad yw'n dibynnu ar

weithio ar sail tair gwlad, gydag arbenigedd proffesiynol sydd y tu allan i Lywodraeth Cymru.

238. Mae'r opsiwn hwn yn cynnig corff penderfynu annibynnol sydd ag enw da i Gymru, gan roi'r pŵer iddo wneud penderfyniadau cyson a phroffesiynol yn erbyn meini prawf clir a thryloyw. Mae tystiolaeth yn yr *Adolygiad o Gymwysterau* o werth hyn. Daeth yr Adolygiad i'r casgliad bod angen corff annibynnol yng Nghymru. Mae llwyddiant Awdurdod Cymwysterau'r Alban yn enghraifft o hyn.
239. Drwy gael un corff annibynnol ac awdurdodol i gynrychioli'r system gymwysterau yng Nghymru, bydd Cymru mewn sefyllfa well i ymateb i newidiadau o ran cymwysterau yn y DU, a bydd ganddi lais awdurdodol a berchir ac y gellir ei glywed ym meysydd cymwysterau Ewrop ac yn rhyngwladol.
240. Ni fydd y sefydliad ei hun yn dod â mantais ariannol, ond fel cyfrwng i greu system gymwysterau yng Nghymru, yn ogystal â hyder, cysondeb, eglurder, atebolrwydd ac awdurdod, bydd ei effeithiau yn bellgyrhaeddol ledled y wlad, i ddysgwyr a chyflogwyr yng Nghymru, a thu hwnt. Drwy ddod â rhanddeiliaid at ei gilydd a sefydlu'r corff mewn ffordd sy'n gallu dylanwadu'n bositif ar bolisi cymwysterau, aseswyd bod creu sefydliad o'r fath yn werth y gost i'r pwrs cyhoeddus.
241. Drwy drefnu nad yw Cymru yn dibynnu ar Ofqual, a chael gwared â'r angen cyfredol i gydblythu polisiâu a phrosesau, mae'r opsiwn hwn yn rhoi rhyddid i swyddogion ddefnyddio cyfleoedd ac adnoddau i'r fantais orau i Gymru.
242. Mae'r opsiwn hwn yn rhoi Cymru yn y sefyllfa orau i ddiwallu anghenion ei dinasyddion (dysgwyr a busnesau), yn enwedig y rheini sy'n siarad Cymraeg. Mae hyn, yn ei dro, yn debygol o arwain at sefyllfa lle bydd dinasyddion yn gallu cyfrannu'n fwy at yr economi.
243. Bydd cynnwys uned fasnachu yn golygu y gall Cymwysterau Cymru, yn y tymor hirach, greu ei incwm ei hun, a allai leihau baich cost y sefydliad ar y pwrs cyhoeddus.

Crynodeb

244. Oherwydd natur y manteision a nodwyd yn yr Asesiad Effaith Rheoleiddiol, nid yw'n hawdd mesur y costau. Mae hyn yn ei gwneud yn anodd cymharu'r costau a'r manteision yn wrthrychol. Er hynny, mae'n rhaid ceisio asesu p'un a yw'r manteision yn cyfiawnhau'r costau ychwanegol.
245. Opsiwn 1 sy'n costio leiaf ac mae'n cyflawni rhan o ofynion y polisi; byddai'r gwaith o ddiwygio cymwysterau yng Nghymru yn parhau, ond heb ymdeimlad o arbenigedd annibynnol ac o berchnogaeth yng

Nghymru. Fodd bynnag, mae'n methu â chyflawni'r prif ofyniad polisi, ac ni chaiff ei ystyried yn opsiwn addas.

246. Unwaith eto, mae Opsiwn 2 yn cyflawni'r gofynion polisi yn rhannol. Mae creu Comisiynydd Cymwysterau yn mynd rywfaint o'r ffordd i sicrhau peth annibyniaeth. Fodd bynnag, mae'r sefydliad annibynnol dan sylw yn un llawer llai nag yn achos yr opsiwn a ffefrir, a byddai'n arwain at rywfaint o ddyblygu gwaith, gan ddefnyddio adnoddau ychwanegol yn gwirio gweithgareddau cyrff eraill yn hytrach na chyflawni ei waith ei hun. Er ei fod yn rhatach, felly, nag Opsiwn 3, mae'r opsiwn hwn yn dal i fethu â chyflawni gofynion y polisi yn llawn, ac ni chaiff ei ystyried yn opsiwn addas.
247. Mae Opsiwn 3 yn cyflawni gofynion y polisi yn llawn. Mae'n costio mwy nag opsiynau 1 a 2, ond mae'r posibiladau i wneud gwahaniaeth a sicrhau gwir annibyniaeth yn fwy.
248. Yr hyn sydd wrth wraidd y penderfyniad yw'r gwerth a roddir ar ofynion y polisi. Opsiwn 3 sy'n sicrhau'r gwerth gorau am arian gan ei fod yn cyflawni'r amcan yn llawn, ac yn y cyd-destun hwn mae yna gyfiawnhad dros y gost ychwanegol. Dylid cymharu hyn â (diffyg) gwerth tybiedig cadw'r sefyllfa fel y mae yng Nghymru (Opsiwn 1) neu â darparu fersiwn wannach ar gyfer Cymru o'r hyn sy'n ofynnol (Opsiwn 2). Ar y sail hon, Opsiwn 3 yw'r opsiwn a ffefrir.

9 Aseiad o'r Gystadleuaeth ac Aseidiadau o Effeithiau Penodol

Aseiad o'r gystadleuaeth

249. Cynhaliwyd prawf ffiltr cystadleuaeth mewn perthynas â pholisi'r Bil, gan y gallai ei ddarpariaethau effeithio ar bris, ansawdd, ystod a lleoliad y cymwysterau y mae yna farchnad ar eu cyfer yn y DU.
250. Mae darparwyr cymwysterau, 'cyrff dyfarnu', yn gweithredu ar draws y DU, ac felly mae'r 'farchnad gymwysterau' yn bodoli ar lefel y DU.
251. Er bod y weledigaeth ar gyfer y polisi hwn yn nodi'n glir mai un o'i amcanion oedd symleiddio strwythur y farchnad yng Nghymru, o safbwynt rheoleiddio cymwysterau mae hyn.
252. Y nod yw sicrhau, lle bo'n briodol, bod nifer y fersiynau gwahanol o gymwysterau blaenoriaethol penodol a gymeradwyir yng Nghymru yn gyfyngedig, er enghraifft un TGAU Hanes yn lle pedwar. Nid cael gwared â darparwyr o'r farchnad gymwysterau yw'r bwriad. Mae angen llai o fersiynau o gymwysterau allweddol yng Nghymru nag sydd gennym ar hyn o bryd, ond mae marchnad gystadleuol iach i ddarparu'r cymwysterau hynny yn bwysig o ran y system gymwysterau gyffredinol, ac mae'n un o'n hamcanion polisi i gynnal marchnad gymwysterau gystadleuol i ddyfarnu cymwysterau yng Nghymru.
253. Roedd y prawf yn dangos nad yw'r gystadleuaeth yn debygol o ddioddef o gwbl o fewn y farchnad gymwysterau². Ni thybiwyd, felly, fod angen aseiad manwl pellach.
254. Bydd strwythur y farchnad yn parhau'n gystadleuol. Mae'n annhebygol y bydd nifer y cyrff dyfarnu yn newid yn sgil y polisi hwn gan mai rhan fach yw Cymru o farchnad ehangach y DU, a bod y rhan fwyaf o gyrff dyfarnu, gan gynnwys CBAC, yn gweithredu ar draws y DU, nid dim ond yng Nghymru. Ni ddisgwylir cynnydd sylweddol, felly, o ran costau na'r farchnad lafur, na gostyngiad yn y lefelau busnes ar gyfer cyflenwyr presennol na chyflenwyr newydd i'r farchnad yn sgil y polisi a ddaw i rym drwy'r Bil arfaethedig hwn. Efallai y bydd yna gostau gweinyddol bach ynghlwm wrth lunio cynigion i gyflenwi cymwysterau cyfyngedig a gomisiynwyd. Hefyd, bydd Cymwysterau Cymru yn gallu llunio cynllun codi ffioedd sy'n amlinellu'r ffioedd a godir ar gorff dyfarnu mewn

² Wrth gynnal y prawf, holodd swyddogion farn uned cyngor economaidd Llywodraeth Cymru, a gadarnhaodd fod cyflenwyr y farchnad gymwysterau yng Nghymru, i bob golwg, yn gweithredu mewn marchnad a oedd yn cynnwys y DU gyfan, a bod marchnad Cymru yn un elfen ohoni. Ar y sail honno, nodwyd ei bod yn annhebygol y byddai'r newidiadau a gynigir ar gyfer y farchnad yng Nghymru yn cael effaith andwyol (o ran maint y cymwysterau na'u nifer) ar y rheini sy'n cyflenwi ar gyfer marchnadoedd cymwysterau Cymru na'r DU.

perthynas â'r costau a ddaw i Gymwysterau Cymru yn sgil rhai o'i swyddogaethau rheoleiddio, gan gynnwys cydnabod, cymeradwyo, adolygu a delio â chwynion. Byddai gofyn cael cymeradwyaeth Gweinidogion Cymru ymlaen llaw ac, o weithredu cynllun o'r fath, byddai'n effeithio'n ariannol ar gyrff dyfarnu, ond dim ond adennill y costau a wneid. Câi asesiad o'r effaith ei lunio cyn cyflwyno'r mater i'r Gweinidogion, gan ganolbwyntio'n benodol ar yr effaith ariannol ar gyrff dyfarnu.

255. Ni ddisgwylir chwaith y bydd yna gynnydd yn y costau i gyflogwyr na dysgwyr yn sgil y polisi a ddaw i rym drwy'r Bil hwn.

Asesiadau o Effeithiau Penodol

256. Mae cyfres o asesiadau o effeithiau ar y Bil wedi'i chwblhau fel rhan o'r Asesiad Effaith Rheoleiddiol. Roedd yr effeithiau yn amrywio mewn nifer o feysydd polisi, ond yn bositif gan mwyaf.

257. Y bwriad yw rhoi'r gwaith o archwilio effeithiau'r sefydliad i Gymwysterau Cymru, pan fydd wedi'i sefydlu.

Datblygu Cynaliadwy

258. Mae sawl agwedd ar bolisïau Cymwysterau Cymru a datblygu cynaliadwy sy'n cydblethu, er nid yn uniongyrchol bob amser.

259. Mae'r cydblethu amlycaf i'w weld mewn dau faes:

- Ar draws maes diwydiant yng Nghymru, lle bydd Cymwysterau Cymru yn cydweithio'n uniongyrchol â'r sectorau diwydiant hynny sy'n cefnogi agenda Twf Gwyrdd, i sicrhau bod cymwysterau yn addas i'w diben er mwyn hyrwyddo twf cynaliadwy hirdymor ym maes diwydiant, ac yn ei ganlyniadau cysylltiedig, yng Nghymru.
- O ran egwyddorion cydweithredu ac ymgysylltu â rhanddeiliaid, sy'n rhan annatod o brif amcanion y sefydliad newydd.

Yr Amgylchedd, Newid Hinsawdd, Bioamrywiaeth

260. Ni nodwyd unrhyw effeithiau ar yr amgylchedd, yr hinsawdd na bioamrywiaeth yng Nghymru yn sgil y Bil hwn.

Cydraddoldeb

261. Mae'r Asesiad Effaith ar Gydraddoldeb i'w weld ar-lein yn:
<http://wales.gov.uk/legislation/programme/assemblybills/qualifications-wales/?lang=cy>

Oed (o dan 18)

262. Y bwriad yw y bydd y sefydliad yn sicrhau ansawdd y cymwysterau hynny yng Nghymru a gyflwynir i'w cymeradwyo gan gyrff dyfarnu cydnabyddedig er mwyn helpu i sicrhau bod y cymwysterau yn llwyddo i ddiwallu anghenion rhesymol dysgwyr a bod hyder gan y cyhoedd yn y cymwysterau hyn ac yn y prosesau rheoleiddio.
263. Dyma'r effeithiau positif arfaethedig ar blant a phobl ifanc:
- y gallant fod yn fwy hyderus y bydd y cymwysterau a ddilynant yn addas i'w diben - o ran cynnwys, dull asesu a'r gallu i symud ymlaen
 - y bydd darparwyr addysg bellach ac uwch yn fwy hyderus i gynnig lle iddynt ar raglenni dysgu, ac y cânt fwy o'r sgiliau, yr wybodaeth a'r ddealltwriaeth sydd eu hangen i lwyddo ar y rhaglenni hynny
 - y bydd cyflogwyr yng Nghymru, a'r tu hwnt i Gymru, yn fwy hyderus i gynnig gwaith iddynt ac y bydd y plant a'r bobl ifanc mewn sefyllfa well i berfformio'n dda yn y gwaith hwnnw.
264. Yn y tymor hirach, y gobaith yw y bydd cymaint o barch i gymwysterau a enillir yng Nghymru ac a gymeradwyir gan Gymwysterau Cymru fel y cânt eu hystyried yn ased i blant a phobl ifanc Cymru.
265. Bydd plant a phobl ifanc yng Nghymru yn elwa o ganlyniad, drwy gael eu hystyried yn fyfyrwyr dymunol ac a allai fod yn gyflogeion effeithiol dros ben. Bydd hyn, yn ei dro, yn arwain at fwy o botensial o ran cyflogadwyedd, a gwelliannau cysylltiedig, gobeithio, o ran lefelau incwm, iechyd a lles i blant a phobl ifanc Cymru a'u teuluoedd nawr ac i'r cenedlaethau i ddod.
266. Mae manteision iechyd a lles sy'n gysylltiedig â hyder a'r gallu i ddarparu ar gyfer eich teulu yn creu cylch o fanteision iechyd meddyliol a chorfforol. Y gobaith yw y bydd dysgwyr yn y grŵp oedran hwn a grwpiau oedran eraill yn elwa ar hyn.
267. Ar unrhyw adeg yn ystod y prosiect i sefydlu'r corff (gan gynnwys y broses o basio'r Bil), bydd yna blant a phobl ifanc yng Nghymru sydd wrthi'n dewis, yn dechrau, yng nghanol, yn cwblhau, neu'n ailsefyll cymwysterau. Cydnabyddir y bydd angen i Lywodraeth Cymru, a Chymwysterau Cymru, gymryd camau i sicrhau bod pob cohort yn cael y fantais fwyaf bosibl o'r cymwysterau maent yn eu dilyn, ac yn y cyfnod pontio â Chymwysterau Cymru, na fydd unrhyw blentyn na pherson ifanc dan anfantais nac yn manteisio'n annheg.
268. Er mwyn lleihau'r risg bod y cyfnod pontio o'r hen system i'r newydd yn cael effaith negyddol ar unrhyw grwpiau o blant a phobl ifanc, sefydlwyd system gyfathrebu ac ymgysylltu yn gynnar, i sicrhau bod y rhwydwaith cymorth o amgylch plant a phobl ifanc (athrawon, canolfannau,

cyflogwyr) yn gwbl ymwybodol o'r newidiadau mewn gofynion ac yn gallu cyflawni'r gofynion hynny.

269. Mae adborth gan blant a phobl ifanc yng Nghymru yn codi'r pryder y bydd y cymwysterau a enillir cyn i Gymwysterau Cymru gael ei sefydlu yn cael eu hystyried o ansawdd is na'r rheini a gynigir wedyn, ac y bydd stigma o ryw fath yn gysylltiedig â chymwysterau plant a phobl ifanc sy'n dilyn y cymwysterau hynny nawr.
270. Mae gwaith ar y gweill i ystyried sut y penderfynir ar ganlyniadau, er mwyn peidio â rhoi un cohort o ddysgwyr dan anfantais annheg mewn perthynas ag un arall. Ymarfer busnes arferol yw hwn o fewn Is-adran Rheoleiddio a Chymwysterau Llywodraeth Cymru sy'n rhan o'r gwaith o gynllunio a chyflwyno'r gyfres newydd o gymwysterau TGAU a Safon Uwch. Rhoddir cyfarwyddiadau a/neu ganllawiau i'r corff/cyrff dyfarnu ar y broses i'w dilyn wrth benderfynu ar raddau.
271. Yn ogystal, mae'r strategaeth gyfathrebu yn cynnwys datblygu a darparu gwybodaeth ar gyfer pobl ifanc a'u rhieni ar y newidiadau i'r system gymwysterau yng Nghymru.

Oed (18 i 50)

272. Mae'r materion cadarnhaol a negyddol sy'n ymwneud â dysgwyr hyd at 18 oed hefyd yn berthnasol i ddysgwyr rhwng 18 a 50 oed.
273. Hefyd, rydym am i waith Cymwysterau Cymru godi hyder y cyhoedd mewn cymwysterau a enillir yng Nghymru - gan gynnwys hyder cyflogwyr ynddynt wrth gyflogi staff, a chan annog mewnfuddsoddi felly, o bosibl. O ganlyniad, mae manteision y Rhaglen hon yn debygol o bara i'r dysgwr am flynyddoedd mawr o ran cyflogaeth.

Oed (50+)

274. Mae'r materion cadarnhaol a negyddol sy'n ymwneud â dysgwyr hyd at 18 oed hefyd yn berthnasol i ddysgwyr dros 50 oed.

Anabledd

275. O ran cyflawni anghenion dysgwyr sydd ag anableddau corfforol a/neu ddysgu, ni fydd darpariaethau'r Bil yn effeithio'n uniongyrchol arnynt gan y bydd y cyfrifoldeb dros ddiwallu eu hanghenion yn cael ei drosglwyddo oddi wrth Lywodraeth Cymru i Gymwysterau Cymru.

Iechyd Meddwl

276. Nid oes unrhyw dystiolaeth i awgrymu y bydd darpariaethau'r Bil yn effeithio ar bobl sydd â phroblemau iechyd meddwl.

Rhyw

277. Nid oes unrhyw dystiolaeth i awgrymu y bydd darpariaethau'r Bil yn effeithio ar bobl oherwydd eu rhyw.

Trawsrywedd

278. Nid oes unrhyw dystiolaeth i awgrymu y bydd effaith y Bil ar y polisi cymwysterau yng Nghymru yn effeithio ar bobl am eu bod yn drawsrywiol.

Priodas neu bartneriaeth sifil

279. Nid oes unrhyw dystiolaeth i awgrymu y bydd darpariaethau'r Bil yn effeithio ar bobl am eu bod wedi priodi neu mewn partneriaeth sifil.

Beichiogrwydd a/neu Famolaeth

280. Nid oes unrhyw dystiolaeth i awgrymu y bydd effaith y Bil ar y polisi cymwysterau yng Nghymru yn effeithio ar bobl o ran beichiogrwydd neu famolaeth.

Hil

281. Nid oes unrhyw dystiolaeth i awgrymu y bydd effaith y Bil ar y polisi cymwysterau yng Nghymru yn effeithio ar bobl mewn lleiafrifoedd ethnig.

Tarddiad Cenedlaethol

282. Fel a ddisgrifir yn '*Ein cymwysterau - ein dyfodol*', bydd y corff newydd a sefydlir gan y Bil yn gallu ymateb yn well i anghenion diwylliannol ac economaidd; er enghraifft, bydd yn gallu mynd i'r afael â materion sy'n berthnasol i Gymru'n unig, megis cynnwys cyrsiau, neu sicrhau dilyniant a chydlyniaeth o ran y cwricwlwm yng Nghymru f.

283. O ganlyniad, disgwylir effaith bositif gan y bydd dysgwyr Cymru yn gymwys mewn pynciau sy'n berthnasol iddyn nhw yn ddiwylliannol (er enghraifft yn y cwricwlwm a asesir ar gyfer cymwysterau hanes neu ddaearyddiaeth) ac yn economaidd (lle, er enghraifft, bydd sectorau diwydiant Cymru wedi cydweithio â Chymwysterau Cymru i sicrhau bod y sgiliau a'r wybodaeth sydd eu hangen i greu llwyddiant economaidd yn niwydiant Cymru yn cael eu darparu gan ddysgwyr a gweithwyr Cymru).

284. Mae'n destun pryder cyffredinol y dylai cyrsiau Cymwysterau Cymru gael eu parchu ar draws ei ffiniau, yn enwedig yn Lloegr, lle mae llawer o fyfyrwyr Cymru am fynd i gael addysg neu gyflogaeth. Ar wahân i'r canfyddiad cysyniadol o'r cymwysterau hynny, codwyd pryderon am effaith negyddol mewn perthynas ag ymarferoldeb astudio am gymwysterau Cymru a'u hennill yn agos iawn i'r ffin lle mae carfanau o

ddarpar-fyfyrrwyr neu gyflogeion yn dod o ddwy system gymwysterau wahanol, a lle byddai unrhyw ddiffyg parch at gymwysterau Cymru yn anfantais i ddysgwyr Cymru.

285. Nid oes unrhyw dystiolaeth i awgrymu y bydd darpariaethau'r Bil yn effeithio ar bobl yn y grwpiau hyn:

- Ceiswyr Iloches
- Sipsiwn a theithwyr
- Ymfudwyr

Cred grefyddol neu nad yw'n grefyddol

286. Nid oes unrhyw dystiolaeth i awgrymu y bydd darpariaethau'r Bil yn effeithio ar bobl oherwydd eu cred grefyddol neu eu cred nad yw'n grefyddol.

Cyfeiriadedd rhywiol

287. Nid oes unrhyw dystiolaeth i awgrymu y bydd darpariaethau'r Bil yn effeithio ar bobl oherwydd eu cyfeiriadedd rhywiol.

Hawliau Dynol

288. Mae darpariaethau'r Bil yn ategu Confensiwn y Cenhedloedd Unedig ar Hawliau'r Plentyn, yn benodol erthyglau 12, 29 a 30.

Y Gymraeg

289. Fel mater polisi, bwriedir maes o law i'r corff gael ei gynnwys o fewn y grŵp o gyrff a enwir ym Mesur y Gymraeg (Cymru) 2011 fel rhai sy'n gorfod cydymffurfio â dyletswyddau'n ymwneud â'r Gymraeg, sef Safonau'r Gymraeg o dan y system a sefydlir gan y Mesur.

290. Disgwylir i'r mesurau/targedau canlynol gael eu sefydlu i'w cyflawni/cyrraedd gan Gymwysterau Cymru mewn perthynas â'r Gymraeg - naill ai drwy'r ddeddfwriaeth, drwy'r ddogfen fframwaith neu drwy'r llythyr cylch gwaith blynyddol:

- Rhoi sylw i bolisi a strategaethau Llywodraeth Cymru megis y strategaeth addysg Gymraeg a strategaeth y Gymraeg, *iaith fyw: iaith byw*
- Rhoi sylw i hyrwyddo a hwyluso'r defnydd o'r Gymraeg, gan gynnwys drwy gynnig trefniadau asesu yn y Gymraeg, a chymwysterau sy'n hyrwyddo neu'n hwyluso'r defnydd o'r Gymraeg mewn ffyrdd eraill
- Sicrhau bod yna gymwysterau Cymraeg fel pwnc, iaith gyntaf ac ail iaith, a Chymraeg i Oedolion

- Hyrwyddo cymwysterau Cymraeg a hwyluso'r ffordd i ddysgwyr eu dilyn

Hawliau Plant

291. Mae Asesiad Effaith y Bil ar Hawliau Plant i'w weld ar-lein yn:
<http://wales.gov.uk/legislation/programme/assemblybills/qualifications-wales/?lang=cy>

292. Nodwyd effeithiau positif ar blant a phobl ifanc:

- bod y dewisiadau a gyflwynir iddynt, wrth ddewis eu cymwysterau, yn gliriach
- y gallant fod yn fwy hyderus y bydd y cymwysterau a ddilynant yn diwallu eu hanghenion rhesymol- o ran cynnwys, dull asesu a'r gallu i symud ymlaen
- y bydd darparwyr addysg bellach ac uwch yn fwy hyderus i gynnig lle iddynt ar raglenni dysgu, ac y cânt fwy o'r sgiliau, yr wybodaeth a'r ddealltwriaeth sydd eu hangen i lwyddo ar y rhaglenni hynny
- y bydd cyflogwyr yng Nghymru, a'r tu hwnt i Gymru, yn fwy hyderus i gynnig gwaith iddynt ac y bydd y plant a'r bobl ifanc mewn sefyllfa well i berfformio'n dda yn y gwaith hwnnw.

293. Yn y tymor hirach, y gobaith yw y bydd cymaint o barch i gymwysterau a enillir yng Nghymru fel y caiff cymwysterau a gymeradwyir gan Gymwysterau Cymru eu hystyried yn ased i blant a phobl ifanc Cymru. Bydd plant a phobl ifanc yng Nghymru yn elwa o ganlyniad, drwy gael eu hystyried yn fyfyrwyr dymunol ac a allai fod yn gyflogeion effeithiol dros ben. Bydd hyn, yn ei dro, yn arwain at fwy o botensial o ran cyflogadwyedd, a gwelliannau cysylltiedig, gobeithio, o ran lefelau incwm, iechyd a lles i blant a phobl ifanc Cymru a'u teuluoedd nawr ac i'r cenedlaethau i ddod.

294. Mae gwaith ar y gweill i sicrhau na fydd yna effaith negyddol ar blant a phobl ifanc yng Nghymru yn sgil canfyddiad bod y cymwysterau a enillir cyn i Gymwysterau Cymru gael ei sefydlu o ansawdd is na'r rheini a gynigir wedyn, fel bod stigma o ryw fath yn gysylltiedig â chymwysterau plant a phobl ifanc sy'n dilyn y cymwysterau hynny nawr. Ymarfer busnes arferol yw hwn o fewn yr Is-adran Rheoleiddio a Chymwysterau sy'n rhan o'r gwaith o gynllunio a chyflwyno'r gyfres newydd o gymwysterau TGAU a Safon Uwch.

Iechyd

295. O ran iechyd, gwelir prif effeithiau'r polisi hwn yn y meysydd canlynol, sef rhai o benderfynyddion cymdeithasol cyffredin iechyd:

Incwm / Tlodi

296. Mae yna ddisgwyliad y bydd y polisi hwn, yn sgil sefydlu corff i wella canlyniadau addysgol dysgwyr Cymru, yn cael effaith bositif maes o law ar incwm pobl Cymru drwy well cyfleoedd cyflogaeth, ac fel y disgrifir isod, dros amser dylai helpu i leihau tlodi a'i effeithiau cysylltiedig.

Addysg

297. Disgwylir y bydd symleiddio a chryfhau'r system gymwysterau yn ategu llawer o'r camau sy'n cael eu cymryd ar hyn o bryd i fynd i'r afael ag anghydraddoldeb ym maes cyrhaeddiad addysgol yng Nghymru; gan sicrhau cysondeb ansawdd - a chyfle, felly - i'r rheini sy'n ennill y cymwysterau, a chanfyddiad cyflogwyr o'r sgiliau a'r cymwysterau a enillir. Y gobaith yw y bydd yn arwain at gyflogaeth o ansawdd uchel, gan wella'r amodau lle caiff pobl eu geni, lle maent yn byw ac yn codi eu teuluoedd.

Cyflogaeth

298. Disgwylir i ddarpariaethau'r Bil i gryfhau a symleiddio'r system gymwysterau yng Nghymru, a chanolbwyntio ar sicrhau bod cymwysterau yn effeithiol, gael effaith dda uniongyrchol ar y mathau o gyfleoedd cyflogaeth sydd ar gael i ddysgwyr Cymru ac ansawdd y cyfleoedd hynny, ac ar yr ansawdd a'r sgiliau y mae'r dysgwyr yn dod â nhw i'r gweithle.
299. Mae cael eich cyflogi yn effeithio'n uniongyrchol ar les meddyliol a chorfforol. Mae cymhelliant a pharch hefyd yn cyfrannu at hyn, ac yn lleihau'r tebygolrwydd y bydd gweithwyr yn absennol o'r gweithle oherwydd salwch.
300. Yn ogystal, mae plant sydd o deuluoedd lle mae un person yn gyflogedig yn llai tebygol o ddiodef o anhwylderau seiciatrig a phroblemau ymddygiad.
301. Mae holl effeithiau cyflogaeth, o'u cyfuno, yn ei gwneud yn fwy tebygol y bydd pobl yn fwy cyfoethog ac yn byw mewn amgylchedd iachach pan fyddant yn ymddeol, sy'n cael effaith uniongyrchol ar les, adferiad a chyfraddau marwolaeth ymhlith pobl hŷn.
302. Yn ogystal, y gobaith yw y bydd gwaith ymgysylltu'r corff cymwysterau newydd â chyflogwyr a sefydliadau hyfforddi yn cryfhau economi Cymru, a buddsoddiad busnesau yn eu cyflogeion a'u hyfforddeion. Rydym yn gobeithio y bydd effaith hyn ar gyfleoedd y dysgwyr am gyflogaeth a dyrchafiad yn sylweddol, ac rydym yn gobeithio y bydd y potensial i ehangu busnes yn cynyddu graddfa'r cyfleoedd sydd ar gael.

Cydlyniant Cymdeithasol

303. Disgwylir effaith positif ar lefel fach o ran cydlyniant cymdeithasol Cymru yn sgil cyflwyno'r Bil. Mae'r effeithiau positif yn debygol o wella'r amodau lle mae pobl yn cael eu geni, yn tyfu, yn byw, yn gweithio ac yn heneiddio, ac felly yn cynyddu sefydlogrwydd a chydlyniant teuluol (sy'n dod â'i fanteision iechyd ei hun) ac fe allent hefyd leihau'r lefelau beichiogrwydd ymhlith merched yn eu harddegau (gweler isod).
304. Fodd bynnag, disgrifir effeithiau ar iechyd a lles fel rhywbeth cylchol, hunangyflawnol, gydag anfantais neu fantais yn dechrau cyn i unigolyn gael ei eni, ac yn *cynyddu* drwy gydol ei fywyd. Y gobaith yw, drwy wella canlyniadau cymdeithasol y system addysg a chymwysterau, a hefyd amgylchedd economaidd Cymru, y bydd yr effaith gronol ar iechyd a lles yng Nghymru, er yn rhywbeth graddol iawn, yn gwella'n sylweddol dros amser.
305. Fodd bynnag, un o fwriadau cydnabyddedig y polisi sy'n sail i'r Bil yw annog dysgwyr yng Nghymru i astudio a gweithio ledled y byd. Efallai y byddai hyn yn ganlyniad negyddol bychan i Gymru lle byddai manteision buddsoddi yn nysgwyr Cymru yn cael eu gweld mewn rhannau eraill o'r byd, ac nid yng Nghymru.

Tlodi

306. Mae cyswllt anuniongyrchol wedi'i nodi ag agenda Trechu Tlodi Llywodraeth Cymru, sef bod gweithlu mwy cymwys yn debygol o gael gwaith sy'n talu'n well, gan effeithio'n uniongyrchol ar iechyd ac ansawdd/canlyniadau bywyd.
307. Ni fydd Cymwysterau Cymru yn uniongyrchol gysylltiedig â'r gwaith o fonitro neu wella lefelau tlodi neu dlodi plant yng Nghymru.

Cymorth Gwladwriaethol

308. Ystyriwyd yr opsiynau i Gymwysterau Cymru o ran creu incwm yn fanwl i sicrhau nad oeddent yn torri rheolau cymorth gwladwriaethol.

Trefniadau ar gyfer cyfyngu ar gymwysterau blaenoriaethol

309. Cyn belled â bod cyfiawnhad clir dros wneud hynny, a'i bod yn glir mai'r pwrpas yw gwella'r system gymwysterau yng Nghymru, (a bod y broses ddewis yn agored, yn deg ac yn dryloyw), ni fyddai Cymwysterau Cymru yn torri rheolau cymorth gwladwriaethol drwy gyfyngu ar nifer y fersiynau o rai cymwysterau blaenoriaethol yng Nghymru.

Ymgynghori/Gweithgarwch masnachu arall

310. Mae'n fwriad yn y polisi y dylai Cymwysterau Cymru allu creu incwm o werthu ei wasanaethau, megis ymgynghori, yn ogystal â gwasanaethau

eraill sy'n ymwneud â chymwysterau y gallai ddewis eu darparu. Cyn belled nad yw'r gweithgarwch hwn yn cael ei gyllido gan y Llywodraeth, a'i fod yn gysylltiedig â'i swyddogaethau statudol, ni fyddai hyn yn torri rheoliadau cymorth gwladwriaethol. Yn sgil datblygu'r cysyniad hwn, lluniwyd y gofyniad polisi y dylai Cymwysterau Cymru allu sefydlu uned fasnachu ar wahân, ac mae'r Bil drafft yn cynnwys darpariaeth yn galluogi hyn, drwy bŵer i sefydlu cwmni, pŵer y mae'n rhaid i Weinidogion Cymru gymeradwyo ei weithredu.

Cynllun Codi Ffi

311. Y bwriad polisi yw y dylai Cymwysterau Cymru allu codi ffioedd am gyflawni ei swyddogaethau rheoleiddio, ac mae'r Bil yn ei alluogi i wneud hynny mewn perthynas â'r costau y mae'n gorfod eu talu yn sgil y swyddogaethau hynny, cyn belled â bod unrhyw ffioedd o'r fath yn cael eu cyhoeddi mewn cynllun a gymeradwyir gan Weinidogion Cymru. Bydd yn rhaid i unrhyw gynllun roi ystyriaeth i faterion cymorth gwladwriaethol a byddai'n rhaid i Weinidogion Cymru sicrhau:

- Mai dim ond er mwyn talu'r costau y mae Cymwysterau Cymru wedi gorfod eu talu y ceir codi ffioedd.
- Mai'r un ffioedd a godir ar bob corff dyfarnu, a bod yn rhaid bod yn dryloyw yn hyn o beth.
- Bod y Cynllun Codi Ffi yn deg (hy fforddiadwy).

Goblygiadau i'r Llysoedd

312. Yn gyffredinol, mae swyddogaethau Cymwysterau Cymru yn adlewyrchu'r rheini a gyflawnir ar hyn o bryd gan Weinidogion Cymru o dan Ddeddf Addysg 1997, gyda rhai newidiadau a swyddogaethau ychwanegol. Yn benodol, gallai fod i bwerau gorfodi Cymwysterau Cymru oblygiadau i'r llysoedd a'r system gyfiawnder. Gallai'r gwaith olygu gwneud cais i lys (am orchymyn gorfodol i fynnu bod cyfarwyddyd yn cael ei ddilyn) neu apelio i'r Tribiwnlys Haen Gyntaf (er enghraifft, yn erbyn penderfyniad i roi cosb ariannol). Mae'r darpariaethau hyn yn adlewyrchu darpariaethau tebyg yn Neddf Addysg 1997. Fodd bynnag, mae'r Bil yn cynnwys pŵer gorfodi newydd, sy'n cynnwys y llysoedd a'r system gyfiawnder. Pŵer yw hwn i wneud cais i ynad heddwch am orchymyn yn rhoi awdurdod i gael mynediad i safle corff cydnabyddedig a'i arolygu. O gofio'r gofynion y mae'n rhaid eu cyflawni er mwyn rhoi gorchymyn o'r fath, nid oes disgwyl y bydd ceisiadau am orchymynion o'r fath yn digwydd yn aml. Nid oes disgwyl, felly, i'r effaith gyffredinol ar y llysoedd a'r system gyfiawnder fod yn sylweddol.

Effaith Ddaeryddol

313. Ni nodwyd unrhyw effaith sylweddol ar anghenion na dymuniadau pobl, cymunedau a busnesau yng Nghymru wledig yn sgil y polisi yn y Bil hwn.

Preifatrwydd

314. Nid oedd angen Aseiad Effaith llawn ar Breifatrwydd, gan na nodwyd unrhyw effaith ar breifatrwydd yn sgil y Bil hwn.

10 Adolygu ar ôl gweithredu

Y Polisi o fewn y Bil

315. Mae'r Bil yn sefydlu Cymwysterau Cymru fel Corff a Noddir gan Lywodraeth Cymru sydd â chyfrifoldebau mewn perthynas â chymwysterau yng Nghymru.

316. Dyma brif amcanion y sefydliad:

- a. Sicrhau bod cymwysterau, a system gymwysterau Cymru, yn effeithiol i gyflawni anghenion rhesymol dysgwyr Cymru;
- b. Codi hyder y cyhoedd mewn cymwysterau ac yn system gymwysterau Cymru.

Adolygu sut mae'r polisi wedi cael ei weithredu

317. Wrth adolygu a gwerthuso'r polisi yn y Bil, byddwn yn canolbwyntio ar weithredu'r canlynol:

- Swyddogaethau statudol Cymwysterau Cymru: bydd gan Gymwysterau Cymru swyddogaethau mewn perthynas â chymwysterau yng Nghymru. Ar hyn o bryd mae Gweinidogion Cymru yn cyflawni rhai swyddogaethau tebyg.
- Cyfrifoldeb Cymwysterau Cymru dros adolygu effeithiolrwydd y system gymwysterau yng Nghymru, gan gynnwys ei swyddogaeth ei hun o fewn y system honno.
- Mesur lefelau hyder y cyhoedd yn y sefydliad fel rheoleiddiwr annibynnol cymwysterau Cymru, yn y cymwysterau a gymeradwyir yng Nghymru ac yn y system gymwysterau cyn ac ar ôl sefydlu Cymwysterau Cymru;
- Adolygu effeithiau sefydlu Cymwysterau Cymru.

318. Ymhelaethir ar y rhain isod.

Cyflawni swyddogaethau statudol Cymwysterau Cymru: rheoleiddio, swyddogaethau sicrhau ansawdd a chomisiynu

319. Bydd yn ofynnol i'r sefydliad roi adroddiad blynyddol i Gynulliad Cenedlaethol Cymru ar (ymhlith materion eraill) sut mae wedi cyflawni ei swyddogaethau, a'i gynlluniau ar gyfer gwneud hynny yn ystod y flwyddyn wedyn.

Methodoleg Adolygu

320. Cyfrifoldeb Cymwysterau Cymru fydd cynllunio sut caiff yr adroddiad blynyddol hwn ei lunio a mynd ati i wneud hynny. Caiff yr Adroddiad Blynyddol cyntaf ei baratoi yn 2016.
321. Wrth lunio'r adroddiad, bydd yn ofynnol i Gymwysterau Cymru roi adroddiad ar, ymhlith materion eraill, sut mae wedi cyflawni ei swyddogaethau, yng ngoleuni ei brif amcanion. Bydd disgwyl iddo hefyd, er enghraifft, roi adroddiad ar sut mae wedi ymgysylltu â rhanddeiliaid wrth gyflawni ei swyddogaethau.
322. Bydd Cymwysterau Cymru yn gorfod ateb i Gynulliad Cenedlaethol Cymru, naill ai mewn sesiwn lawn neu mewn Pwyllgor.

Adolygu'r system gymwysterau yng Nghymru, gan gynnwys y berthynas rhwng Cymwysterau Cymru a Chyrff Dyfarnu

323. I ategu'r prif amcan o sicrhau effeithiolrwydd system gymwysterau Cymru, bydd Cymwysterau Cymru o dan ddyletswydd benodol i adolygu'r rhyng-gysylltiadau rhwng gwahanol gyrff, gan gynnwys ei berthynas ei hun â chyrff dyfarnu. Bydd hyn, er enghraifft, yn galluogi Cymwysterau Cymru i fod mewn sefyllfa i roi cyngor i Weinidogion Cymru ynghylch pa mor ymarferol yw gwneud Cymwysterau Cymru yn gorff dyfarnu yn y tymor hirach.

Methodoleg Adolygu

324. Bob blwyddyn, bydd y sefydliad yn rhoi adroddiad i Gynulliad Cenedlaethol Cymru. Fel rhan o'i adroddiad statudol blynyddol, bydd yn gwneud dadansoddiad cyffredinol o'r system gymwysterau yng Nghymru.

Hyder y cyhoedd yn system gymwysterau Cymru

325. Roedd yr effaith bositif ar hyder y cyhoedd yn y cymwysterau a gymeradwyir a'r system gymwysterau yng Nghymru yn ddadl bwysig wrth drafod sefydlu corff cymwysterau annibynnol i Gymru, ac mae hyn wedi'i restru fel un o brif amcanion y sefydliad.
326. Wrth i'r cynlluniau cychwynnol ar gyfer yr adolygiad gael eu hamlinellu isod, bydd angen i Gymwysterau Cymru benderfynu ar y ffordd orau o fonitro hyder yn gyson yn y tymor hirach. Mae'n debyg mai drwy fonitro hyder grwpiau penodol y caiff hyn ei wneud. Bydd angen i Gymwysterau Cymru gytuno ar hyn gyda'i Fwrdd.

Methodoleg Adolygu

327. Bydd gan y corff newydd uned noddi o fewn Llywodraeth Cymru. Bydd yr uned noddi yn gyfrifol am adolygu effaith gweithredu'r *Adolygiad o Gymwysterau* sy'n cynnwys y penderfyniad i greu Cymwysterau Cymru.
328. Roedd yr *Adolygiad o Gymwysterau* yn seiliedig ar dystiolaeth gref ac yn sail gadarn dros fuddsoddi. Roedd yr argymhellion yn seiliedig ar drafodaeth fanwl ag amrywiaeth eang o randdeiliaid o Gymru a'r DU gyfan. Casglwyd eu safbwyntiau drwy ymgynghoriad ffurfiol a thrwy ymgysylltu'n ehangach â grwpiau perthnasol. I gyd-fynd â'r ymarferion hyn, dadansoddwyd ffynonellau data a chomisiynwyd nifer o brosiectau ymchwil. Gall y gwaith hwn, felly, ffurfio'r llinell sylfaen.
329. Cynhelir gwerthusiad o effaith y camau a gymerwyd drwy ymchwil ansoddol gan ddefnyddio gweithdai a chan gynnwys rhanddeiliaid sy'n aelodau o Grŵp Rhanddeiliaid Allanol yr *Adolygiad o Gymwysterau*. Bydd yr ymchwil yn asesu lefel yr hyder ymhlith rhanddeiliaid ac yn rhoi sylw i'r gwaith o ddiwygio cymwysterau (y bydd Cymwysterau Cymru yn ei reoleiddio) yn ogystal â chreu'r corff newydd. Y bwriad yw gwneud hyn ar 3 adeg - yn 2015 (pan aiff y corff newydd yn fyw), yn 2017 (pan fydd dysgwyr wedi cymryd y cymwysterau newydd cyntaf) ac yn 2019 (pan fydd dysgwyr wedi cymryd Bagloriaeth newydd Cymru ar lefel uwch). Gellid comisiynu rhywfaint o waith, fel grwpiau ffocws gyda'r rhieni, os bydd bylchau yn y sylfaen dystiolaeth.
330. Y bwriad yw i'r corff newydd gydweithio'n agos â Llywodraeth Cymru a mabwysiadu protocolau Ymchwil Gymdeithasol y Llywodraeth. Y gobaith yw y bydd Cymwysterau Cymru yn gallu manteisio ar rai dulliau arolygu sydd eisoes yn bod yn ogystal â chomisiynu rhai newydd. Bydd Cymwysterau Cymru yn gweithio gyda'i uned noddi ac efallai yn achub ar gyfleoedd i gomisiynu, dylunio a gwneud gwaith ymchwil ar y cyd. Mae'n debygol y bydd unrhyw ymchwil o'r fath yn adolygiad cyffredinol sydd wedi'i gomisiynu; gallai fod yn rhan o raglen ymchwil i fesur hyder yn y sefydliad fel rheoleiddiwr a hyder mewn cymwysterau (ynghyd â phrosiectau ymchwil a gwerthuso yn ôl yr angen).
331. Gellir mesur hyder hefyd drwy arolygon sy'n cael eu cynnal ar hyn o bryd gan Lywodraeth Cymru a phartneriaid eraill. Efallai y gall y corff newydd ddefnyddio'r rhain neu gomisiynu rhai newydd. Mesurir hyder y cyhoedd hefyd drwy'r cyfryngau.

Effeithiau sefydlu Cymwysterau Cymru

332. Bydd uned noddi Llywodraeth Cymru yn gyfrifol am adolygu effaith sefydlu Cymwysterau Cymru. Mae'r adolygu hwn yn debygol o ddigwydd drwy ailedrych ar asesiadau o effaith a gynhaliwyd fel rhan o'r gwaith o ddatblygu polisi'r ddeddfwriaeth.
333. Caiff yr asesiadau hyn o effaith hefyd eu trosglwyddo i Gymwysterau Cymru pan fydd wedi'i sefydlu. Mater i Gymwysterau Cymru fydd penderfynu sut i ddefnyddio'r asesiadau hyn, ac a fyddant yn rhan o'r adolygiad a'r gwerthusiad parhaus y bydd yn ei gynnal fel rhan o'i fusnes arferol.

BIL CYMWYSTERAU CYMRU

Atodiad A - NODIADAU ESBONIADOL

CYFLWYNIAD

1. Mae'r Nodiadau Esboniadol hyn ar gyfer Bil Cymwysterau Cymru, a gyflwynwyd i Gynulliad Cenedlaethol Cymru ar 1 Rhagfyr 2014. Fe'u lluniwyd gan yr Adran Addysg a Sgiliau er mwyn cynorthwyo'r sawl sy'n darllen y Bil. Dylid darllen y Nodiadau Esboniadol ar y cyd â'r Bil ond nid ydynt yn rhan ohono.
2. Nid ydynt yn ddisgrifiad cynhwysfawr o'r Bil ac nid ydynt i fod yn ddisgrifiad cynhwysfawr ohono. Felly pan fo adran neu ran o adran yn hunanesboniadol, ni roddir esboniad na sylw pellach.
3. Mae'r pwerau i wneud y Bil wedi eu cynnwys yn Rhan 4 o Ddeddf Llywodraeth Cymru 2006 a pharagraff 5 o Ran 1 o Atodlen 7 iddi. Mae gan Gynulliad Cenedlaethol Cymru y cymhwysedd deddfwriaethol angenrheidiol i wneud darpariaeth ar gyfer y Bil ac mewn cysylltiad ag ef yn rhinwedd Atodlen 7, paragraff 5 (Addysg a hyfforddiant).

Cefndir

4. Comisiynwyd yr Adolygiad o Gymwysterau ar gyfer pobl ifanc 14 i 19 oed yng Nghymru gan Weinidogion Cymru yn 2011 a Huw Evans, cyn-bennaeth Coleg Llandrillo oedd y Cadeirydd. Y dasg oedd nodi'r modd y gallai Llywodraeth Cymru sicrhau bod gan Gymru gymwysterau sy'n cael eu deall a'u gwerthfawrogi ac yn diwallu anghenion ein pobl ifanc ac economi Cymru, a chyflwynwyd adroddiad i'r Gweinidogion ym mis Tachwedd 2012. Pwysleisiodd yr Adolygiad o Gymwysterau bwysigrwydd sicrhau bod y cymwysterau y mae dysgwyr yn eu dilyn yng Nghymru yn cael eu cydnabod a'u gwerthfawrogi ledled y byd.
5. Derbyniodd Gweinidogion Cymru y 42 o argymhellion a oedd wedi eu cynnwys yn yr adroddiad. Mewn perthynas â'r system gymwysterau yng Nghymru daeth yr adroddiad i'r casgliad "y dylid sefydlu un corff i reoleiddio, cymeradwyo a sicrhau ansawdd pob cymhwyster (yn is na lefel gradd) sydd ar gael yng Nghymru, gan gyflwyno ymagwedd newydd a chryfach at reoleiddio" ac y "byddai penderfyniadau rheoleiddio yn cael eu gwneud ar wahân i'r llywodraeth".
6. Rhagwelodd yr adroddiad hefyd y dylai Cymwysterau Cymru ddod yn sefydliad dyfarnu ar gyfer Cymru, gan ddatblygu a dyfarnu'r "rhan fwyaf o'r cymwysterau ar gyfer pobl ifanc 14 i 16 oed a'r rhan fwyaf o'r cymwysterau cyffredinol ar gyfer pobl ifanc 16 i 19 oed".

7. Mae'r Bil hwn yn rhoi effaith i ran gyntaf yr argymhelliad am ei fod yn sefydlu un corff rheoleiddiol ar gyfer cymwysterau sydd hyd braich oddi wrth Weinidogion Cymru ac sy'n tynnu swyddogaethau rheoleiddiol presennol Gweinidogion Cymru sy'n ymwneud â chymwysterau oddi wrthynt. Nid yw'n rhoi pwerau i Gymwysterau Cymru i fod yn gorff dyfarnu. Byddai angen deddfwriaeth bellach i gyflawni hynny.
8. Ar 1 Hydref 2013, cyhoeddwyd papur ymgynghori gan nodi polisi Llywodraeth Cymru a chyhoeddwyd crynodeb o'r ymatebion a gafwyd i'r ymgynghoriad ym mis Mehefin 2014. Mynegodd yr ymatebion i'r ymgynghoriad gymeradwyaeth gref i'r cynigion i sefydlu corff rheoleiddiol newydd ac mae'r Bil hwn yn rhoi effaith i'r cynigion hynny.

Crynodeb o'r Bil

9. Bydd y Bil hwn yn sefydlu sefydliad newydd, Cymwysterau Cymru i gyflenwi model newydd o reoleiddio. O dan y gyfundrefn sydd i'w sefydlu gan y Bil, bydd Cymwysterau Cymru yn arfer swyddogaethau rheoleiddiol mewn perthynas â chymwysterau a ddyfernir yng Nghymru. Mae rhai o'r swyddogaethau hyn yn debyg i'r rhai sy'n cael eu harfer ar hyn o bryd gan Weinidogion Cymru.
10. Mae'r Bil yn rhoi i Gymwysterau Cymru ddau brif nod sy'n sefydlu cyfrifoldeb Cymwysterau Cymru am sicrhau bod cymwysterau yng Nghymru (a'r system gymwysterau sy'n sylfaen iddynt) yn effeithiol wrth diwallu anghenion dysgwyr a hybu hyder y cyhoedd. Er mwyn mynd i'r afael â nifer o faterion sy'n cyfrannu at effeithiolrwydd a hyder y cyhoedd, mae'n ofynnol i Gymwysterau Cymru ddatblygu a gweithredu system ar gyfer cydnabod cyrff dyfarnu a chymeradwyo cymwysterau.
11. Er mwyn gwella ansawdd y cymwysterau a rhoi i Gymwysterau Cymru bwerau rheoleiddiol effeithiol, mae'r Bil yn galluogi Cymwysterau Cymru i ganolbwyntio ar gymwysterau blaenoriaethol, i gomisiynu cymwysterau ac i gyfyngu ar nifer y cymwysterau penodol y caniateir iddynt gael eu cymeradwyo.

SYLWEBAETH AR YR ADRANNAU

RHAN 2: SEFYDLU A PHRIF NODAU CYMWYSTERAU CYMRU

Adran 2: Sefydlu Cymwysterau Cymru

12. Mae'r adran hon yn sefydlu Cymwysterau Cymru fel corff corfforaethol. Mae'n cyflwyno Atodlen 1 sy'n darparu manylion pellach am ei sefydlu ac Atodlen 2 sy'n caniatáu i Weinidogion Cymru drosglwyddo staff Llywodraeth Cymru ac eiddo, hawliau a rhwymedigaethau o Weinidogion Cymru i Gymwysterau Cymru.

Adran 3: Prif nodau Cymwysterau Cymru

13. Mae'r adran hon yn nodi prif nodau Cymwysterau Cymru: bydd y rhain yn sylfaen i'r holl waith y bydd Cymwysterau Cymru yn ei wneud - a bydd angen i Gymwysterau Cymru sicrhau bob amser bod ei gamau yn cydweddu â'r nodau hyn.
14. Mae'r prif nod cyntaf yn rhoi'r cyfrifoldeb i Gymwysterau Cymru am sicrhau effeithiolrwydd cymwysterau i ddiwallu anghenion rhesymol dysgwyr yng

Nghymru. Mae ystyr cymwysterau wedi ei ddiffinio yn adran 51. Er bod y prif nod hwn yn eang ei gwmpas, mae Rhan 4 o'r Bil (Cymeradwyaethau) yn darparu'r pwerau i Gymwysterau Cymru i benderfynu ar ffocws ei weithgareddau. Mae'r prif nod hwn hefyd yn ei gwneud yn ofynnol i Gymwysterau Cymru gymryd cyfrifoldeb am effeithiolrwydd y system gymwysterau yng Nghymru. Y 'system' yw'r seilwaith sy'n sylfaen i'r gwaith o gyflenwi cymwysterau ac sy'n galluogi i hynny gael ei wneud - mae'n cynnwys y ffordd y mae cymwysterau yn cael eu datblygu, eu cyflenwi a'u dyfarnu ynghyd â beth sy'n cael ei ddatblygu, ei gyflenwi a'i ddyfarnu.

15. Mae'r ail brif nod yn ei gwneud yn ofynnol i Gymwysterau Cymru hybu hyder y cyhoedd yn y system gymwysterau a'r system ategol. Er mwyn i'r cymwysterau a'r system fod yn wirioneddol effeithiol, gyda'i gilydd rhaid iddynt ysbrydoli hyder y cyhoedd. Gallai asesiad o hyder y cyhoedd gynnwys, er enghraifft, lefel hyder cyflogwyr, darparwyr dysgu, dysgwyr, rhieni a gofalwyr yng ngwerth cymharol y cymwysterau a ddilynrir yng Nghymru o gymharu â'r rheini a ddilynrir, er enghraifft, yn Lloegr.
16. Mae is-adran 2 yn nodi rhestr nad yw'n hollgynhwysfawr o'r materion y mae rhaid i Gymwysterau Cymru roi sylw iddynt wrth benderfynu ar yr hyn sy'n briodol er mwyn cyflawni ei brif nodau. Er bod y rhan fwyaf o'r materion hyn yn hunanesboniadol, caiff nodiadau ychwanegol eu darparu yma i roi cyd-destun a/neu enghreifftiau i egluro rhai o'r termau:
 - a. Mae gweithlu medrus yn ffactor bwysig yn nhwf economi Cymru - ac mae cymwysterau yn ddangosydd o sgiliau darpar weithwyr newydd ac yn ffon fesur ar gyfer datblygu sgiliau'r gweithlu presennol.
 - b. Bydd angen i Gymwysterau Cymru ystyried yn benodol y ddarpariaeth o asesiadau drwy gyfrwng y Gymraeg ac, er enghraifft, y ddarpariaeth o gymwysterau sy'n galluogi dysgwyr i ddatblygu neu ddefnyddio'r Gymraeg.
 - c. Mae 'trefniadau asesu' yn cynnwys, er enghraifft, ystyried dilysrwydd a dibynadwyedd y trefniadau asesu. Caiff gynnwys natur yr asesiad a gyflawnir gan ddysgwyr (er enghraifft, ystyried ansawdd papur arholiad) ynghyd ag, er enghraifft, y trefniadau diogelwch mewn perthynas â storio cofnodion asesu.
 - d. Gallai anghenion rhesymol cyflogwyr gael eu hystyried, er enghraifft, mewn perthynas â'r angen i roi i ddysgwyr yr wybodaeth, y sgiliau a'r ddealltwriaeth sy'n berthnasol i gyflogaeth gyffredinol a phenodol. Gall fod angen i Sefydliadau Addysg Uwch gael eu bodloni, er enghraifft, fod y cymwysterau a ddyfernir i ddysgwyr yng Nghymru yn gwahaniaethu'n ddigonol rhwng lefelau gwahanol o allu ac yn eu paratoi'n ddigonol ar gyfer astudiaeth bellach. Nid yw'r 'proffesiynau' wedi eu cyfyngu i unrhyw restr gyfyngedig o broffesiynau ond gellir cymryd eu bod yn cynnwys, er enghraifft, safbwyntiau cynrychiolwyr ac arbenigwyr proffesiynol perthnasol.

- e. Rhaid i Gymwysterau Cymru roi sylw i gynnwys cymwysterau, yn benodol y graddau y maent yn gyfredol ac yn adlewyrchu arferion gorau, er enghraifft, wrth gyflawni tasgau.
- f. Gall 'lefel o gyrhaeddiad sy'n gyson', er enghraifft, ymwneud â chysondeb dros amser, dros genhedloedd gwahanol, dros bynciau neu dros gymwysterau a wneir gan grŵp oedran penodol. Yn y cyd-destun hwn, gallai cyrhaeddiad gyfeirio, er enghraifft, at y graddau y mae dysgwyr wedi caffael (neu y mae'n ofynnol iddynt gaffael) y lefel ofynnol o wybodaeth, sgiliau a dealltwriaeth sy'n ymwneud â'r cymhwyster.
- g. Nid yw ystyried a yw cymwysterau yn cael eu cyflenwi yn 'effeithlon' wedi ei gyfyngu i ystyriaethau ariannol neu economaidd yn unig ond caiff, er enghraifft, gynnwys ystyriaeth o effaith nifer ac ansawdd y rhyngweithiadau rhwng cyrff ac unigolion gwahanol ar effeithiolrwydd a hyder y cyhoedd.
- h. Wrth ystyried effeithiolrwydd y system, bydd angen i Gymwysterau Cymru ystyried rolau a chyfrifoldebau'r gwahanol gyrff yn y system honno, gan gynnwys, er enghraifft, ei rôl ei hun yn y system. Yn y cyd-destun hwn, er enghraifft, gallai Cymwysterau Cymru ystyried ei rôl bosibl yn y dyfodol fel corff dyfarnu.

RHAN 3: CYDNABOD CYRFF DYFARNU

Adran 4: Cydnabod cyrff dyfarnu

17. Mae'r adran hon yn rhoi'r pŵer i Gymwysterau Cymru i gydnabod cyrff dyfarnu. Dim ond cyrff dyfarnu sydd wedi cael eu cydnabod gan Gymwysterau Cymru sy'n gallu cael cymwysterau wedi eu cymeradwyo gan Gymwysterau Cymru. Fel arfer, mae cyrff dyfarnu yn datblygu cymwysterau ac yn eu cyflenwi drwy ddarparu dysgu, megis ysgolion, colegau a darparwyr dysgu seiliedig ar waith. Mae cyrff dyfarnu yn pennu ac yn gweinyddu trefniadau asesu ac yn atebol am benderfynu ar ba un ai i ddyfarnu cymhwyster i ddysgwr ai peidio (ac, os yw'n briodol, pa radd y dylid ei dyroddi).

Adran 5: Dyletswydd i osod meini prawf cydnabod cyffredinol

18. Mae Cymwysterau Cymru o dan ddyletswydd i osod a chyhoeddi'r meini prawf y bydd yn ystyried pa un ai i gydnabod corff dyfarnu ai peidio yn eu herbyn. Cyfeirir at y meini prawf hyn fel 'meini prawf cydnabod cyffredinol' ond caniateir meini prawf gwahanol ar gyfer mathau gwahanol o gyrff dyfarnu. Er enghraifft, mae'n bosibl na fydd maen prawf ar y gallu i ddarparu cyfleusterau warws diogel i storio papurau arholiad yn ddiogel yn gymwys i gorff dyfarnu sy'n darparu asesiad ar-lein yn unig.

Adran 6: Pŵer i osod meini prawf cydnabod sy'n benodol i gymhwyster

19. Mae'r adran hon yn rhoi'r pŵer i Gymwysterau Cymru i benderfynu y dylai cyrff dyfarnu sy'n bwriadu cynnig mathau penodol o gymhwyster, yn ychwanegol at y meini prawf cydnabod cyffredinol, fodloni meini prawf penodol er mwyn bod yn gymwys i gyflwyno'r mathau hynny o gymhwyster i'w cymeradwyo. Er enghraifft, caniateir i Gymwysterau Cymru ei gwneud yn ofynnol i bob corff dyfarnu sy'n bwriadu cynnig cymwysterau TGAU a/neu Safon Uwch yng Nghymru ddangos ei

fod yn gallu bodloni prosesau marcio a graddio mewn pryd i ddyroddi nifer mawr o ganlyniadau cywir ar un dyddiad. O ran y meini prawf cydnabod cyffredinol, caniateir i'r meini prawf cydnabod penodol amrywio yn unol â'r math o gorff dyfarnu. Yn ychwanegol, caniateir iddynt amrywio yn unol â'r math o gymhwyster o dan sylw.

Adran 7: Diwygio meini prawf cydnabod cyffredinol a meini prawf cydnabod sy'n benodol i gymhwyster

20. Mae'r adran hon yn rhoi'r pŵer i Gymwysterau Cymru i adolygu'r meini prawf cydnabod cyffredinol a'r meini prawf cydnabod sy'n benodol i gymhwyster. Rhaid iddo gyhoeddi'r meini prawf diwygiedig a'i gwneud yn glir o ba ddyddiad y mae'r diwygiadau yn gymwys. Rhaid cyhoeddi meini prawf diwygiedig cyn y gallant ddod i rym.

Adran 8: Cydnabod corff dyfarnu yn gyffredinol

21. Caiff cyrff dyfarnu wneud cais i Gymwysterau Cymru i gael eu cydnabod yn gyffredinol. Mae'r adran hon yn ei gwneud yn ofynnol i Gymwysterau Cymru gydnabod pob corff dyfarnu sydd wedi gwneud cais iddo ac sy'n bodloni'r meini prawf cydnabod cyffredinol sydd wedi eu cyhoeddi. Fodd bynnag, mae'r Bil hefyd yn darparu i Gymwysterau Cymru gydnabod corff dyfarnu sydd wedi gwneud cais, ond nad yw'n bodloni'r holl feini prawf yn llawn. Mae is-adran 4 yn nodi'r materion y mae rhaid i Gymwysterau Cymru eu hystyried wrth benderfynu pa un ai i gydnabod corff dyfarnu nad yw'n bodloni'r holl feini prawf. Gallai'r ddarpariaeth hon gwmpasu sefyllfaoedd pan fo'n dod i'r amlwg, er enghraifft, nad yw maen prawf penodol yn berthnasol i'r corff sy'n cael ei ystyried. Mae'n ofynnol cael cydnabyddiaeth gyffredinol cyn y gall Cymwysterau Cymru gymeradwyo unrhyw gymhwyster sy'n cael ei gynnig gan y corff dyfarnu hwnnw. Er mwyn cael rhai mathau o gymwysterau wedi eu cymeradwyo gan Gymwysterau Cymru, mae'n bosibl y bydd rhaid i gorff dyfarnu, yn ychwanegol, gael 'cydnabyddiaeth benodol'.

Adran 9: Cydnabod corff dyfarnu mewn ffordd sy'n benodol i gymhwyster

22. Mae'r adran hon yn gyffredinol yn adlewyrchu adran 8 ond mae'n gymwys mewn sefyllfaoedd pan fo corff dyfarnu yn gwneud cais i gael ei gydnabod mewn cysylltiad â chymwysterau y mae meini prawf cydnabod penodol yn gymwys iddynt. Dim ond os yw corff dyfarnu wedi cael cydnabyddiaeth gyffredinol hefyd y mae'n gallu cael cydnabyddiaeth benodol. Os yw corff sydd â chydabyddiaeth gyffredinol yn gwneud cais am gydnabyddiaeth arbennig, cyhyd â bod y corff hwnnw yn bodloni'r meini prawf cydnabyddiaeth gyffredinol a'r meini prawf cydnabod penodol sy'n gymwys, rhaid i Gymwysterau Cymru gydnabod y corff mewn cysylltiad â'r cymhwyster penodol hwnnw.

Adran 10: Pŵer i wneud rheolau ynghylch ceisiadau am gydnabyddiaeth

23. Mae'r adran hon yn galluogi Cymwysterau Cymru i nodi'r rheolau y mae angen i gyrff dyfarnu eu dilyn wrth wneud eu cais am gydnabyddiaeth i Gymwysterau Cymru. Os yw Cymwysterau Cymru yn gwneud rheolau o'r fath, rhaid iddo eu cyhoeddi. Caniateir i'r rheolau hyn bennu, er enghraifft, y modd y mae rhaid i geisiadau gael eu gwneud ac unrhyw ffioedd sydd i'w talu am gydnabyddiaeth - ar yr amod bod ffi o'r fath wedi ei chynnwys mewn cynllun a gymeradwywyd gan Weinidogion Cymru (o dan adran 44).

Adran 11: Darpariaeth bellach ynghylch cydnabyddiaeth

24. Rhaid i Gymwysterau Cymru roi rhesymau i'r corff dyfarnu os yw cais y corff dyfarnu am gydnabyddiaeth wedi ei wrthod.
25. Mae'r adran hon hefyd yn cyflwyno Atodlen 3 sy'n gwneud darpariaethau pellach ynghylch cydnabyddiaeth.

Adran 12: Cydnabod: dehongli

26. Mae'r adran hon yn esbonio pan fo'r Bil yn cyfeirio at 'corff cydnabyddedig' ei fod yn cyfeirio at gorff sydd naill ai'n cael ei gydnabod yn gyffredinol o dan adran 8 neu, yn ychwanegol, sy'n cael ei gydnabod yn benodol o dan adran 9 mewn cysylltiad â chymhwyster y mae meini prawf cydnabod penodol ar ei gyfer.

RHAN 4: CYMERADWYO CYMWYSTERAU

Adran 13: Dyletswydd i lunio rhestr o gymwysterau blaenoriaethol

27. Mae'r adran hon yn gosod dyletswydd ar Gymwysterau Cymru a Gweinidogion Cymru i lunio rhestr o gymwysterau sy'n flaenoriaeth ar gyfer eu rheoleiddio yng Nghymru. Dim ond os yw'r amod yn is-adran (2) wedi ei fodloni mewn perthynas â chymhwyster y caniateir iddynt gynnwys y cymhwyster ar y gofrestr. Bydd y cymwysterau hynny yn cael eu cyhoeddi mewn 'rhestr o gymwysterau blaenoriaethol' a chaniateir iddi gael ei ddiwygio o bryd i'w gilydd, ar yr amod bod Cymwysterau Cymru a Gweinidogion Cymru yn cytuno. Caniateir i gymwysterau gael eu rhestru naill ai'n unigol, neu drwy gyfeirio at ddisgrifiad sy'n cynnwys mwy nag un cymhwyster.
28. Mae swyddogaethau Cymwysterau Cymru mewn perthynas â chymeradwyo cymwysterau (a nodir yn Rhan 4) yn amrywio yn ôl pa un a yw cymhwyster ar y rhestr ai peidio.
29. Mae is-adran 6 yn cyflwyno'r termau 'cymwysterau blaenoriaethol', 'cymhwyster blaenoriaethol cyfyngedig' a 'cymhwyster blaenoriaethol anghyfyngedig' - y cyfeirir atynt yn adrannau dilynol y Bil.

Adran 14: Cymwysterau blaenoriaethol cyfyngedig

30. Mae'r adran hon yn rhoi i Gymwysterau Cymru y pŵer i benderfynu y dylai rhai cymwysterau ar y rhestr o gymwysterau blaenoriaethol gael eu cyfyngu i uchafswm nifer y fersiynau neu 'ffurfiau' y caniateir eu cymeradwyo gan Gymwysterau Cymru ar unrhyw un adeg. Er enghraifft, caiff Cymwysterau Cymru benderfynu nad yw ond yn bwriadu cymeradwyo un fersiwn o TGAU Iaith Saesneg. Yn yr achos hwn byddai'n gwneud penderfyniad o dan yr adran hon a byddai'r cymhwyster hwn yn dod yn gymhwyster cyfyngedig.
31. Dim ond os yw Cymwysterau Cymru wedi ei fodloni bod y cyfyngiad a fwriedir yn ddymunol, yng ngoleuni ei brif nod a'r amcanion a ganlyn, y caiff wneud penderfyniad o'r fath:
- a. osgoi anghysondeb rhwng ffurfiau gwahanol ar gymhwyster penodol, a

- b. galluogi Cymwysterau Cymru i arfer dewis rhwng cyrff dyfarnu a all fod am ddatblygu ffurf newydd ar gymhwyster neu rhwng ffurfiau gwahanol ar gymwysterau sy'n cael eu cyflwyno i'w cymeradwyo.
32. Cyn gwneud a chyhoeddi penderfyniad i gyfyngu ar nifer y ffurfiau a gymeradwywyd ar gymhwyster, rhaid i Gymwysterau Cymru hysbysu pob corff dyfarnu cydnabyddedig ac unrhyw bartion eraill y mae Cymwysterau Cymru yn credu y gall fod ganddynt fuddiant yn y cynnig ac ystyried unrhyw ymatebion y mae'n eu cael oddi wrth y personau hynny sy'n ymwneud â'r cynigion.
33. Unwaith y bydd Cymwysterau Cymru wedi cyhoeddi penderfyniad i gyfyngu cymhwyster i uchafswm, yna rhaid iddo sicrhau nad oes mwy nag uchafswm y ffurfiau ar y cymhwyster yn cael eu cymeradwyo. Caiff Cymwysterau Cymru ymrwymo i drefniadau gyda chorff dyfarnu er mwyn i'r corff dyfarnu ddatblygu'r cymhwyster (mae adrannau 15 ac 16 yn cyfeirio at hynny) neu drwy ddedol o unrhyw ffurfiau ar gymhwyster a gyflwynir gan gyrff dyfarnu (mae adran 17 yn cyfeirio at hynny). Nid yw penderfyniad o dan yr adran hon yn effeithio'n uniongyrchol ar unrhyw gymeradwyaethau sy'n bodoli i'r ffurf ar gymhwyster o dan sylw. Fodd bynnag, gall olygu bod Cymwysterau Cymru yn cymryd camau i dynnu cymeradwyaeth yn ôl o dan adran 27.

Adran 15: Pŵer i wneud trefniadau i ddatblygu cymhwyster blaenoriaethol cyfyngedig

34. Mae'r adran hon yn rhoi'r pŵer i Gymwysterau Cymru i ymrwymo i drefniadau gyda chorff dyfarnu er mwyn i'r corff ddatblygu ffurf newydd ar gymhwyster blaenoriaethol cyfyngedig. Mae'r trefniadau hynny wedi eu gwneud gyda golwg ar gyflwyno'r ffurf newydd wedyn i Gymwysterau Cymru i'w chymeradwyo. Rhaid i Gymwysterau Cymru gyhoeddi cynllun sy'n nodi'r weithdrefn ar gyfer gwneud trefniadau o'r fath a rhaid i'r gweithdrefnau fod yn agored, deg ac yn dryloyw. Mae hyn er mwyn sicrhau bod modd cael cystadleuaeth agored, deg a thryloyw i ddedol y corff dyfarnu. Caiff Cymwysterau Cymru ddiwygio'r cynllun o bryd i'w gilydd.
35. Bydd Cymwysterau Cymru yn gallu pennu gofynion ('meini prawf') ar gyfer y cymhwyster sydd i'w ddatblygu. Bydd Cymwysterau Cymru hefyd yn gallu, os yw'n dewis, gwneud taliadau i'r corff/cyrff dyfarnu am y gwaith y mae'r corff/cyrff dyfarnu yn ei wneud o dan y trefniadau hyn. Fodd bynnag, nid oes angen gwneud taliad o reidrwydd.

Adran 16: Cymeradwyo cymhwyster blaenoriaethol cyfyngedig a ddatblygir yn unol â threfniadau adran 15

36. Mae'r adran hon yn rhoi'r pŵer i Gymwysterau Cymru gymeradwyo cymwysterau sydd wedi eu datblygu o ganlyniad i'r trefniadau a nodir yn adran 15. Caiff cyrff dyfarnu sydd wedi eu ddedol o dan y weithdrefn a nodir yn adran 15 ac sydd wedi eu cydnabod, i gyflwyno unrhyw gymhwyster, y maent wedi ei ddatblygu wedi iddynt gael eu ddedol, i Gymwysterau Cymru i'w cymeradwyo. Mae'r adran hon yn galluogi Cymwysterau Cymru i ystyried a phenderfynu ar ba un ai i gymeradwyo'r cymhwyster hwn ai peidio ac wrth wneud hynny, bydd yn cymhwyso ei feini prawf a gyhoeddwyd o dan adran 20. Rhaid bodloni unrhyw ofynion sylfaenol y mae Gweinidogion Cymru wedi eu pennu (gweler adran 21) sy'n berthnasol i'r cymhwyster hwn, cyn y caiff Cymwysterau Cymru gymeradwyo'r cymhwyster. Dim

ond am gyfnod cyfyngedig y caniateir i gymeradwyaeth o dan yr adran hon gael ei rhoi (gweler adran 23(1)).

Adran 17: Cymeradwyo cymhwyster blaenoriaethol cyfyngedig yn absenoldeb trefniadau adran 15

37. Mae'r adran hon yn darparu camau gweithredu amgen (i'r hyn a nodir yn adran 15) er mwyn i Gymwysterau Cymru benderfynu ar ba ffurf neu ffurfiau ar gymhwyster cyfyngedig i'w chymeradwyo neu eu cymeradwyo.
38. Pan fo Cymwysterau Cymru yn dewis peidio â dilyn y llwybr o ddethol corff dyfarnu i ddatblygu cymhwyster cyfyngedig, rhaid i Gymwysterau Cymru benderfynu ar ba ffurf neu ffurfiau ar gymhwyster y bydd yn ei chymeradwyo neu eu cymeradwyo (gan gymhwyso ei feini prawf a gyhoeddwyd o dan adran 20). Yn yr achos hwn rhaid i Gymwysterau Cymru gyhoeddi cynllun, sy'n nodi gweithdrefn agored, deg a thryloyw, ar gyfer penderfynu ar y ffurf neu'r ffurfiau y bydd yn ei chymeradwyo neu eu cymeradwyo. Eto, gwneir hyn er mwyn sicrhau proses gystadleuol, sy'n cyflawni'r nodweddion hynny, i ddethol y cymhwyster/cymwysterau a gymeradwywyd. Caiff Cymwysterau Cymru ddiwygio'r cynllun o bryd i'w gilydd.
39. Rhaid bodloni unrhyw ofynion sylfaenol y mae Gweinidogion Cymru wedi eu pennu (gweler adran 21) sy'n berthnasol i'r cymhwyster hwn, cyn y caiff Cymwysterau Cymru gymeradwyo'r cymhwyster. Dim ond am gyfnod cyfyngedig y caniateir i gymeradwyaeth o dan yr adran hon gael ei rhoi (gweler adran 23(2)).

Adran 18: Cymeradwyo cymwysterau blaenoriaethol anghyfyngedig

40. Pan nad fo cymhwyster ar y rhestr o gymwysterau blaenoriaethol yn gyfyngedig, caiff unrhyw gorff dyfarnu a gydnabyddir yn briodol gyflwyno ffurf ar y cymhwyster hwn i Gymwysterau Cymru i'w chymeradwyo.
41. Mae'r adran hon yn gosod dyletswydd ar Gymwysterau Cymru i ystyried pa un ai i gymeradwyo ceisiadau cymwys am gymwysterau ar y rhestr o gymwysterau blaenoriaethol. Wrth ystyried cymhwyster blaenoriaethol anghyfyngedig i'w gymeradwyo, rhaid i Gymwysterau Cymru gymhwyso ei feini prawf a gyhoeddwyd o dan adran 20.
42. Wrth benderfynu pa un ai i gymeradwyo ai beidio, rhaid i Gymwysterau Cymru ystyried pa un a ymdriniwyd ag unrhyw ofynion sylfaenol perthnasol a bennwyd gan Weinidogion Cymru (mewn perthynas â gwybodaeth, sgiliau a dealltwriaeth) (gweler adran 21) gan unrhyw ffurf ar y cymhwyster y mae Cymwysterau Cymru yn bwriadu ei chymeradwyo. Os na fodlonwyd amodau o'r fath, rhaid i Gymwysterau Cymru beidio â chymeradwyo'r ffurf honno ar y cymhwyster.

Adran 19: Cymeradwyo cymwysterau nad ydynt yn gymwysterau blaenoriaethol

43. Mae'r adran hon yn rhoi'r pŵer i Gymwysterau Cymru i ddewis pa un ai i ystyried ai peidio, i'w cymeradwyo, gymwysterau nad ydynt wedi eu rhestru ar y rhestr o gymwysterau blaenoriaethol. Mae'n sefydlu gwahaniaeth rhwng cymwysterau ar y rhestr (y mae rhaid i Gymwysterau Cymru eu hystyried - adran 18 a chymwysterau nad ydynt ar y rhestr (y caiff Cymwysterau Cymru eu hystyried)).

44. Rhaid i Gymwysterau Cymru gyhoeddi 'cynllun' sy'n nodi'r ffactorau y mae'n debygol o'u hystyried wrth benderfynu ar ba un ai i ystyried ceisiadau am gymeradwyaeth i gymwysterau nad ydynt yn gymwysterau blaenoriaethol. O ganlyniad, bydd cyrff dyfarnu a phartion eraill â chanddynt fuddiant yn ymwybodol o broses Cymwysterau Cymru wrth iddo fynd ati i wneud penderfyniad a gellir gwneud penderfyniadau mewn modd tryloyw.
45. Os yw Cymwysterau Cymru yn penderfynu ystyried cymhwyster nad yw'n gymhwyster blaenoriaethol i'w gymeradwyo, rhaid i unrhyw ofynion sylfaenol y mae Gweinidogion Cymru wedi eu pennu (gweler adran 21), sy'n berthnasol i'r cymhwyster, gael eu bodloni cyn y caiff Cymwysterau Cymru gymeradwyo'r cymhwyster. Rhaid i Gymwysterau Cymru gymhwyso ei feini prawf (gweler adran 20) wrth benderfynu pa un ai i gymeradwyo'r cymhwyster.

Adran 20: Meini prawf cymeradwyo

46. Mae'r adran hon yn ei gwneud yn ofynnol i Gymwysterau Cymru gyhoeddi'r meini prawf y mae'n eu ddefnyddio i benderfynu pa un ai i gymeradwyo ffurf ar gymhwyster ai peidio. Caniateir amrywiaeth o feini prawf gwahanol – ar gyfer, er enghraifft, disgrifiadau gwahanol o gymwysterau megis 'pob TGAU' neu 'pob cymhwyster pan fo perfformiad yn cael ei arsylwi mewn amgylchedd gwaith', neu'n fwy penodol ar gyfer 'Ffrangeg Safon Uwch'.
47. Gallai Cymwysterau Cymru ddefnyddio meini prawf cymeradwyo i nodi'r wybodaeth, y sgiliau a'r ddealltwriaeth sy'n ofynnol ar gyfer cymwysterau blaenoriaethol penodol (ac, yn benodol, cymwysterau blaenoriaethol cyfyngedig) ynghyd â gofynion sy'n ymwneud â'r gofynion asesu. Wrth ystyried beth sy'n briodol i gyflawni ei brif nodau, bydd Cymwysterau Cymru hefyd yn gallu ymgysylltu ag, er enghraifft, cyflogwyr, sefydliadau addysg uwch a'r proffesiynau i sicrhau bod y meini prawf yn adlewyrchu eu gofynion rhesymol yn briodol.

Adran 21: Pŵer i bennu gofynion sylfaenol

48. Mae'r adran hon yn rhoi'r pŵer i Weinidogion Cymru i gyhoeddi rheoliadau sy'n nodi gofynion ar gyfer ffurf ar gymhwyster mewn perthynas â'r wybodaeth, y sgiliau a'r ddealltwriaeth ('cynnwys pwnc' i bob pwrpas) y mae'n ofynnol i'r cymhwyster hwnnw ymdrin â hwy.
49. Caiff Cymwysterau Cymru bennu gofynion cynnwys ar gyfer cymwysterau blaenoriaethol drwy'r meini prawf cymeradwyo - ond bydd y pŵer hwn i wneud rheoliadau yn bodoli fel pŵer wrth gefn er mwyn i Weinidogion Cymru ei gwneud yn ofynnol i Gymwysterau Cymru sicrhau bod gofynion penodol wedi eu bodloni.
50. Mae'r Bil yn nodi nifer o amodau y mae rhaid eu bodloni cyn y caiff Gweinidogion Cymru wneud rheoliadau. Mae'r amodau hyn yn sicrhau mai dim ond gyda'r diben o sicrhau bod dysgwyr yn dilyn cwricwlwm priodol y caiff y rheoliadau eu cyflwyno. Nid oes angen i hyn fod yn unrhyw 'cwricwlwm cenedlaethol' sydd wedi ei gyhoeddi o reidrwydd ond rhaid i'r gofynion a nodir mewn rheoliadau ymwneud â'r wybodaeth, y sgiliau a'r ddealltwriaeth y mae rhaid i'r dysgwr eu dangos at y diben o benderfynu pa un a yw'r cymhwyster i gael ei ddyfarnu i berson. Cyn pennu gofynion sylfaenol, rhaid i Weinidogion Cymru ymgynghori â Chymwysterau

Cymru ac eraill, fel y bo'n briodol, gan roi resymau dros gynnig pennu gofynion sylfaenol.

51. Effaith cyflwyno gofynion sylfaenol yw na chaiff Cymwysterau Cymru gymeradwyo ffurf ar y cymhwyster hwnnw oni bai ei fod wedi ei fodloni bod y cymhwyster yn cydymffurfio â'r gofynion a nodir mewn rheoliadau. Rhaid i'r rheoliadau drafft gael eu cymeradwyo gan Gynulliad Cenedlaethol Cymru cyn y gallant gael eu gwneud a dod i rym.

Adran 22: Amodau cymeradwyo

52. Mae'r adran hon yn rhoi'r pŵer i Gymwysterau Cymru i gymhwyso amodau wrth iddo gymeradwyo cymwysterau – naill ai ar yr adeg y mae'r cymwysterau yn cael eu cymeradwyo, neu wedi hynny. Os yw Cymwysterau Cymru yn newid amodau cymeradwyo ar ôl i gymhwyster gael ei gymeradwyo (neu'n cyflwyno rhai newydd sy'n gymwys i gymhwyster a gymeradwywyd) rhaid iddo hysbysu cyrff dyfarnu am y newid, y dyddiad y bydd yn cael effaith a'r rheswm dros y newid. Mae hyn er mwyn sicrhau, er enghraifft, bod cyrff dyfarnu yn cael amser rhesymol i ddiwygio eu cymwysterau, os yw'n briodol, er mwyn ymdrin â'r amodau newydd neu i wneud cais bod yr amodau newydd neu'r amrywiadau yn cael eu cymhwyso iddynt mewn ffordd wahanol.

Adran 23: Cyfnod para'r gymeradwyaeth

53. Rhaid i gymwysterau blaenoriaethol cyfyngedig gael eu cymeradwyo am gyfnod cyfyngedig fel y caniateir i gyrff dyfarnu eraill gystadlu i fod yn ddarparwr cymhwyster cyfyngedig ar gyfer pob cyfnod cyfyngedig.
54. Caniateir i gymwysterau blaenoriaethol anghyfyngedig a chymwysterau nad ydynt yn gymwysterau blaenoriaethol gael eu cymeradwyo am gyfnod amhenodol neu am gyfnod cyfyngedig. Pan fo cymeradwyaeth yn cael ei rhoi am gyfnod cyfyngedig, rhaid gwneud hyn yn glir pan fydd y gymeradwyaeth yn cael ei rhoi – a phan roddir hyn, mae'r gymeradwyaeth yn peidio â bod ar ddiwedd y cyfnod hwnnw. I gael manylion am y modd y caniateir i gymeradwyaeth gael ei thynnu'n ôl neu ei hildio, gweler y nodiadau ar gyfer adrannau 25 ac 28.

Adran 24: Rheolau ynghylch ceisiadau am gymeradwyaeth

55. Mae Cymwysterau Cymru yn gallu gwneud rheolau am y modd y mae rhaid i geisiadau am gymeradwyaeth gael eu gwneud, yr hyn y dylai ceisiadau o'r fath ei gynnwys a pha un a oes rhaid talu unrhyw ffi a sut i wneud hynny (ar yr amod bod ffi o'r fath wedi ei chynnwys mewn cynllun a gymeradwywyd gan Weinidogion Cymru o dan adran 44).
56. Os yw Cymwysterau Cymru yn gwneud rheolau, rhaid iddo eu cyhoeddi.

Adran 25: Ildio cymeradwyaeth

57. Caniateir i gorff dyfarnu roi hysbysiad ildio i Gymwysterau Cymru gan ofyn iddo ddileu ei gymeradwyaeth i un neu ragor o ffurfiau ar gymhwyster. Rhaid i'r hysbysiad ildio bennu'r dyddiad y mae'r corff dyfarnu yn dymuno i'r gymeradwyaeth ddod i ben. Rhaid i Gymwysterau Cymru weithredu cyn gynted ag y bo'n resymol ymarferol wrth gydnabod cais o'r fath. Yn y gydnabyddiaeth honno, caiff Cymwysterau Cymru ei gwneud yn ofynnol i gymeradwyaeth i ben ar

ddyddiad gwahanol i'r hyn a awgrymwyd gan y corff dyfarnu, a rhaid iddo roi resymau dros benderfynu bod y gymeradwyaeth yn dod i ben ar y dyddiad hwnnw. Wrth benderfynu a ddylid cadw'r dyddiad a bennwyd gan y corff dyfarnu neu a ddylid gosod dyddiad gwahanol, rhaid i Gymwysterau Cymru roi sylw i'r angen i osgoi effaith andwyol ar ddysgwyr ac i ddymuniad y corff dyfarnu i'r gymeradwyaeth ddod i ben ar y dyddiad y mae wedi ei bennu.

Adran 26: Darpariaeth drosiannol mewn cysylltiad ag ildio cymeradwyaeth

58. Mae'r adran hon yn caniatáu i'r gydnabyddiaeth o ildio a roddir gan Gymwysterau Cymru o dan adran 25 ddarparu ar gyfer cyfnod estyn o'r dyddiad y mae cymeradwyaeth wedi ei hildio ar ei ôl (y dyddiad ildio) hyd ddyddiad diweddarach (y dyddiad estyn). Yn ystod y cyfnod hwnnw, mae'r ffurf ar gymhwyster yn parhau i gael ei thrin fel un sydd wedi ei chymeradwyo, ond dim ond at y dibenion a bennir yn y gydnabyddiaeth o ildio. Dim ond os yw Cymwysterau Cymru yn ei ystyried yn briodol i osgoi effaith andwyol ar ddysgwyr y mae modd gwneud hyn.

Adran 27: Tynnu cymeradwyaeth yn ôl

59. Diben yr adran hon yw galluogi Cymwysterau Cymru i roi terfyn ar ei gymeradwyaeth i ffurf ar gymhwyster drwy dynnu'r gymeradwyaeth yn ôl. Y rhesymau dros dynnu cymeradwyaeth yn ôl yw bod Cymwysterau Cymru wedi ei fodloni:
- a) nad yw'r corff dyfarnu wedi cydymffurfio ag amod cymeradwyo. Gallai hyn ddigwydd, er enghraifft, os yw'r corff dyfarnu yn methu â chydymffurfio â'r amodau a nodwyd ar adeg rhoi'r gymeradwyaeth neu'n eu hepgor, neu os yw'r amodau cymeradwyo (megis gofynion gwybodaeth) yn newid a bod y cymhwyster yn peidio â chydymffurfio â'r amodau mwyach (yn yr achos hwn gallai corff dyfarnu fwriadu cyflwyno cymhwyster yn ei le i'w gymeradwyo);
 - b) nad yw'r corff dyfarnu sy'n cynnig y ffurf honno ar gymhwyster bellach yn cael ei gydnabod fel corff dyfarnu gan Gymwysterau Cymru (mewn cysylltiad â'r ffurf honno ar y cymhwyster);
 - c) bod Cymwysterau Cymru wedi penderfynu bod y ffurf ar gymhwyster yn 'cymhwyster blaenoriaethol cyfyngedig'.
60. Mae'r adran hon yn nodi'r hyn y mae rhaid i Gymwysterau Cymru ei wneud i dynnu cymeradwyaeth yn ôl. Mae'r rhain yn cynnwys dyletswyddau i Gymwysterau Cymru:
- a) hysbysu'r corff dyfarnu am fwriad Cymwysterau Cymru i ddyroddi hysbysiad tynnu'n ôl, gan esbonio pam y mae'n bwriadu tynnu'r gymeradwyaeth yn ôl a'r amserlen arfaethedig ar gyfer ei benderfyniad; a
 - b) ystyried unrhyw ymateb a ddarparwyd gan y corff dyfarnu.
61. Rhoddir hefyd y pŵer i Gymwysterau Cymru i amrywio'r dyddiad tynnu'n ôl, cyhyd â bod y corff dyfarnu yn cydsynio i'r amrywiad hwnnw. Gallai amrywiad alluogi Cymwysterau Cymru i ystyried yr amser y mae ei angen i ddatblygu cymwysterau yn lle'r cymwysterau sy'n bodoli ac i estyn yr amser hwnnw os oes oedi, er enghraifft.

62. Wrth benderfynu ar ddyddiad i dynnu cymeradwyaeth yn ôl neu ar amrywiad i'r dyddiad hwnnw, rhaid i Gymwysterau Cymru roi sylw i'r angen i osgoi effaith andwyol ar ddysgwyr.

Adran 28: Darpariaeth drosiannol mewn cysylltiad a thynnu cymeradwyaeth yn ôl

63. Caiff Cymwysterau Cymru wneud trefniadau i barhau i drin cymhwyster sydd wedi ei dynnu'n ôl fel pe bai wedi ei gymeradwyo, am amser penodedig ac at ddibenion penodedig er mwyn effaith andwyol ar ddysgwyr.

RHAN 5: DARPARIAETH BELLACH SY'N BERTHNASOL I GYDNABOD A CHYMERADWYO

Adran 29: Cyfyngu ar gyllido a darparu cyrsiau penodol

64. Diben yr adran hon yw gosod cyfyngiad ar gyllid cyhoeddus ar gyfer cyrsiau addysg neu hyfforddiant ar gyfer dysgwyr o dan 19 oed, os yw'r cyrsiau hynny yn arwain at gymwysterau. Pan fo'r cyrsiau hynny yn cael eu cyllido gan Weinidogion Cymru, gan awdurdodau lleol neu'n cael eu darparu gan (neu ar ran) ysgol a gynhelir, rhaid dewis y cymwysterau o blith y rheini sy'n fersiynau Cymreig o'r cymhwyster. Mae fersiwn Gymreig o gymhwyster yn ffurf ar gymhwyster a ddyfernir yn unol â'i chymeradwyo gan Gymwysterau Cymru i'w dyfarnu yng Nghymru. Mae hyn yn golygu bod rhaid i'r cymhwyster gael ei ddyfarnu yng Nghymru (er nad oes angen i'r cwrs sy'n arwain ato fod yng Nghymru o reidrwydd) a'i reoleiddio gan Gymwysterau Cymru. Mewn achos pan fo ysgol a gynhelir yn darparu'r cwrs, rhaid i'r awdurdod lleol a'r corff llywodraethu sicrhau eu bod yn glynu wrth y cyfyngiad hwn.
65. Mae eithriad penodol i'r cyfyngiad hwn ar gyfer unrhyw gwrs sy'n cael ei ddarparu i berson sydd ag anawsterau dysgu. Nid yw'r eithriad hwn ond yn ymwneud â'r cwrs mewn perthynas â'r person(au) sydd ag anawsterau dysgu ac nid yw'n darparu eithriad mewn perthynas â dysgwyr eraill ar y cwrs hwnnw. Mae'r eithriad hwn yn gymwys pan fo cyrff awdurdodedig yn cyllido cyrsiau ar gyfer dysgwyr sydd ag anawsterau dysgu, pa un a yw'r cwrs yn cael ei ddarparu yng Nghymru neu'r tu allan iddi. Fodd bynnag, nid yw'n rhoi'r pŵer i gyrff awdurdodedig i gyllido dysgwyr sydd ag anawsterau dysgu ar gyrsiau am fod hyn yn dibynnu ar eu pwerau i wneud hynny. Mae adran 52 yn diffinio ystyr person ag anhawster dysgu at ddibenion y Bil hwn.
66. Mae'r ddarpariaeth yn rhoi'r pŵer i Weinidogion Cymru i wneud eithriadau pellach i'r cyfyngiad hwn - naill ai ar gyfer rhai cyrsiau penodol (er enghraifft ar gyfer cyrsiau mewn pwnc y mae galw cymharol fach amdano ac felly efallai nad oes cymhwyster wedi ei gymeradwyo gan Gymwysterau Cymru), neu ar gyfer amgylchiadau penodol eraill neu achosion penodol a all godi. Er enghraifft, gallai fod yn rhesymol gwneud eithriad mewn perthynas â dysgwr y mae cyflogaeth ei riant/rhieni wedi ei throsglwyddo i Gymru, yn agos iawn at ddiwedd ei gwrs, er mwyn galluogi'r dysgwr i orffen y cwrs ac felly i gymryd y cymhwyster y mae wedi ei baratoi ar ei gyfer. Gwneir yr eithriad gan Weinidogion Cymru drwy ddyfarnu'r cwrs (yn ysgrifenedig).

67. Nid yw'r ddarpariaeth hon yn darparu i Weinidogion Cymru sefydlu llwybr amgen ar gyfer cymeradwyo cymwysterau - ei effaith yw y caiff cyrff awdurdodedig gyllido dysgwyr (sydd o dan 19 oed) ar gwrs o fewn y dynodiad, er ei fod yn arwain at ffurf ar gymhwyster nad yw wedi ei chymeradwyo gan Gymwysterau Cymru.
68. Fel arall, nid yw'r Bil yn cyfyngu ar y cymwysterau y caniateir eu defnyddio ar gyrsiau. Er enghraifft, gallai ysgol annibynnol yng Nghymru ddarparu cyrsiau sy'n arwain at ffurfiau ar gymhwyster nad ydynt yn fersiynau Cymreig o'r cymhwyster.

Adrannau 30 ac 31: Amlinellu rolau Cymwysterau Cymru ac Ofqual

69. Diben y darpariaethau hyn yw osgoi bod ffurf ar gymhwyster yn cael ei rheoleiddio ar yr un pryd gan Gymwysterau Cymru ac Ofqual. Ofqual sy'n rheoleiddio'r cymwysterau a ddyfernir yn Lloegr, fel y darperir ar ei gyfer yn Neddf Prentisiaethau, Sgiliau, Plant a Dysgu 2009. Mae swyddogaethau Ofqual yn debyg i swyddogaethau Cymwysterau Cymru. Caniateir i gorff dyfarnu gael ei gydnabod gan Ofqual a chan Gymwysterau Cymru o dan y priod gyfundrefnau deddfwriaethol.
70. Mae adran 30 yn rhwystro unrhyw amodau cydnabod a osodir gan Ofqual rhag bod yn gymwys i ddyfarnu fersiwn Gymreig o gymhwyster yng Nghymru (sef pan fo dysgwyr yn cael eu hasesu yn gyfan gwbl neu'n bennaf yng Nghymru). Mae fersiwn Gymreig o gymhwyster wedi ei diffinio yn adran 29(11) ac yn ffurf ar gymhwyster a ddyfernir yn unol â'i chymeradwyo gan Gymwysterau Cymru i'w dyfarnu yng Nghymru (felly rhaid iddi gael ei dyfarnu yng Nghymru a'i rheoleiddio gan Gymwysterau Cymru). Dim ond amodau (cydnabod ac unrhyw amodau cymeradwyo) a osodir gan Gymwysterau Cymru sy'n gymwys o dan yr amgylchiadau hyn. Mae hyn er mwyn osgoi anhawster posibl o ran gwrthdaro rhwng amodau neu'r dull o reoleiddio'r ffurf ar y cymhwyster. Nid yw'n effeithio ar gymhwysu amodau cydnabod (os oes rhai) a osodir gan Ofqual i ddyfarnu yng Nghymru ffurfiau ar gymhwyster nad ydynt yn fersiynau Cymreig o'r cymhwyster.
71. Yn yr un modd, o dan adran 31, ni fydd amodau cydnabod a osodir gan Gymwysterau Cymru yn gymwys mewn perthynas â dyfarnu (ble bynnag y mae'n digwydd) ffurf ar gymhwyster nad yw'n fersiwn Gymreig o'r cymhwyster.
72. Nid yw hyn yn effeithio ar argaeledd yng Nghymru ffurfiau ar gymwysterau nad ydynt yn fersiynau Cymreig o gymhwyster (er enghraifft, cymwysterau a reoleiddir gan Ofqual) o dan amgylchiadau pan na fo'r cyfyngiad yn adran 29 yn gymwys. Er enghraifft, caiff ysgolion annibynnol ddewis cynnig ffurf ar gymhwyster a achredwyd gan Ofqual yn hytrach na ffurf ar y cymhwyster a gymeradwywyd gan Gymwysterau Cymru. O dan yr amgylchiadau hyn, ni fyddai Cymwysterau Cymru yn rheoleiddio'r ffurf ar gymhwyster a achredwyd gan Ofqual.

RHAN 6: GORFODI

Adran 32: Pŵer i roi cyfarwyddydau

73. Diben yr adran hon yw galluogi Cymwysterau Cymru i'w gwneud yn ofynnol i gorff dyfarnu gymryd camau (neu beidio â chymryd camau), drwy ddyroddi cyfarwyddyd ysgrifenedig i'r corff dyfarnu hwnnw. Dim ond pe bai Cymwysterau Cymru yn barnu bod y corff dyfarnu wedi methu â chydymffurfio, neu'n debygol o

fethu â chydymffurfio, ag un neu ragor o'r amodau cydnabod a/neu un neu ragor o'r amodau cymeradwyo (sy'n gymwys, yn eu trefn, i gydnabyddiaeth y corff neu i gymhwyster a gymeradwywyd a ddyfernir ganddo) y gallai cyfarwyddyd gael ei ddyroddi. Rhaid i unrhyw gamau y mae Cymwysterau Cymru yn eu gwneud yn ofynnol (neu'n eu gwahardd) drwy'r cyfarwyddyd fod at y diben o sicrhau bod y corff dyfarnu yn cydymffurfio â'r amod.

74. Rhaid i Gymwysterau Cymru roi hysbysiad i'r corff dyfarnu os yw'n bwriadu dyroddi cyfarwyddyd a rhaid iddo roi i'r corff dyfarnu y rhesymau dros y cyfarwyddyd arfaethedig a phennu pryd y mae'n bwriadu gwneud y penderfyniad. Mae hyn er mwyn sicrhau y gall y corff dyfarnu gyflwyno sylwadau cyn yr amser hwnnw ac os yw'n gwneud hynny, rhaid i Gymwysterau Cymru eu hystyried. Os yw Cymwysterau Cymru, ar ôl ystyried unrhyw sylwadau, yn bwrw ati i ddyroddi cyfarwyddyd, rhaid iddo wneud hynny yn ysgrifenedig a rhaid i'r corff dyfarnu gydymffurfio ag ef. Pe bai angen i Gymwysterau Cymru wedi hynny orfodi'r cyfarwyddyd, caiff wneud cais i'r Llys am orchymyn mandadol a fyddai, pe bai'n cael ei ganiatáu, yn gwneud cydymffurfedd yn ofynnol.
75. Wrth arfer y pŵer hwn, rhaid i Gymwysterau Cymru roi sylw i'r egwyddorion sy'n ymwneud â gweithgareddau rheoleiddiol a nodir yn adran 49. Ni fyddai'r pŵer hwn yn rhagwahardd Cymwysterau Cymru rhag ceisio ymdrin ag unrhyw bryderon o ran methiannau posibl i gydymffurfio ag amodau drwy drafodaethau gyda chyrff dyfarnu.

Adrannau 32 i 35: Cosbau ariannol

76. Diben yr adrannau hyn yw:
- a) galluogi i Gymwysterau Cymru i osod cosb ariannol ar gorff dyfarnu a nodi'r gofynion mewn perthynas â rhoi hysbysiad am gosb o'r fath;
 - b) darparu i Weinidogion Cymru wneud rheoliadau ar sut i benderfynu ar y swm i'w dalu;
 - c) galluogi cyrff dyfarnu i apelio i'r Tribiwnlys Haen Gyntaf yn erbyn cosb o'r fath;
 - d) galluogi Cymwysterau Cymru i adennill llog ar unrhyw ran o'r gosb sydd heb ei thalu erbyn amser penodol.
77. Wrth arfer ei holl swyddogaethau sy'n ymwneud â chosbau ariannol, mae gan Gymwysterau Cymru ddyletswydd i gydymffurfio â'r egwyddorion yn adran 49. O dan adran 42 rhaid i Gymwysterau Cymru nodi yn ei ddatganiad o bolisi yr amgylchiadau pan fo'n debygol o osod cosb o'r fath a'r ffactorau y bydd yn eu hystyried wrth benderfynu ar y swm i'w osod.
78. Os yw'n ymddangos i Gymwysterau Cymru fod corff dyfarnu wedi methu â chydymffurfio ag amod o ran ei gydnabod neu unrhyw gymeradwyaeth i gymhwyster, caiff osod cosb ariannol.
79. O ran y pŵer i wneud cyfarwyddydau, rhaid i Gymwysterau Cymru yn gyntaf roi hysbysiad i'r corff dyfarnu am ei fwriad i osod cosb ariannol, gan roi ei resymau, gan bennu'r swm arfaethedig a'r cyfnod y mae Cymwysterau Cymru yn bwriadu gwneud ei benderfyniad pan ddaw i ben. Mae hyn er mwyn rhoi cyfle i'r corff

dyfarnu gyflwyno sylwadau. Yn yr achos hwn, rhaid darparu ar gyfer isafswm cyfnod o 28 o ddiwrnodau (gan ddechrau o'r dyddiad yr anfonir yr hysbysiad).

80. Os yw Cymwysterau Cymru yn penderfynu, ar ôl iddo ystyried unrhyw sylwadau, osod cosb ariannol, rhaid iddo nodi hyn mewn hysbysiad ysgrifenedig pellach, gan bennu'r swm, y cyfnod y mae rhaid i'r taliad gael ei wneud ynddo (rhaid iddo beidio â bod yn llai nag 28 o ddiwrnodau sy'n dechrau â dyddiad yr hysbysiad) a nodi'r wybodaeth o ran y seiliau drosto, y modd y caniateir i'r taliad gael ei wneud, hawliau apelio a chanlyniadau peidio â thalu.
81. Bydd rheoliadau a wneir gan Weinidogion Cymru yn nodi'r gofynion o ran y modd y mae'r swm i gael ei gyfrifo. Mae'r rheoliadau hyn yn ddarostyngedig i'r weithdrefn gadarnhaol. Yn ddarostyngedig i'r cyfyngiadau a osodir gan y rheoliadau hynny, caiff Cymwysterau Cymru benderfynu ar swm y gosb, er fod rhaid ei fod wedi nodi'r ffactorau y mae'n debygol o'u hystyried wrth benderfynu ar y swm hwnnw yn ei ddatganiad polisi (adran 43).
82. Caiff corff dyfarnu apelio i'r Tribiwnlys Haen Gyntaf yn erbyn penderfyniad i osod cosb ariannol (ar y seiliau a nodir yn is-adran (2)) neu yn erbyn penderfyniad ar swm y gosb. Mae llog hefyd yn daladwy ar unrhyw swm o gosb ariannol nad yw wedi ei dalu ar ôl y "dyddiad cymwys", y darperir ar ei gyfer yn adran 35(2) (ac eithrio ar gyfer unrhyw gyfnod pan fo'r gofyniad i dalu wedi ei atal dros dro). Y gyfradd llog yw'r hyn a bennir yn adran 17 o Deddf Dyfarniadau 1838. Ni chaniateir i gyfanswm y llog fod yn fwy na swm y gosb.

Adrannau 36 i 38: Adennill costau ar gyfer gosod sancsiynau

83. Diben yr adrannau hyn yw galluogi Cymwysterau Cymru i adennill costau yr aed iddynt mewn cysylltiad â gosod sancsiwn. Caniateir mynd i gostau naill ai drwy roi cyfarwyddyd (adran 32), gosod cosb ariannol (adran 33) neu am dynnu cydnabyddiaeth yn ôl (paragraff 19 o Atodlen 3).
84. Mae adran 36 yn disgrifio'r math o gostau y caniateir iddynt gael eu hadennill ac mae'n pennu'r modd y gall Cymwysterau Cymru ei gwneud yn ofynnol i gostau gael eu hadennill a'r manylion sydd i'w darparu i'r corff dyfarnu.
85. Mae adran 37 yn rhoi'r pŵer i gyrff dyfarnu i apelio i'r Tribiwnlys Haen Gyntaf yn erbyn penderfyniad gan Gymwysterau Cymru i adennill costau neu o ran swm y costau.
86. Mae adran 38 yn darparu i log Gronni ar unrhyw swm o gostau nad yw wedi ei dalu ar ddiwedd y cyfnod sy'n gorffen â'r "dyddiad cymwys" fel y'i diffinnir yn adran 38(2) (ac eithrio ar gyfer unrhyw gyfnod pan fo'r gofyniad i dalu yn cael ei atal dros dro). Rhaid i gyfanswm y llog beidio â bod yn fwy na swm y costau.

Adran 39: Mynd i mewn i fangre a'i harolygu

87. Mae'r adran hon yn galluogi Cymwysterau Cymru i wneud cais i ynad am orchymyn i'w alluogi i fynd i mewn i fangre corff dyfarnu i arolygu cofnodion, dogfennau a gweithrediad dyfeisiau electronig. Dim ond aelod o staff sydd wedi ei awdurdodi gan Gymwysterau Cymru at ddibenion yr adran hon a gaiff wneud cais i'r ynad. Dim ond os yw'r ynad wedi ei fodloni bod y gofynion yn is-adrannau (3) i

(5) wedi eu bodloni y gellir gwneud gorchymyn. Os roddir gorchymyn, caiff aelod awdurdodedig o staff Cymwysterau Cymru, ynghyd â swyddog heddlu, fynd i mewn i'r fangre at y diben o ganfod a yw amod cydnabod neu gymeradwyo, y mae'r corff dyfarnu, neu ei ffurf ar gymhwyster, yn ddarostyngedig iddo, wedi ei dorri. Caiff y person awdurdodedig a'r swyddog heddlu wneud amryw bethau (a restrir yn is-adran (6)) at y diben hwnnw. Os oes angen i'r swyddog heddlu ddefnyddio grym i alluogi i'r pŵerau gael eu harfer, yna caniateir hynny.

RHAN 7: ATODOL

Adran 40: Darparu gwasanaethau etc gan Gymwysterau Cymru

88. Mae Cymwysterau Cymru wedi ei alluogi i ddarparu gwasanaethau ymgynghori neu wasanaethau eraill ar sail fasnachol ac i godi ffioedd am hyn. Caiff Cymwysterau Cymru ddatblygu arbenigedd mewn perthynas â chymwysterau a allai fod o werth masnachol. Yn wahanol i unrhyw ffioedd i'w codi am ei swyddogaethau rheoleiddiol, y mae'n ofynnol cael cymeradwyaeth Gweinidogion Cymru ymlaen llaw ar gyfer cynllun o'r fath (gweler adran 44), bydd Cymwysterau Cymru yn gallu pennu ei raddfa ffioedd ei hun ar gyfer gweithgareddau masnachol heb gyfeirio at Weinidogion Cymru.
89. Mae'n bosibl y bydd yn hwylus i Gymwysterau Cymru ddarparu gwasanaethau o'r fath drwy gwmni. Mae'r adran hon yn caniatáu i Gymwysterau Cymru ddarparu'r gwasanaethau drwy gwmni a berchenogir yn gyfan gwbl, yn ddarostyngedig i gymeradwyaeth Gweinidogion Cymru.

Adran 41: Adolygu ac ymchwil

90. Mae'r adran hon yn galluogi Cymwysterau Cymru i adolygu cyrff dyfarnu cydnabyddedig a dyfarnu cymwysterau a gymeradwywyd yn barhaus, ynghyd â chynnal unrhyw adolygiadau eraill sy'n ymwneud â chymwysterau sy'n cael eu dyfarnu yng Nghymru. Er enghraifft, caiff Cymwysterau Cymru gynnal adolygiad o brosesau sicrhau ansawdd corff dyfarnu cydnabyddedig penodol, neu caiff benderfynu adolygu'r prosesau ar gyfer cyflenwi asesiadau ar-lein yn yr holl gyrff dyfarnu y mae'n eu cydnabod. Mewn perthynas â chymwysterau a gymeradwywyd, caiff Cymwysterau Cymru, er enghraifft, benderfynu adolygu ffurf ar gymhwyster Biolog TGAU un corff dyfarnu, neu caiff benderfynu, er enghraifft, adolygu pob cymhwyster a gymeradwywyd ar lefel benodol yn Fframwaith Credydau a Chymwysterau Cymru (megis Lefel Mynediad neu Lefel 1).
91. Mae'r adran hon yn ei gwneud yn ofynnol i Gymwysterau Cymru adolygu ei rôl ei hun a rôl cyrff dyfarnu yn gyson. Caniateir i'r ddyletswydd hon gwmpasu'r gwaith o ystyried a ddylai ddod yn gorff dyfarnu ac ym mha ffordd, mewn amser.
92. Mae'r adran hon hefyd yn rhoi'r pŵer i Gymwysterau Cymru i wneud neu i gomisiynu gwaith ymchwil, pa un ai ynghylch cymwysterau yng Nghymru neu ynghylch testunau sy'n gysylltiedig â'r cymwysterau hynny. Caiff Cymwysterau Cymru ddefnyddio ei staff ei hun i wneud y gwaith ymchwil hwn, neu caiff ofyn i eraill ei wneud ar ei ran.

Adran 42: Datganiadau polisi

93. Rhaid i Gymwysterau Cymru gyhoeddi gwybodaeth sy'n nodi sut y bydd yn mynd ati i gyflawni ei swyddogaethau rheoleiddiol allweddol. Diben y datganiad polisi yw gwneud y ffordd y mae Cymwysterau Cymru yn cyflawni ei swyddogaethau rheoleiddiol yn dryloyw i'r rheini y maent yn effeithio arnynt a'r cyhoedd yn gyffredinol. Rhaid i'r datganiad gynnwys gwybodaeth am y materion a restrir yn is-adran (2), gan y gallai'r materion hyn gael effaith sylweddol ar gyrff dyfarnu a'r modd y maent yn cynnal eu busnes.
94. Rhaid i Gymwysterau Cymru hefyd lunio datganiad am yr amgylchiadau, a'r modd, y mae'n bwriadu cynnal ymgyngoriad. Nid yw hyn yn gyfyngedig i ymgyngoriadau ysgrifenedig, a byddai hefyd yn cwmpasu ffurfiau eraill ar ryngweithio ag eraill gyda golwg ar gael eu safbwyntiau.
95. Oherwydd y caiff Cymwysterau Cymru newid ei bolisiau o bryd i'w gilydd, mae'n bosibl y bydd angen i'r datganiadau hyn gael eu diwygio i adlewyrchu newidiadau o'r fath. Rhaid cyhoeddi'r datganiad cyntaf ac unrhyw ddatganiadau diwygiedig dilynol.

Adran 43: Cwynion

96. Rhaid i Gymwysterau Cymru gyhoeddi gwybodaeth sy'n nodi'r ffyrdd y bydd yn ymdrin â chwynion y mae'n eu cael, pa un a ydynt am arfer ei swyddogaethau ei hun, am weithgareddau corff dyfarnu cydnabyddedig (sy'n berthnasol i'w gydnabyddiaeth), neu'n benodol mewn perthynas â dyfarnu cymhwyster a gymeradwywyd. Mae'r Bil yn ei gwneud yn ofynnol i Gymwysterau Cymru benderfynu ar ba weithdrefnau y bydd yn eu dilyn pan ddigwydd unrhyw un neu ragor o'r mathau hyn o gwynion, a chyhoeddi'r gweithdrefnau hyn. Caniateir i'r gweithdrefnau fod yn wahanol yn unol â'r math o gwyn. Caiff Cymwysterau Cymru benderfynu, unwaith y mae wedi ymdrin â chwyn hyd at bwynt penodol, fod angen atgyfeirio'r gwyn at drydydd parti annibynnol. Mae'r Bil yn diffinio 'annibynnol' fel rhywun nad yw'n aelod o Fwrdd Cymwysterau Cymru nac ychwaith yn aelod o'i staff (neu, mewn achos pan fo'r person annibynnol yn gorff, os nad oes unrhyw un o'i aelodau yn aelod o Gymwysterau Cymru nac yn aelod o staff Gymwysterau Cymru).

Adran 44: Cynllun codi ffioedd

97. Os yw Cymwysterau Cymru yn dymuno codi ffioedd am rai o'i weithgareddau rheoleiddiol, rhaid iddo yn gyntaf lunio rhestr o'r ffioedd arfaethedig mewn perthynas â chostau Cymwysterau Cymru mewn cynllun sydd i'w gymeradwyo gan Weinidogion Cymru. Y swyddogaethau rheoleiddiol y caiff cynllun osod ffioedd ar eu cyfer yw'r rheini a restrir yn is-adran (1), nad ydynt yn cwmpasu'r swyddogaethau gorfodi yn Rhan 5 (mae pŵer penodol yn adran 36 i Gymwysterau Cymru adennill costau mewn cysylltiad â gosod sancsiynau). Dim ond yn unol â'r cynllun y caiff Cymwysterau Cymru godi ffioedd.

Adran 45: Grantiau

98. Mae'r adran hon yn galluogi Cymwysterau Cymru i wneud grantiau a gosod amodau ar y grantiau hyn, cyhyd â'i fod yn ystyried ei bod yn briodol gwneud hynny mewn cysylltiad ag unrhyw un neu ragor o'i swyddogaethau.

Adran 46: Darparu gwybodaeth neu gyngor

99. Mae'r adran yn ei gwneud yn ofynnol i Gymwysterau Cymru ddarparu gwybodaeth a chyngor ar faterion sy'n ymwneud â'u swyddogaethau i Weinidogion Cymru, fel y maent yn gofyn amdanynt.

Adran 47: Cydweithio

100. Mae'r adran hon yn galluogi Cymwysterau Cymru i weithio gydag eraill, cyhyd â'i fod yn ystyried ei bod yn briodol gwneud hynny mewn cysylltiad â'i swyddogaethau ei hun. Er enghraifft, efallai y bydd Cymwysterau Cymru am gydweithio â rheoleiddwyr cymwysterau eraill y DU ar rai materion.

Adran 48: Dyletswydd i roi sylw i bolisi llywodraeth a materion eraill

101. Mae'r ddarpariaeth hon yn galluogi Gweinidogion Cymru i ddyroddi cyfarwyddyd i Gymwysterau Cymru gan nodi y dylai roi sylw i un neu ragor o bolisiau'r llywodraeth a materion eraill o'r fath a bennir yn y cyfarwyddyd. Rhaid i unrhyw gyfarwyddyd o'r fath gael ei gyhoeddi a chaniateir iddo gael ei amrywio neu ei ddirymu.

Adran 49: Cyflawni gweithgareddau rheoleiddiol gan Gymwysterau Cymru

102. Mae'r ddarpariaeth hon yn ei gwneud yn ofynnol i Gymwysterau Cymru, wrth iddo gyflawni'r swyddogaethau rheoleiddiol a restrir yn is-adran (1), fabwysiadu egwyddorion rheoleiddio da megis tryloywder, atebolrwydd, cymesuredd a chysondeb.

RHAN 8: CYFFREDINOL

Adran 50: Rheoliadau

103. Mae'r adran hon yn nodi bod y tair set o reoliadau y cyfeirir atynt yn is-adran (2) i'w gwneud drwy offeryn statudol yn dilyn y weithdrefn gadarnhaol sy'n ei gwneud yn ofynnol i Gynulliad Cenedlaethol Cymru eu cymeradwyo cyn y gallant ddod i rym. Mae'r pwerau i wneud y rheoliadau y cyfeirir atynt yn cael eu darparu yn adrannau 21 (Pŵer i bennu gofynion sylfaenol), 33(3) (Pŵer i wneud rheoliadau am swm cosbau ariannol) a 54 (Pŵer i wneud darpariaeth ganlyniadol a throsiannol). Ond os nad yw rheoliadau sy'n gwneud darpariaeth ganlyniadol a throsiannol yn diwygio neu'n diddymu unrhyw ddarpariaeth mewn Deddf Seneddol neu Fesur neu Ddeddf gan Gynulliad Cenedlaethol Cymru, mae'r weithdrefn negyddol yn gymwys (is-adran(3)).

Adran 51: Dehongli cyfeiriadau at "cymhwyster"

104. Mae'r adran hon yn diffinio'r cymwysterau sy'n dod o fewn cwmpas y Bil. Mae graddau o lefelau amrywiol wedi eu heithrio.
105. Mae is-adran 3 yn darparu bod cymhwyster yn cael ei ddiffinio fel un a ddyfernir yng Nghymru mewn perthynas â lleoliad yr asesiad, neu ddarpar asesiad, dysgwyr, y mae rhaid iddo fod yn gyfan gwbl neu'n bennaf yng Nghymru, yn hytrach na lleoliad cyrff dyfarnu. Mae adran 52 yn esbonio ymhellach beth yw ystyr hyn.
106. Mae dyfarnu cymhwyster yn cael ei ddiffinio i gynnwys dyfarnu credydau mewn cysylltiad ag elfennau cymhwyster ac i gymhwyster a ddyfernir gan un neu ragor o

gyrff gyda'i gilydd. Mae cyfeiriadau at ffurf ar gymhwyster yn cyfeirio at y fersiwn o gymhwyster y mae corff dyfarnu penodol yn ei gynnig neu'n dymuno ei gynnig.

Adran 52: Dehongli cyffredinol a mynegai o ymadroddion wedi eu diffinio

107. Mae'r adran hon yn darparu bod dehongliadau yn Neddf Addysg 1996 (p.56) i'w cymhwyso i'r Bil hwn. Ond pan fo darpariaeth yn y Bil hwn yn rhoi dehongliad gwahanol i derm sydd hefyd yn ymddangos yn Neddf Addysg 1996, y diffiniad yn y Bil hwn sy'n gymwys yn hytrach na'r diffiniad yn Neddf Addysg 1996.
108. Mae is-adran 3 yn nodi cyfres o ddiffiniadau sy'n hunanesboniadol ac mae is-adran 4 yn esbonio, at ddibenion y Bil, pan ddywedir bod person yn cael ei asesu yn gyfan gwbl neu'n bennaf yng Nghymru, fod hyn yn cyfeirio at y lleoliad ble y mae'r dysgwr yn gwneud y gweithgareddau sy'n cael eu hasesu (er enghraifft sefyll arholiad neu gyflawni gweithgaredd sy'n cael ei arsylwi) yn hytrach na lleoliad y person sy'n llunio barn ar yr asesiad (er enghraifft arholwr yn marcio papurau arholiad mewn man arall yn y DU).
109. Mae diffiniadau hefyd wedi eu darparu mewn cysylltiad â'r hyn a olygir yn y Bil wrth gyfeirio at bersonau sydd ag anawsterau dysgu ac at gyrff cydnabyddedig.

Adran 53: Diwygiadau canlyniadol

110. Mae'r adran hon yn cyflwyno Atodlen 4 sy'n cynnwys diwygiadau canlyniadol i ddeddfwriaeth sylfaenol i ystyried sefydlu Cymwysterau Cymru a system reoleiddiol newydd.

Adran 54: Pŵer i wneud darpariaeth ganlyniadol a throsiannol etc

111. Mae'r adran hon yn rhoi pŵer i Weinidogion Cymru i wneud rheoliadau i ddarparu ar gyfer unrhyw ddarpariaeth ganlyniadol ychwanegol, neu ddarpariaeth gysylltiedig, neu unrhyw ddarpariaethau trosiannol, darfodol neu arbed er mwyn rhoi effaith lawn i ddarpariaeth yn y Bil hwn, neu at ddibenion darpariaeth yn y Bil hwn neu o ganlyniad iddi.

Adran 55: Dod i rym

112. Mae'r adran hon yn darparu i ddarpariaethau penodol yn y Bil ddod i rym pan gaiff y Cydsyniad Brenhinol. Bydd darpariaethau eraill y Bil yn dod i rym ar y dyddiad a bennir gan Weinidogion Cymru mewn gorchmynion cychwyn a wneir o dan yr adran hon.

Adran 56: Enw byr a chynnwys y Ddeddf fel un o'r Deddfau Addysg

113. Mae'r adran hon yn hunanesboniadol.

ATODLEN 1 CYMWYSTERAU CYMRU

RHAN 1 - SEFYDLU CYMWYSTERAU CYMRU

114. Cyflwynir yr Atodlen hon gan adran 2.

Paragraff 1: Statws

115. Mae'r paragraff hwn yn egluro nad corff i'r Goron yw Cymwysterau Cymru.

Paragraff 2: Aelodaeth

116. Mae'r paragraff hwn yn amlinellu aelodaeth Cymwysterau Cymru. Mae'n nodi y bydd y Prif Weithredwr yn aelod o Gymwysterau Cymru ac y bydd cadeirydd ac wyth i ddeg aelod arferol yn cael eu penodi gan Weinidogion Cymru.

Paragraffau 3 i 9: Y cadeirydd ac aelodau arferol

117. Mae'r paragraffau hyn yn amlinellu'r gofynion a'r cyfyngiadau sy'n ymwneud â phenodiadau, ymddiswyddo a'r posibilrwydd o symud aelodau o Gymwysterau Cymru o'u swydd. Caniateir i'r cadeirydd gael ei ailbenodi fel cadeirydd unwaith yn unig, ac mae cyfyngiadau ar delerau penodi ac ailbenodi aelodau arferol yn galluogi i aelodaeth Cymwysterau Cymru gael ei hadnewyddu'n rheolaidd.

Paragraffau 10 i 16: Y prif weithredwr a staff eraill

118. Bydd y prif weithredwr cyntaf yn cael ei benodi gan Weinidogion Cymru, am gyfnod o hyd at dair blynedd a bydd penodiadau dilynol yn cael eu gwneud gan aelodau Cymwysterau Cymru. Caniateir ailbenodiadau i rôl y prif weithredwr.
119. Ac eithrio'r prif weithredwr cyntaf, mae Cymwysterau Cymru yn penodi ei staff ei hun. Bydd Cymwysterau Cymru yn penderfynu ar delerau ac amodau, tâl a darpariaethau pensiwn ar gyfer staff - ond rhaid i'r trefniadau hyn gael eu cymeradwyo gan Weinidogion Cymru. Ni fydd staff Cymwysterau Cymru yn weision sifil.

Paragraffau 17 a 18: Pwyllgorau

120. Diben y paragraffau hyn yw rhoi'r pwerau i Gymwysterau Cymru i sefydlu a diddymu pwyllgorau, is-bwyllgorau a chyd-bwyllgorau. Mae Cymwysterau Cymru yn gallu talu tâl a lwfansau i aelodau pob un o'r tri chategori o bwyllgor.

Paragraffau 19 i 21: Dirprwyo

121. Diben y paragraffau hyn yw rhoi'r pwerau i Gymwysterau Cymru i ddirprwyo unrhyw un neu ragor o'i swyddogaethau i aelod o Gymwysterau Cymru, i aelod o staff, i bwyllgor neu i gyd-bwyllgor. Caiff pwyllgor neu gyd-bwyllgor is-ddirprwyo swyddogaeth i un o'i is-bwyllgorau. Caiff cyd-bwyllgorau osod telerau a graddau'r dirprwyo i is-bwyllgor, ond mae unrhyw ddirprwyo yn ddarostyngedig i unrhyw gyfarwyddyd a roddir gan Gymwysterau Cymru a'r person y mae cyd-bwyllgor wedi ei sefydlu gydag ef. Mae'r dirprwyo ac unrhyw gyfarwyddyd yn llywodraethu'r hyn y caiff pwyllgor ei wneud neu beidio â'i wneud.

Paragraffau 22 i 25: Gweithdrefn

122. Caiff Cymwysterau Cymru benderfynu ar y weithdrefn (er enghraifft, y cylch gorchwyl) ar gyfer ef ei hun, ei bwyllgorau a'i is-bwyllgorau. Caiff cyd-bwyllgorau osod eu gweithdrefnau eu hunain. Nid yw lleoedd gwag o ran aelodaeth neu ddiffygion o ran penodiadau i Gymwysterau Cymru, ei bwyllgorau, ei is-bwyllgorau neu gyd-bwyllgorau yn effeithio ar ddilysrwydd y trafodion (cyhyd ag y glynir wrth drafodion, gan gynnwys cworwm).

Paragraff 26: Cofrestr buddiannau

123. Mae'r paragraff hwn yn ei gwneud yn ofynnol i Gymwysterau Cymru gofnodi a chyhoeddi buddiannau ei aelodau.

Paragraff 27: Pwerau atodol

124. Diben y paragraff hwn yw rhoi'r pŵer i Gymwysterau Cymru i wneud unrhyw beth sy'n angenrheidiol neu'n briodol mewn perthynas â'i swyddogaethau. Mae is-paragraff 2 yn nodi'r eithriadau i'r sefyllfa gyffredinol, gyda'r effaith na all Gymwysterau Cymru fynd y tu hwnt i unrhyw drothwy gwariant a nodir gan Weinidogion Cymru, nac ychwaith cael benthyg neu roi benthyg arian, heb gymeradwyaeth Gweinidogion Cymru. Bydd y trothwy gwariant yn cael ei nodi mewn hysbysiad a roddir i Gymwysterau Cymru gan Weinidogion Cymru.

Paragraffau 28 i 30: Adroddiadau blynyddol ac adroddiadau eraill

125. Diben y paragraffau hyn yw ei gwneud yn ofynnol i Gymwysterau Cymru adrodd yn flynyddol i Gynulliad Cenedlaethol Cymru a phennu'r hyn y mae rhaid i'r adroddiad hwnnw ei gynnwys, gan alluogi Gymwysterau Cymru i gynnwys gwybodaeth ychwanegol. Ynghyd ag adrodd ar ei waith yn ystod y flwyddyn flaenorol, a nodi ei gynigion ar gyfer y flwyddyn sydd i ddod, rhaid i Gymwysterau Cymru adrodd ar unrhyw ganfyddiadau y mae wedi eu gwneud yn y flwyddyn adrodd am effaith ei weithgareddau ar effeithiolrwydd y system gymwysterau, am ei waith i ymgysylltu â rhanddeiliaid ac am unrhyw gasgliadau y mae wedi dod iddynt drwy waith ymchwil y mae wedi ei wneud.
126. Rhaid i Gymwysterau Cymru gyflwyno ei adroddiad yn flynyddol i Gynulliad Cenedlaethol Cymru. Mae'r flwyddyn adrodd yn rhedeg i 31 Awst bob blwyddyn a dylai'r adroddiad blynyddol gael ei gyflwyno cyn gynted ag y bo'n rhesymol ymarferol ar ôl y dyddiad hwnnw. Rhaid i'r adroddiad blynyddol gael ei gyhoeddi. Caiff Gymwysterau Cymru lunio a chyhoeddi adroddiadau ychwanegol fel y mae'n gweld yn dda.

Paragraff 31: Ariannu

127. Mae'r paragraff hwn yn galluogi Gweinidogion Cymru i ddarparu cyllid, ar ffurf grantiau, i Gymwysterau Cymru.

Paragraff 32: Cyfrifon ac archwilio

128. Mae'r paragraffau hyn yw nodi'r prosesau cyfrifon ac archwilio y mae'n ofynnol i Gymwysterau Cymru eu dilyn. Mae'r rhain yn cynnwys llunio a chyflwyno datganiad blynyddol o gyfrifon i'r Archwilydd Cyffredinol, yn unol â chyfarwyddydau a ddarperir gan Weinidogion Cymru, erbyn 31 Awst bob blwyddyn. Mae'r paragraff hefyd yn gosod dyletswydd ar yr Archwilydd Cyffredinol mewn perthynas â'r datganiad o gyfrifon ac yn diffinio'r flwyddyn ariannol gymwys.
129. Rhaid i Gymwysterau Cymru sicrhau ei fod yn cadw cyfrifon a chofnodion priodol, ac yn llunio datganiad o gyfrifon ar gyfer pob blwyddyn ariannol. Mae gan Weinidogion Cymru y pŵer i ddyroddi cyfarwyddydau i Gymwysterau Cymru o ran llunio datganiad o gyfrifon, gan gynnwys, er enghraifft, yr wybodaeth sydd i'w chynnwys yn y datganiad, y modd y mae angen i'r wybodaeth gael ei chyflwyno, y

dull a'r egwyddorion y mae angen i'r datganiad gael ei wneud yn unol â hwy ac unrhyw wybodaeth ychwanegol sydd i'w chynnwys.

130. Caiff Gweinidogion Cymru amrywio neu adolygu cyfarwyddyd a roddir i Gymwysterau Cymru ar unrhyw adeg.

Paragraff 35: Cynnal ymchwiliadau i'r defnydd o adnoddau

131. Mae'r paragraff hwn yn galluogi Archwilydd Cyffredinol Cymru i archwilio perfformiad Cymwysterau Cymru (ond nid rhinweddau amcanion polisi Cymwysterau Cymru).

ATODLEN 1 RHAN 2

Paragraffau 36 i 40: Diwygiadau canlyniadol

132. Mae'r paragraffau hyn yn cynnwys diwygiadau i ddeddfwriaeth sylfaenol. Effaith y diwygiadau hyn yw:
- a) y bydd Cymwysterau Cymru yn dod yn ddarostyngedig i gael ei adolygu gan Gomisiynydd Plant Cymru a Chomisiynydd Pobl hŷn Cymru;
 - b) bod rhaid i Gymwysterau Cymru glynu wrth ofynion Deddf Rhyddid Gwybodaeth 2000;
 - c) y caiff Ombwdsmon Gwasanaethau Cyhoeddus Cymru ymchwilio i Gymwysterau Cymru; a
 - d) bod rhaid i Gymwysterau Cymru gydymffurfio â dyletswyddau o dan Deddf Cydraddoldeb 2010.

ATODLEN 2: TROSLWYDDO EIDDO A STAFF I GYMWYSTERAU CYMRU

133. Diben yr Atodlen hon yw galluogi Gweinidogion Cymru i drosglwyddo eiddo, hawliau, rhwymedigaethau a staff i Gymwysterau Cymru drwy gynllun neu gynlluniau trosglwyddo. Rhaid i Weinidogion Cymru osod y cynllun neu'r cynlluniau gerbron Cynulliad Cenedlaethol Cymru fel y'i darperir ym mharagraff 5.
134. Mae paragraff 1(3) yn nodi rhestr nad yw'n hollgynhwysfawr o'r darpariaethau y caniateir iddynt gael eu gwneud yn y cynllun, gan gynnwys creu hawliau a gosod rhwymedigaethau, darparu i faterion sydd wedi eu trosglwyddo i gael effaith barhaus, a gwneud darpariaeth sydd yr un fath â darpariaeth a wneir gan Reoliadau Trosglwyddo Ymgymeriadau (Diogelu Cyflogaeth) 2006 neu'n debyg iddi o dan amgylchiadau pan na fo'r rheoliadau hynny yn gymwys.
135. Mae paragraff 2 yn caniatáu i'r cynllun gael ei addasu drwy gytundeb Cymwysterau Cymru a Gweinidogion Cymru ac i addasiadau o'r fath gael eu hól-ddyddio i ddyddiad gwreiddiol y cynllun.
136. Mae paragraff 3 yn darparu bod eglurhad am y modd y mae cyflogaeth unigolion yn y gwasanaeth sifil i gael ei thrin pan fyddant yn trosglwyddo i Gymwysterau Cymru.
137. Mae paragraff 4 yn darparu ar gyfer ystyron termau wedi eu diffinio sy'n ymddangos yn yr Atodlen hon.

ATODLEN 3: DARPARIAETH BELLACH YNGHYLCH CYDNABOD CYRFF DYFARNU

Paragraff 1: Cyfnod para cydnabyddiaeth

138. Mae'r paragraff hwn yn egluro dyddiad dechrau cydnabyddiaeth corff dyfarnu ac yn pennu'r tri amgylchiad pan ddaw cydnabyddiaeth i ben.

Paragraffau 2 a 3: Amodau cydnabod safonol

139. Mae'r paragraffau hyn yn gosod dyletswydd ar Gymwysterau Cymru i gyhoeddi 'amodau cydnabod safonol' a fydd yn gymwys i gyrff dyfarnu unwaith y byddant wedi cael eu cydnabod. Fel yn achos y meini prawf cydnabod, mae'r darpariaethau yn caniatáu i amodau gwahanol gael eu cymhwyso mewn perthynas ag:
- mathau gwahanol o gyrff dyfarnu (er enghraifft, 'cyrff dyfarnu sy'n sefydliadau aelodaeth');
 - mathau gwahanol o gymhwyster (er enghraifft, 'cyrff dyfarnu sy'n cynnig cymwysterau a gaiff eu marcio'n allanol');
 - amgylchiadau gwahanol pan gaiff y cymhwyster ei ddyfarnu (er enghraifft pan gaiff cymhwyster ei ddyfarnu ar ôl i ymgeisydd ailsefyll modiwl); a
 - disgrifiadau gwahanol o berson y mae cymhwyster yn cael ei ddyfarnu iddo (er enghraifft pan gaiff ei ddyfarnu i ddysgwyr o dan 19 oed).
140. Bydd amodau safonol fel arfer yn gymwys i gyrff dyfarnu cydnabyddedig, ond bydd Cymwysterau Cymru yn gallu penderfynu, mewn achosion penodol, na fydd rhai o'r amodau safonol yn gymwys a chaiff wneud y penderfyniad hwnnw naill ai wrth roi cydnabyddiaeth neu ar ôl hynny. Mae Cymwysterau Cymru hefyd yn gallu dirymu ei benderfyniad. Mae paragraff 2(6) yn darparu nad yw amodau 'capio ffioedd' a 'trosglwyddo' yn amodau safonol (gweler paragraff 4 o Atodlen 3 am ragor o wybodaeth am amodau capio ffioedd a throsglwyddo).
141. Bydd Cymwysterau Cymru yn gallu diwygio'r amodau safonol, ond os yw'n gwneud hynny rhaid iddo gyhoeddi'r diwygiadau hyn, hysbysu cyrff cydnabyddedig a bod yn glir am y dyddiad y byddant yn gymwys (mewn perthynas â chorff, ni all y dyddiad hwnnw fod cyn y maent wedi ei hysbysu amdano). Caniateir i ddyddiadau dechrau gwahanol fod yn gymwys ar gyfer cyrff gwahanol.

Paragraffau 4 and 5: Amodau arbennig y caniateir i gydnabyddiaeth fod yn ddarostyngedig iddynt

142. Mae'r paragraffau hyn yn nodi'r mathau eraill o amodau (a elwir yn amodau arbennig) y caniateir eu gosod ar gorff dyfarnu cydnabyddedig gan Gymwysterau Cymru, gan gynnwys (ond nid yn gyfyngedig iddynt) capio ffioedd (ei gwneud yn ofynnol sicrhau nad yw ffioedd yn mynd y tu hwnt i derfyn penodol); trosglwyddo (ei ddiben yw sicrhau y caniateir i gymhwyster a gymeradwywyd a ddyfernir gan y corff cydnabyddedig gael ei ddyfarnu gan gorff arall) a'i gwneud yn ofynnol i gyrff dyfarnu cydnabyddedig gydymffurfio â chyfarwyddydau a roddir gan Gymwysterau Cymru. Gwneir darpariaeth debyg i Gymwysterau Cymru ddiwygio neu ddirymu'r amodau arbennig hyn, gan ei gwneud yn ofynnol sicrhau eglurder mewn perthynas â hysbysu ac amseru.

Paragraffau 6 i 11: Amodau capio ffioedd

143. Mae'r paragraffau hyn yn diffinio beth yw amod capio ffioedd. Dim ond mewn perthynas â chymwysterau a ddyfernir i ddysgwyr, sy'n dilyn cyrsiau addysg neu hyfforddiant a gyllidir yn gyhoeddus ac sy'n arwain at y cymwysterau hynny, y gallant cyfyngu ar ffioedd. Rhaid i Gymwysterau Cymru fod wedi ei fodloni ei bod yn briodol gosod yr amod i sicrhau gwerth am arian. Diffinnir cwrs addysg a gyllidir yn gyhoeddus ym mharagraff 6(2).
144. Mae paragraff 8 yn nodi'r broses y caiff Cymwysterau Cymru osod amod capio ffioedd drwyddi, gan gynnwys y gofyniad i roi hysbysiad i gyrff dyfarnu am ei fwriad i osod yr amod, rhoi resymau dros ei fwriad i osod yr amod a dweud pryd y mae'n bwriadu penderfynu pa un ai i osod yr amod. Rhaid i Gymwysterau Cymru ystyried sylwadau a gyflwynir gan y corff cydnabyddedig ac os yw'n penderfynu gosod yr amod, rhaid hysbysu'r corff dyfarnu am hyn a hefyd am ei hawl i wneud cais am adolygiad o'r penderfyniad. Rhaid i'r hysbysiad hefyd ddweud pryd y mae'r amod yn cymryd effaith os nad yw'r corff dyfarnu yn gwneud cais am adolygiad.
145. Os yw'r corff dyfarnu yn gwneud cais am adolygiad o'r penderfyniad i osod amod capio ffioedd, mae paragraff 10 yn darparu manylion am y trefniadau y mae rhaid i Gymwysterau Cymru eu gwneud, wrth drefnu i adolygydd annibynnol adolygu'r penderfyniad. Yn dilyn yr adolygiad, os yw Cymwysterau Cymru yn cadarnhau ei benderfyniad i osod yr amod, neu'n newid yr amod, yna rhaid i Gymwysterau Cymru roi hysbysiad i'r corff dyfarnu sy'n cynnwys y manylion a nodir ym mharagraff 10(5).
146. Mae paragraff 11 yn ei gwneud yn ofynnol i Gymwysterau Cymru ddilyn yr un weithdrefn ar gyfer dyroddi amrywiad i amod capio ffioedd ag ar gyfer dyroddi amod capio ffioedd cychwynnol.

Paragraff 12 i 16: Amodau trosglwyddo

147. Caniateir i amod trosglwyddo alluogi Cymwysterau Cymru i gyfarwyddo corff dyfarnu i drosglwyddo pethau i gorff dyfarnu arall er mwyn i'r corff arall hwnnw ddyfarnu'r cymhwyster. Y seiliau dros roi cyfarwyddyd o'r fath yw bod Cymwysterau Cymru yn ystyried ei bod yn angenrheidiol gwneud hynny er mwyn osgoi effeithiau andwyol sylweddol ar ddysgwyr. Os yw digwyddiadau a ddisgrifir yn yr amod yn dod i fod, caiff Cymwysterau Cymru gyfarwyddo corff dyfarnu i wneud trefniadau i alluogi corff dyfarnu arall i gyflenwi ffurf a gymeradwywyd ar y cymhwyster. Rhaid i Gymwysterau Cymru nodi mewn datganiad polisi yr amgylchiadau pan fo cyfarwyddyd yn debygol o gael ei roi i gorff dyfarnu yn unol ag amod cymhwyster a phwnc tebygol unrhyw gyfarwyddyd o'r fath (adran 42).
148. Mae paragraffau 13 a 14 yn nodi'r broses i Gymwysterau Cymru wneud y cyfarwyddyd, i'r corff dyfarnu gael ei hysbysu am gyfarwyddyd arfaethedig, ac i'r corff allu gwneud cais am adolygiad o unrhyw benderfyniad dilynol i gyfarwyddo. Mae paragraff 16 yn nodi manylion y broses ar gyfer adolygiad gan berson annibynnol. Os yw Cymwysterau Cymru, yn dilyn yr adolygiad, yn cadarnhau ei benderfyniad, mae paragraff 16 hefyd yn ei gwneud yn ofynnol i Gymwysterau Cymru hysbysu'r corff ac mae'n nodi pa fanylion y mae rhaid i'r hysbysiad eu cynnwys.

149. Mae paragraff 15 yn galluogi Cymwysterau Cymru i dalu digollediad i'r corff mewn cysylltiad â cholledion yr aed iddynt wrth gydymffurfio â'r cyfarwyddyd, ond dim ond os yw Cymwysterau Cymru yn credu ei bod yn rhesymol ac yn briodol gwneud hynny o dan yr amgylchiadau. Rhaid i Gymwysterau Cymru, mewn datganiad polisi o dan adran 42, nodi'r materion y mae'n debygol o'u hystyried wrth benderfynu pa un ai i wneud taliad o'r fath ac wrth benderfynu ei swm.

Paragraff 17 ac 18: Ildio cydnabyddiaeth

150. O dan baragraff 17, caiff corff dyfarnu cydnabyddedig roi hysbysiad ildio i Gymwysterau Cymru gan ofyn iddo dynnu ei gydnabyddiaeth o'r corff dyfarnu. Rhaid i'r hysbysiad ildio bennu'r dyddiad y mae'r corff dyfarnu yn dymuno i'r gydnabyddiaeth ddod i ben. Rhaid i Gymwysterau Cymru roi cydnabyddiaeth o ildio i'r corff dyfarnu sy'n nodi'r dyddiad y bydd y gydnabyddiaeth yn dod i ben. Caniateir i'r dyddiad fod yr un a gynigir gan y corff dyfarnu neu ddyddiad gwahanol, fel y gwel Cymwysterau Cymru yn briodol. Rhaid i Gymwysterau Cymru roi rhesymau yn yr hysbysiad o ran pam y mae dyddiad gwahanol i'r un a gynigiwyd gan y corff dyfarnu yn cael ei ddarparu, ac mae paragraff 17 yn cyfeirio at y materion y mae rhaid i Gymwysterau Cymru eu hystyried wrth benderfynu ar y dyddiad i'r gydnabyddiaeth gael ei hildio, sef yr angen i osgoi effaith andwyol ar ddysgwyr a dymuniad y corff dyfarnu i'r gydnabyddiaeth ddod i ben ar y dyddiad y mae wedi ei bennu.

151. O dan baragraff 18, caiff Cymwysterau Cymru, am gyfnod penodol, drin corff sydd wedi ildio ei gydnabyddiaeth fel pe bai'n parhau i gael ei gydnabod at ddibenion penodedig. Dim ond os yw Cymwysterau Cymru yn credu ei bod yn briodol gwneud darpariaeth o'r fath er mwyn osgoi effaith andwyol ar ddysgwyr y caiff wneud hynny.

Paragraffau 19 i 23: Tynnu cydnabyddiaeth yn ôl

152. Mae'r paragraffau hyn yn galluogi Cymwysterau Cymru i roi terfyn ar ei gydnabyddiaeth o gorff dyfarnu mewn cysylltiad â chymhwyster neu bob cymhwyster y mae wedi ei gydnabod mewn cysylltiad ag ef. Caniateir i gydnabyddiaeth gael ei thynnu'n ôl os nad yw'r corff dyfarnu yn cydymffurfio ag amodau cydnabod neu amodau cymeradwyo cymwysterau.
153. Mae'r broses ar gyfer tynnu cydnabyddiaeth yn ôl wedi ei nodi ym mharagraffau 20 i 22 ac mae'n cynnwys gofynion i roi hysbysiad gyda rhesymau dros y cynnig i dynnu cydnabyddiaeth yn ôl, i ystyried sylwadau a gyflwynir gan y corff cydnabyddedig, i hysbysu'r corff dyfarnu am benderfyniad i dynnu cydnabyddiaeth yn ôl a'i hawl i adolygu ac i wneud trefniadau ar gyfer adolygiad annibynnol o'r penderfyniad i dynnu cydnabyddiaeth yn ôl, os yw'r corff dyfarnu yn gofyn am adolygiad o'r fath. Os yw Cymwysterau Cymru, yn dilyn yr adolygiad, yn cadarnhau ei benderfyniad i dynnu cydnabyddiaeth yn ôl, rhaid i'r corff dyfarnu gael ei hysbysu am y penderfyniad ac am ba bryd y bydd y tynnu'n ôl yn cymryd effaith.
154. Mae paragraff 23 yn nodi bod hysbysiadau a roddir gan Gymwysterau Cymru o dan baragraffau 21 neu 22 (tynnu cydnabyddiaeth yn ôl, neu gadarnhau penderfyniad i dynnu cydnabyddiaeth yn ôl) yn gallu gwneud darpariaeth i'r effaith bod corff y

*Mae'r nodiadau hyn yn cyfeirio at Fil Cymwysterau Cymru fel y'i cyflwynwyd i
Gynulliad Cenedlaethol Cymru ar 1 Rhagfyr 2014*

mae ei gydnabyddiaeth wedi ei thynnu'n ôl, yn cael ei drin fel pe bai'n cael ei gydnabod am gyfnod penodedig ac at ddibenion penodedig. Mae hyn er mwyn osgoi effaith andwyol ar ddysgwyr. Rhaid i'r hysbysiad hwn gynnwys yr wybodaeth ychwanegol a nodir ym mharagraff 23(3).

ATODLEN 4 - DIWYGIADAU CANLYNIADOL

155. Mae'r Atodlen hon yn gwneud newidiadau i ddeddfwriaeth sylfaenol i adlewyrchu bod y Bil yn sefydlu Cymwysterau Cymru fel rheoleiddiwr system newydd o gymwysterau a gymeradwywyd yng Nghymru; un newid o'r fath yw diddymu swyddogaeth rheoleiddiol Gweinidogion Cymru mewn perthynas â chymwysterau o dan Ddeddf Addysg 1997.

Atodiad B – Priso'r Opsiynau

Y Prif Ragdybiaethau

- 1 Wrth ddadansoddi'r costau, defnyddiwyd y rhagdybiaethau allweddol canlynol:

Creu'r sefydliad

- 2 At ddibenion y gwaith costio hwn, ar gyfer pob opsiwn cymerir y bydd y sefydliad yn cychwyn gweithredu ym Medi 2015, yn unol â'r bwriad.
- 3 O ran Opsiwn 1b, cyfrifwyd costau'r staff ychwanegol o fis Medi 2015.
- 4 O ran Opsiwn 2, cyfrifwyd y costau ar gyfer cychwyn swyddogaethau Swyddfa'r Comisiynydd o fis Medi 2015.
- 5 O ran Opsiwn 3, cyfrifwyd y costau ar sail y rhagdybiaeth y bydd y sefydliad yn cael ei sefydlu yn fuan ar ôl cael Cydsyniad Brenhinol, yn ystod yr haf 2015, ac y bydd ei swyddogaethau cymwysterau yn dechrau o fis Medi 2015. Cyfrifwyd y costau hefyd ar sail y rhagdybiaethau ychwanegol canlynol:
 - y bydd y gwaith o recriwtio'r Bwrdd Cysgodol yn mynd rhagddo o fis Ebrill 2015
 - y bydd pedwar uwch-aelod o staff yn cael eu recriwtio o fis Ebrill 2015
 - y bydd y gwaith o osod seilwaith a ffitiadau'r swyddfa yn digwydd yn ystod yr haf 2015
 - y bydd y staff yn trosglwyddo o Lywodraeth Cymru i'r sefydliad newydd ym mis Medi 2015.

Statws y sefydliad

- 6 Rhagdybiwyd na fyddai gan y sefydliad statws elusennol ac na fyddai'n gorfod talu treth gorfforaeth yn y DU. Rhagdybiwyd hefyd y byddai Cymwysterau Cymru yn cofrestru at ddibenion TAW, yn seiliedig ar sefydliadau cyfatebol.
- 7 Gallai unrhyw newidiadau i'r statws treth gael effaith sylweddol ar unrhyw gostau sy'n daladwy.

Costau staffio

- 8 Roedd y data am gyflogau ac argostau yn seiliedig ar gyfuniad o gyfraddau Llywodraeth Cymru a chyfraddau cyflog y farchnad. Defnyddiwyd y canlynol i amcangyfrif y costau:

- Graddfeydd cyflog sy'n gysylltiedig â gradd.
 - Costau cyflogau presennol y staff a gyflogir ar hyn o bryd yn yr Is-adran Rheoleiddio a Chymwysterau (37 ohonynt ym mis Awst 2013).
 - Ffigur sy'n amcangyfrif o gyflog ac argostau ar lefel yr Uwch Wasanaeth Sifil ar gyfer rôl Comisiynydd fel y'i nodir yn Opsiwn 2.
 - Amcangyfrifon o nifer y staff corfforaethol a rheoleiddio ychwanegol y byddai eu hangen ar gyfer opsiynau 2 a 3.
- 9 O ran opsiynau 1b a 2, defnyddiwyd y costau cyflog a gafwyd yn y gwaith a wnaed gan ymgynghorwyr PWC, wrth iddynt ddatblygu modelau opsiynau i Weinidogion eu defnyddio i ystyried y polisi ar gyfer creu Cymwysterau Cymru yn 2013. Gan nad archwiliwyd y modelau hyn yn fanwl, roedd eu lefelau staffio a'u disgrifiadau swydd yn ddamcaniaethol, a chawsant eu seilio ar gyfraddau cyfartalog y farchnad. Gan na wnaed rhagor o waith manwl ar y modelau hyn, y gred oedd na fyddai'n ddefnyddiol ceisio eu cydweddu â bandiau cyflog Llywodraeth Cymru, ac felly, mai'r peth gorau fyddai defnyddio cyfrifiadau ar sail costau cyflog cyfartalog er mwyn cymharu'r modelau hynny â'r model a ffefrir. Mae'r ffigurau staffio ar gyfer Opsiwn 3 yn fwy manwl, ac maent yn defnyddio pegwn uchaf graddfeydd cyflog Llywodraeth Cymru. Y teimlad yw, nes bod dyluniad y sefydliad ar ei ffurf derfynol, bod hyn yn adlewyrchiad mwy cywir o gostau posibl llawn strwythur y sefydliad.
- 10 Mae costau recriwtio yn seiliedig ar gostau recriwtio cyfartalog y pen fel sy'n briodol ar gyfer y diwydiant, gan nad yw'r dull recriwtio wedi ei bennu hyd yn hyn.
- 11 Nid yw'r model yn cynnwys unrhyw elfennau sy'n ymwneud â chwyddiant, nac ychwaith unrhyw symud mewn graddfeydd cyflog a allai ddigwydd dros gyfnod cyflogi unigolyn.
- 12 Gallai'r ffaith bod elfennau chwyddiant wedi eu hepgor olygu y bydd costau cyflogau yn cynyddu ychydig o flwyddyn 1 ymlaen.

Hyfforddiant

- 13 Mae hyn yn seiliedig ar gyfrifiadau fesul pen sydd wedi eu tynnu o sefydliadau cyfatebol.
- 14 Rhagdybiwyd y bydd yr holl staff yn derbyn hyfforddiant yn flynyddol, ac y rhoddir hyfforddiant cynefino cychwynnol mewn perthynas â phob penodiad newydd.

Bwrdd Llywodraethu

- 15 Rhagdybir y bydd y Bwrdd yn cynnwys Cadeirydd, a gaiff dâl o £35,000 y flwyddyn, a 10 aelod arall sy'n cael tâl o £7,500 y flwyddyn. Rhagdybir bod y ffigurau hyn yn cynnwys ffioedd a chostau teithio a chynhaliaeth.

Costau teithio a chynhaliaeth

- 16 Cafodd y rhain eu hamcangyfrif ar sail gwariant y pen presennol o fewn Llywodraeth Cymru (wedi ei wirio yn erbyn gwybodaeth gyllidebol am sefydliadau cyfatebol).
- 17 Rhagdybiwyd y byddai'r costau teithio a chynhaliaeth ar gyfer opsiynau 2 a 3 yn union yr un fath, gan mai staff rheoleiddio yn bennaf fyddai'n eu hawlio. Mae hyn hefyd yn helpu i ddangos y gwahaniaeth rhwng costau'r ddau opsiwn yn fwy clir.

Costau TGCh

- 18 O ran Opsiwn 2, rhagdybiwyd y bydd costau rhedeg TGCh Llywodraeth Cymru yn cael eu codi ar y sefydliad yn unol â'r cyfraddau cyfredol.
- 19 O ran Opsiwn 3, mae'r amcangyfrif ar gyfer costau cyfalaf caledwedd a systemau a delir ymlaen llaw wedi ei dynnu o astudiaeth gwmpasu fanwl a dyfynbrisiau cyllidebol. Cafodd ei wirio yn erbyn costau sy'n ymddangos yng nghyfrifon Ofqual.
- 20 Mae gwaith wedi cael ei wneud mewn perthynas â'r systemau a'r galedwedd TGCh y mae eu hangen ar gyfer Opsiwn 3, ac mae'n bosibl y bydd angen adolygu'r costau hyn ar ôl i ddarparwyr telathrebu wneud arolwg manwl o'r safle newydd.

Gwariant y rhaglen

- 21 Amcangyfrifir mai gwariant y rhaglen fydd £2,380,000 y flwyddyn am bum mlynedd, a hynny ar gyfer pob opsiwn. Mae'r gwariant hwn yn cynnwys meysydd megis ymchwil, cyfathrebu a gwasanaethau arbenigol a fyddai'n gorfod cael eu talu waeth pa opsiwn a ddewisir.

Effaith chwyddiant

- 22 Nid yw unrhyw elfennau chwyddiant wedi eu cynnwys wrth brisio costau gweithredu cyffredinol.

Yr hinsawdd gymwysterau

- 23 Rhagdybiwyd na fyddai unrhyw argyfwng na newidiadau sylweddol yn digwydd o fewn system gymwysterau Cymru yn ystod y cyfnod priso, ac

y byddai'r cyllid a ddyrennir i Gymwysterau Cymru yn parhau ar yr un lefel.

Y gost o weithredu'r model

- 24 Nid yw cost y prosiect i roi Opsiwn 2 ar waith yn cynnwys cost ffrydiau gwaith Adnoddau Dynol a Lleoliad. Er bod angen deddfwriaeth sylfaenol ar gyfer Opsiwn 3, nad oedd ei hangen ar gyfer Opsiwn 2, y teimlad oedd y byddai'r ddeddfwriaeth y byddai ei hangen i ddiddymu swyddogaethau Gweinidogion yn debyg, ac y byddai'r amcangyfrif ar gyfer gweddill y costau yr un ar gyfer y ddau opsiwn. Nid yw'r gost o lunio deddfwriaeth wedi ei chynnwys yn y gost hon.

Cymharu â sefydliadau cyhoeddus eraill

- 25 Rhagdybiwyd y byddai'r modelau, a oedd yn cael eu prisió, yn cymharu'n briodol â sefydliadau cyhoeddus eraill. Defnyddiwyd gwybodaeth a oedd ar gael i'r cyhoedd mewn perthynas â sefydliadau cyfatebol eraill, a cheisiwyd arbenigedd a gwybodaeth bellach gan y sefydliadau hynny a sefydliadau eraill er mwyn cael gwybodaeth am gostau.
- 26 Mae'r sefydliadau hyn yn cael eu rhestru ym mharagraffau 84-86 isod.

Cyflwyno'r ffigurau

- 27 Mae'r holl gyfrifiadau wedi eu talgrynnu i'r £1000 agosaf, ac eithrio costau staffio, sydd o reidrwydd yn cael eu cyfrifo'n fanwl. Mae'r cyfansymiau hynny wedi eu talgrynnu i'r £1000 agosaf.

Opsiwn 1

Opsiwn 1a - Gwneud dim: Gweinidogion Cymru i gadw eu swyddogaeth reoleiddio.

Opsiwn 1b - Gwneud dim, ond parhau i ymateb i'r gwahanu graddol sy'n digwydd rhwng arferion y tair gwlad, gyda swyddogion yn Is-adran Rheoleiddio a Chymwysterau Llywodraeth Cymru yn llywio'r gwaith o ddiwygio cymwysterau yng Nghymru (yn dilyn yr *Adolygiad o Gymwysterau*).

Rhagdybiaethau manwl – Opsiwn 1a

Staffio

- 28 Mae'r costau hyn wedi eu cyfrifo ar sail y rhagdybiaeth y byddai'r lefel staffio yn yr Is-adran Rheoleiddio a Chymwysterau yn parhau ar 37 aelod o staff.

Rhagdybiaethau manwl – Opsiwn 1b

Staffio

- 29 Mae'r costau hyn wedi eu cyfrifo ar sail y rhagdybiaeth y bydd 23 aelod o staff ychwanegol yn cael eu recriwtio ar ben y 37 aelod o staff sydd yn yr Is-adran Rheoleiddio a Chymwysterau, er mwyn parhau i ddatblygu'r agenda ar gyfer diwygio cymwysterau, gan:

- Symud oddi wrth drefn gydweithredol y tair gwlad
Amcangyfrifwyd beth fyddai'r gost o gyflogi 15 aelod o staff cymwysterau/rheoleiddio ychwanegol er mwyn cryfhau'r swyddogaeth reoleiddio a chyflawni dyletswyddau ychwanegol sy'n debyg i'r tasgau hynny y mae Ofqual yn eu cyflawni ar hyn o bryd ar ran Lywodraeth Cymru. Mae'r rhain yn cynnwys, er enghraifft, amrywiaeth o dasgau sy'n ymwneud â datblygu trefniadau achredu, monitro, adolygu a rheoleiddio. Mae'r amcangyfrif hwn yn debyg i'r amcangyfrif ar gyfer aelodau o staff rheoleiddio ychwanegol a gynigir yn Opsiwn 2.
- Gwaith ymchwil
Byddai mwy o waith ymchwil yn cael ei wneud a'i reoli gan 3 aelod o staff (sef y nifer a amcangyfrifir) er mwyn helpu i ddiwygio cymwysterau a chynnal y gweithgareddau rheolaidd sy'n mynd rhagddynt yng Nghymru.
- Comisiynu cymwysterau
Amcangyfrifwyd y gost o gyflogi 5 aelod o staff ychwanegol i oruchwylio'r gwaith o gaffael contractau yn ôl y gofyn a gomisiynir mewn perthynas â'r gyfres unigol o gymwysterau i'w comisiynu i Gymru.

Atodiad B – Priso'r Opsiynau

- 30 Er mwyn cynnal cysondeb ag opsiynau eraill, amcangyfrifir y gost o gyflogi staff ychwanegol o fis Medi 2015, er mwyn adlewyrchu'r newidiadau i weithgarwch a gynigir yn Opsiynau 2 a 3.
- 31 O ran Opsiwn 1b, amcangyfrifir y gost ar gyfer cyfanswm nifer y staff o fis Medi 2015, sef 60 aelod o staff.

Cyfrifiadau

Costau refeniw: staff – swyddogaethau sy'n ymwneud â chymwysterau

- 32 Amcangyfrifir ar gyfer strwythurau staff ychwanegol drwy ddefnyddio cysyniadau strwythur trefniadaeth rhagbaratoawl sy'n cael eu datblygu ar gyfer Cymwysterau Cymru fel y'i rhagwelir yn yr opsiwn a ffeirir, sef Opsiwn 3. Mae'r strwythurau hyn yn ymwneud â'r timau rheoleiddio, ymchwil, a chomisiynu a chaffael ychwanegol y bydd eu hangen.

Tabl 5

Gradd	Cyfflogau £	x	Costau Cyfflogau	Argostau %	Argostau £	2015-2016 Sefydlu	2015-2016 Gweithredu	Parhaus	Ffynhonnell / Rhagbydiaeth
<i>y staff rheoleiddio presennol (37)</i>						650,811	911,136	1,561,947	Ffigurau Llywodraeth Cymru
<i>Amcangyfrif o staff rheoleiddio ychwanegol</i>									
G6	62,850	1	62,850	0.32	20,112				Gwybodaeth cyfflogau Llywodraeth Cymru
G7	51,025	4	204,100	0.32	65,312				
SEO	39,425	3	118,275	0.27	31,934				
HEO	30,725	3	92,175	0.27	24,887				
EO	24,075	2	48,150	0.27	13,001				
TS	19,075	2	38,150	0.24	9,156				
		15	563,700		164,402				
Cost staff rheoleiddio ychwanegol, gan gynnwys argostau Pro rata am 7 mis hyd at fis Mawrth 2016					728,102		424,726	728,102	
<i>Amcangyfrif o staff swyddogaethau ymchwil ychwanegol</i>									
G7	51,025	1	51,025	0.32	16,328				Amcangyfrifwyd ar sail cysyniad dylunio sefydliadol dros dro
SEO	39,425	2	78,850	0.27	21,290				
		3	129,875		37,618				
Cost staff ychwanegol, gan gynnwys argostau Pro rata am 7 mis hyd at fis Mawrth 2016					167,493		97,704	167,493	
<i>Amcangyfrif o staff comisiynu / caffael ychwanegol</i>									
G7	51,025	1	51,025	0.32	16,328				Amcangyfrifwyd ar sail cysyniad dylunio sefydliadol dros dro
SEO	39,425	2	78,850	0.27	21,290				
HEO	30,725	2	61,450	0.27	16,592				
		5	191,325		54,209				
Cost staff rheoleiddio ychwanegol, gan gynnwys argostau Pro rata am 7 mis hyd at fis Mawrth 2016					245,534		143,228	245,534	
						£ 651,000	£ 1,577,000	£ 2,703,000	Mae'r ffigurau wedi'u talgrynnu i'r £1,000 agosaf

Costau refeniw : staff – ac eithrio cyfflogau

- 33 Mae'r costau hyn yn adlewyrchu'r costau presennol nad ydynt yn cynnwys cyfflogau ar gyfer Opsiwn 1a.

Tabl 6

Costau Refeniw Presennol: Staff – ac eithrio cyfflogau	Parhaus	Ffynhonnell / Rhagbydiaeth
Costau hyfforddiant arferol	45,000	Llywodraeth Cymru. Cyfartaledd o £1,214 y pen y flwyddyn
Teithio a chynhaliadau	19,000	Llywodraeth Cymru. Cyfartaledd o £505 y pen y flwyddyn
	£64,000	

Costau refeniw: staff ychwanegol – ac eithrio cyflogau

34 Mae'r costau'n cynnwys:

- Teithio a chynhaliaeth ar gyfer staff rheoleiddio ychwanegol ar gyfer y saith mis rhwng mis Medi 2015 a mis Mawrth 2016, ac wedyn.
- Costau hyfforddi ar gyfer y staff presennol, a hefyd staff rheoleiddio, ymchwil, a chomisiynu/caffael ychwanegol, ar gyfer y cyfnod rhwng mis Medi 2015 a mis Mawrth 2016.
- Y costau sefydlu cychwynnol sy'n gysylltiedig â hyfforddi staff i ddefnyddio systemau TGCh newydd.
- Costau recriwtio.

Tabl 7

Costau Refeniw: Staff ychwanegol ac eithrio cyflogau	2015-16 Sefydlu Gweithredu	2015-16	Parhaus	Ffynhonnell / Rhagdybiaeth
Costau Staff Newydd				
Recriwtio 23 o staff newydd	46,000			Yn ôl cyfartaledd CIPD o £2k y pen
Hyfforddiant ymlaen llaw ar ddefnyddio systemau newydd		28,000		Yn ôl cyfartaledd o £1,214 y pen y flwyddyn
Taliadau TGCh		23,000	40,000	Taliadau Llywodraeth Cymru, sef £145 y pen bob mis calendr
Costau hyfforddiant arferol		16,000	28,000	Cyfartaledd o £1,214 y pen y flwyddyn
Teithio a chynhaliaeth		4,000	8,000	Cyfartaledd o £505 y pen y flwyddyn, 15 aelod o staff rheoleiddio 09.2015
	46,000	71,000	76,000	

Costau refeniw: TGCh

35 Mae'r costau hyn yn adlewyrchu costau cychwynnol a chostau parhaus y trefniadau a fydd yn disodli'r Gronfa Ddata Cymwysterau Cymeradwy yng Nghymru (DAQW).

Tabl 8

Costau Refeniw : TGCh	2015-2016 Sefydlu	2015-2016 Gweithredu	Parhaus	Ffynhonnell / Rhagdybiaeth
Cronfa Ddata Cymwysterau Cymeradwy yng Nghymru (creu cronfa ddata)	115,000			
Adnoddau TGCh Llywodraeth Cymru	144,000			
Cronfa Ddata Cymwysterau Cymeradwy yng Nghymru (costau parhaus)			29,000	
Contractwr TGCh			30,000	50,000 Cyfateb i Fand F
	£ 259,000	£30,000	£79,000	

Opsiwn 2

Gwneud cyn lleied â phosibl: creu rôl a swyddfa ar gyfer Comisiynydd annibynnol i graffu ar weithgarwch uned o fewn Llywodraeth Cymru.

Rhagdybiaethau manwl

Deddfwriaeth

- 36 Rhagdybiwyd y byddai'r ddeddfwriaeth y byddai ei hangen i ddiddymu swyddogaethau'r Gweinidogion, a rhoi rôl Comisiynydd yn eu lle yn digwydd yn ôl yr un amserlen â'r un ar gyfer y Bil hwn.

Adleoli

- 37 Rhagdybiwyd na fyddai unrhyw gostau adleoli ar gyfer staff o dan yr opsiwn hwn.

Costau TGCh

- 38 Ar gyfer yr opsiwn hwn, rhagdybiwyd y bydd costau rhedeg TGCh Llywodraeth Cymru yn cael eu codi ar y sefydliad yn unol â'r cyfraddau cyfredol.

Staffio

- 39 O dan yr opsiwn, byddai 37 o aelodau staff yr Is-adran Rheoleiddio a Chymwysterau; a hefyd (fel o dan Opsiwn 1b), 15 o staff rheoleiddio ychwanegol (sef y nifer y rhagwelir y bydd ei angen i gyflawni swyddogaethau ychwanegol, wrth i'r sefydliad dorri ei gwys ei hun ac ymbellhau o drefn gydweithredol y tair gwlad); 3 aelod o staff i gyflawni swyddogaethau sy'n ymwneud ag ymchwil; a 5 aelod o staff i reoli elfennau comisiynu a chaffael cylch gwaith yr uned, sy'n dod â chyfanswm nifer y staff sy'n ymdrin â chymwysterau i 60.
- 40 Yn ogystal â'r rhain, bydd angen 20 aelod o staff corfforaethol ychwanegol i gefnogi'r Comisiynydd, a'r Bwrdd Cynghori. Bydd angen 32 aelod o staff, gan gynnwys 11 o aelodau'r Bwrdd, ar gyfer y strwythur staffio corfforaethol yn ei gyfanrwydd.
- 41 Nifer cyfanswm y staff ar gyfer yr opsiwn hwn, gan gynnwys y Comisiynydd, yw 92.

Cyfrifiadau

Costau refeniw: cost y prosiect i roi'r sefydliad newydd ar waith

- 42 Wrth brisio cost y prosiect i roi'r sefydliad newydd ar waith, gwelwyd ei bod yn debyg i'r costau cyfredol, heb gynnwys y costau sy'n ymwneud â ffrydiau gwaith Adnoddau Dynol a Lleoliad.

Tabl 9

Cost y prosiect i roi'r sefydliad ar waith	2015-2016	Parhaus	Ffynhonnell / Rhagdybiaeth
Cymwysterau Cymru – Tîm y Prosiect Trosglwyddo	560,000		Cyflogau, gan gynnwys argostau
Cyngor cyfreithiol a phroffesiynol	200,000		Amcangyfrif
Contractwyr TGCh	250,000		Amcangyfrif
Costau eraill gweithredu'r prosiect	80,000		Teithio a chynhaliath / Arlwy / Llogi car / Llety
	£ 1,090,000	£	-

Costau refeniw: staff – swyddogaethau sy'n ymwneud â chymwysterau

- 43 Rhagdybir y bydd yr adran fewnol yn Llywodraeth Cymru yn y model hwn yn cynnwys cyfanswm nifer presennol y staff yn yr Is-adran Rheoleiddio a Chymwysterau (sef 37), yn ogystal â 15 aelod o staff rheoleiddio ychwanegol, 3 aelod o staff ymchwil ychwanegol, a 5 aelod o staff i reoli'r gweithgarwch comisiynu. Mae'r dull o gyfrifo'r costau staffio blynyddol yn defnyddio graddfeydd cyflog presennol Llywodraeth Cymru fel y'u nodir isod:

Tabl 10

Gradd	Cyflogau £	x	Costau cyflogau	Argostau %	Argostau £	2015-2016 Sefydlu	2015-2016 Gweithredu	Parhaus	Ffynhonnell / Rhagdybiaeth
<i>Y staff rheoleiddio presennol (37)</i>						650,811	911,136	1,561,947	Ffigurau Llywodraeth Cymru
<i>Amcangyfrif o staff rheoleiddio ychwanegol</i>									
G6	62,850	1	62,850	0.32	20,112				Gwybodaeth cyflogau Llywodraeth Cymru
G7	51,025	4	204,100	0.32	65,312				
SEO	39,425	3	118,275	0.27	31,934				
HEO	30,725	3	92,175	0.27	24,887				
EO	24,075	2	48,150	0.27	13,001				
TS	19,075	2	38,150	0.24	9,156				
		15	563,700		164,402				
Cost staff rheoleiddio ychwanegol, gan gynnwys argostau Pro rata am 7 mis hyd at fis Mawrth 2016						728,102		728,102	
							424,726		
<i>Amcangyfrif o staff swyddogaethau ychwil ychwanegol</i>									
G7	51,025	1	51,025	0.32	16,328				Amcangyfrifwyd ar sail cysyniad dylunio sefydliadol dros dro
SEO	39,425	2	78,850	0.27	21,290				
		3	129,875		37,618				
Cost staff rheoleiddio ychwanegol, gan gynnwys argostau Pro rata am 7 mis hyd at fis Mawrth 2016						167,493		167,493	
							97,704		
<i>Estimated additional commissioning / procurement staff</i>									
G7	51,025	1	51,025	0.32	16,328				Amcangyfrifwyd ar sail cysyniad dylunio sefydliadol dros dro
SEO	39,425	2	78,850	0.27	21,290				
HEO	30,725	2	61,450	0.27	16,592				
		5	191,325		54,209				
Cost staff rheoleiddio ychwanegol, gan gynnwys argostau Pro rata am 7 mis hyd at fis Mawrth 2016						245,534		245,534	
							143,228		
						£ 651,000	£ 1,577,000	£ 2,703,000	

- 44 Mae cost y staff ychwanegol yn 2015-2016 ar gyfer y 7 mis rhwng mis Medi 2015 a mis Mawrth 2016.

- 45 Mae'r gost hon ar gyfer staff sy'n cyflawni swyddogaethau sy'n ymwneud â chymwysterau yn debyg i'r hyn a geir yn Opsiwn 1b ar gyfer staff sy'n cyflawni swyddogaethau o'r fath.

Costau refeniw: staff - corfforaethol

- 46 Mae'r costau staffio corfforaethol yn cynnwys costau cyflogau ychwanegol rôl y Comisiynydd, ei staff gweinyddol a'r Bwrdd Llywodraethu. Cyfrifir cost flynyddol swyddogion corfforaethol o dan Opsiwn 2 isod:

Tabl 11

Gradd	Cyflog cyfartalog £	x	Cyflogau / ffioedd	Argostau %	Argostau £	2015-16	Parhaus	Ffynhonnell / Rhagdybiaeth
<i>Bwrdd Llywodraethu</i>								
Cadeirydd	35,000	1	35,000		-	20,417	35,000	Ffioedd, dim argostau, gan gynnwys teithio a chynhaliadaeth
Aelodau	7,500	10	75,000		-	43,750	75,000	Ffioedd, dim argostau, gan gynnwys teithio a chynhaliadaeth
<i>y Tim Corfforaethol</i>								
Pennaeth Gwasana	55,500	1	55,500	0.32	17,760			
Cynorthwy-ydd Gw	42,850	1	42,850	0.27	11,570			
Cynorthwy-ydd Per	33,900	1	33,900	0.27	9,153			
Cymorth Tim / staff	25,750	1	25,750	0.24	6,180			
Cymorth TG	42,850	1	42,850	0.27	11,570			
Cymorth cyllid	42,850	1	42,850	0.27	11,570			
Cymorth Adnoddau	42,850	1	42,850	0.27	11,570			
Dirprwy Gomisiyny	62,850	1	62,850	0.32	20,112			
Swyddogion ymchv	33,900	3	101,700	0.27	27,459			
Swyddogion polisi	42,850	4	171,400	0.27	46,278			
Cynorthwywyr ymc	25,750	2	51,500	0.24	12,360			
Swyddog materion	42,850	1	42,850	0.27	11,570			
Pennaeth cylathref	55,500	1	55,500	0.32	17,760			
Cynorthwy-ydd cyft	33,900	1	33,900	0.27	9,153			
		31	806,250		224,063			
Cyfanswm cost y staff corfforaethol ychwanegol, gan gynnwys argostau					1,030,313		1,030,313	
Pro rata am 7 mis hyd at fis Mawrth 2016						601,016		
<i>Comisiynydd</i>					-	165,000	165,000	Amcangyfrif yn cynnwys argostau
						£ 830,000	£ 1,305,000	Mae'r ffigurau wedi'u talgrynnu i'r £1,000 agosaf

- 47 Ar gyfer y flwyddyn lawn y mae'r gost ar gyfer y Comisiynydd yn 2015-2016. Mae costau ffioedd aelodau'r Bwrdd ar gyfer y 7 mis rhwng mis Medi 2015 a mis Mawrth 2016.
- 48 Cyfrifwyd y costau yn seiliedig ar ddata cyfrifyddu sydd ar gael gan swyddfeydd o faint tebyg. Ni ymchwiliwyd yn fanwl i'r opsiwn hwn, a chafodd ei roi i'r neilltu yn gynnar yn y broses gan nad oedd yn bodloni meini prawf y polisi. Felly, mae posibilrwydd y gallai maint a strwythur swyddfa'r Comisiynydd fod yn wahanol iawn, gan ddibynnu ar gwmpas penodol gwaith y Comisiynydd, ac felly nifer y staff y byddai eu hangen. Amcangyfrif ceidwadol yw'r opsiwn a gyflwynir yma o gostau swyddfa Comisiynydd lle byddai 20 o staff cymorth ac a fyddai'n costio £2,172,000 yn ei blwyddyn gyntaf. Serch hynny, mae gan swyddfeydd Comisiynwyr eraill strwythur staffio o ryw 50, a fyddai'n gallu dyblu costau'r Swyddfa Comisiynydd Cymwysterau i £5,010,000 yn ei blwyddyn gyntaf. Mae'r cyfrifiadau ar gyfer y ffigurau i'w gweld yn y tabl isod.

Tabl 12

Y 12 mis cyntaf, gan amcangyfrif 20 o staff	
Cost y Bwrdd	£110,000
Cost y Comisiynydd	£165,000
Cost 20 o staff	£1,030,000
Costau ac eithrio cyflogau	£138,000
Safle	£235,000
Cyfalaf safle	£90,000
TGCh (Caledwedd a chyfalaf)	£404,000
	£2,172,000
Y 12 mis cyntaf, gan amcangyfrif 50 o staff	
Cost y Bwrdd	£110,000
Cost y Comisiynydd	£165,000
Cost 50 o staff	£2,576,000
Costau ac eithrio cyflogau	£344,000
Safle	£470,000
Cyfalaf safle	£335,000
TGCh (Caledwedd a refeniw)	£1,010,000
	£5,010,000

Costau refeniw: staff – ac eithrio cyflogau

49 Dangosir y rhain yn Nhabl 13 ac maent yn cynnwys:

- Teithio a chynhaliath ar gyfer y staff presennol, ac ar gyfer staff rheoleiddio a chorfforaethol ychwanegol ar gyfer y saith mis rhwng mis Medi 2015 a mis Mawrth 2016.
- Costau hyfforddi ar gyfer y staff presennol, ac ar gyfer staff rheoleiddio a chorfforaethol ychwanegol ar gyfer y cyfnod rhwng mis Medi 2015 a mis Mawrth 2016.
- Y costau cychwynnol sy'n gysylltiedig â hyfforddi staff i ddefnyddio systemau TGCh newydd.
- Costau recriwtio.
- Llywodraeth Cymru yn codi tâl ar y sefydliad newydd am ei TGCh.

Tabl 13

Costau Refeniw Ychwanegol: Staff – ac eithrio	2015-16 Sefydlu	2015-16 Gweithredu	Parhaus	Ffynhonnell / Rhagdybiaeth
Costau ar gyfer Staff Cymwysterau Newydd				
Recriwtio staff newydd	46,000			Yn ôl cyfartaledd CIPD o £2k y pen (23 aelod o staff)
Hyfforddiant ymlaen llaw ar y systemau newydd		28,000		Yn ôl cyfartaledd o £1,214 y pen y flwyddyn (23 aelod o staff)
Taliadau TGCh		23,000		Taliadau Llywodraeth Cymru, sef £145 y pen bob mis calendr (23)
Costau hyfforddiant arferol		16,000		Cyfartaledd o £1,214 y pen y flwyddyn (23 aelod o staff)
Teithio a chynhaliath		4,000		Cyfartaledd o £505 y pen y flwyddyn (15 aelod o staff rheoleiddio o 09.2015)
	<u>46,000</u>	<u>71,000</u>	<u>-</u>	
Costau Staff Corfforaethol Newydd				
Recriwtio staff newydd	64,000			Yn ôl cyfartaledd CIPD o £2k y pen (32 aelod o staff gan gynnwys y Bwrdd, Comisiynydd)
Hyfforddiant ymlaen llaw ar y systemau newydd		25,000		Yn ôl cyfartaledd o £1,214 y pen y flwyddyn (21 aelod o staff)
Costau hyfforddiant arferol		15,000		Yn ôl cyfartaledd o £1,214 y pen y flwyddyn (21 aelod o staff)
Teithio a chynhaliath		3,000		Cyfartaledd o £505 y pen y flwyddyn Comisiynydd + 10 (11) aelod o staff rheoleiddio o 09.2015
	<u>64,000</u>	<u>43,000</u>	<u>-</u>	
Costau Staff Arferol				
Costau hyfforddiant arferol	19,000	26,000	79,000	Cyfartaledd o £1,214 y pen y flwyddyn (37, wedyn 65 aelod o staff)
Teithio a chynhaliath	8,000	11,000	26,000	Cyfartaledd o £505 y pen y flwyddyn (cyfanswm o 52 aelod o staff rheoleiddio)
Taliadau TGCh	27,000	38,000	113,000	Taliadau Llywodraeth Cymru, sef £145 y pen bob mis calendr
	<u>54,000</u>	<u>75,000</u>	<u>218,000</u>	
	£ 164,000	£ 189,000	£ 218,000	

- 50 Dim ond costau staff rheoleiddio a'r Comisiynydd sydd wedi eu prisió at ddibenion teithio a chynhaliath.
- 51 Ni chyfrifwyd costau hyfforddi a thaliadau TGCh mewn perthynas â'r 11 o aelodau'r Bwrdd.

Costau cyfalaf: TGCh

- 52 Mae'r gost hon yn ymwneud â chaledwedd TGCh ac adnoddau swyddfa eraill y mae eu hangen i sicrhau bod swyddfa arferol yn gallu bwrw ymlaen â'i gwaith. Amcangyfrifwyd y costau drwy ddefnyddio'r un ffigurau ag a ddefnyddiwyd ar gyfer Opsiwn 3, ond wedi eu diwygio a'u cyfrifo pro rata i weddu i Opsiwn 2.

Costau cyfalaf: gosodiadau a ffitiadau

- 53 Mae'r gost hon yn ymwneud â gosodiadau a ffitiadau swyddfa yr amcangyfrifir y bydd eu hangen i ddodrefnu swyddfa arferol. Amcangyfrifwyd y costau drwy ddefnyddio'r un ffigurau ag a ddefnyddiwyd ar gyfer Opsiwn 3, ond wedi eu diwygio a'u cyfrifo pro rata i weddu i Opsiwn 2.

Costau refeniw: TGCh

- 54 Byddai angen costau ar gyfer cychwyn y sefydliad newydd o fewn Llywodraeth Cymru, sef ar gyfer ei gronfa ddata, ei wefan, a'i drefniadau rheoli cofnodion a chyfathrebu'n fewnol. Rhagdybiwyd y byddai contractwr yn cael ei gadw i gynnal y gronfa ddata a fyddai'n cael ei defnyddio o dan Opsiwn 2. Mae ffioedd ar gyfer hynny wedi eu cynnwys yn y costau refeniw ar gyfer TGCh.
- 55 Byddai'r costau sy'n gysylltiedig â chaledwedd yn ymwneud â phrynu adnoddau bach newydd, megis ffonau symudol, offer argraffu ac offer fideogynadledda, sy'n codi'n barhaus.

Tabl 14

Costau refeniw: TGCh	2015-2016 Sefydlu	2015-2016 Gweithredu	Parhaus	Ffynhonnell / Rhagdybiaeth
COSTAU SEFYDLU				
Ymgynghori ar wefannau	78,000			Pob cost yn cynnwys TAW
Cronfa Ddata Cymwysterau Cymeradwy yng Nghymru	115,000			
Adnoddau TGCh Llywodraeth Cymru	144,000			
Gartner	19,000			
COSTAU GWEITHREDU				
Ymgynghori ar wefannau			32,000	
Cronfa Ddata Cymwysterau Cymeradwy yng Nghymru			29,000	
Contractwr		29,000	50,000	Cyfateb i Fand F
Caledwedd			27,000	
	£ 356,000	£29,000	£138,000	

Costau refeniw: safle

- 56 Mae'r costau hyn yn cynnwys cynnal a chadw, offer swyddfa a chostau postio, a chawsant eu hamcangyfrif drwy ddefnyddio data cyfrifyddu ar gyfer sefydliad cyfatebol.

Tabl 15

Costau Refeniw: Safle	2015-2016 Sefydlu	2015-2016 Gweithredu	Parhaus	Ffynhonnell / Rhagdybiaeth
COSTAU GWEITHREDU				
Rhent	-	41,000	71,000	Defnyddio ffigurau sefydliad cyfatebol
Atgyweirio, cynnal a chadw, diogelwch	-	27,000	47,000	Defnyddio ffigurau sefydliad cyfatebol
Costau gweinyddu a swyddfa		68,000	117,000	Defnyddio ffigurau sefydliad cyfatebol
	<u>-</u>	<u>£136,000</u>	<u>£235,000</u>	

Costau refeniw: eraill, cyfreithiol a phroffesiynol

- 57 Cafodd y costau hyn eu hamcangyfrif drwy ddefnyddio data cyfrifyddu ar gyfer sefydliad cyfatebol.

Tabl 16

Costau refeniw: Eraill, Cyfreithiol a Phroffesiynol	2015-2016 Sefydlu	2015-2016 Gweithredu	Parhaus	Ffynhonnell / Rhagdybiaeth
COSTAU GWEITHREDU				
Cylathrebu		41,000	71,000	Yn seiliedig ar sefydliad cyfatebol
TGCh		30,000	51,000	Yn seiliedig ar sefydliad cyfatebol
Costau cyfreithiol a phroffesiynol		25,000	42,000	Yn seiliedig ar sefydliad cyfatebol
Yswiriant		34,000	58,000	Yn seiliedig ar £1,048 y cyflogai wedi ei gapio ar £60k
	<u>-</u>	<u>£130,000</u>	<u>£222,000</u>	

Dibrisiant

- 58 Mae'r raddfa ddibrisio wedi ei chyfrifo ar linell wastad dros gyfnod o 5 mlynedd yn dilyn y 12 mis ar ôl trosglwyddo asedau i Gymwysterau Cymru.

Tabl 17

Costau Refeniw: Dibrisiant	2015-2016 Sefydlu	2015-2016 Gweithredu	Parhaus	Ffynhonnell / rhagdybiaeth
COSTAU GWEITHREDU				
Caledwedd TGCh	0	14,000	24,000	
Gosodiadau a ffitiadau	0	11,000	18,000	
	<u>-</u>	<u>£25,000</u>	<u>£42,000</u>	

Opsiw'n 3

Rhagdybiaethau manwl

Data safle – Opsiw'n 3

- 59 Amcangyfrifwyd yr anghenion o ran gofod yn seiliedig ar 10m² i bob unigolyn. Hefyd defnyddiwyd pwynt canolog gan ddefnyddio costau safle ar ben uchaf a phen isaf y raddfa eiddo i amcangyfrif costau pellach.
- 60 Cafodd yr ardrethi busnes eu seilio ar gyfartaleddau'r diwydiant ar gyfer y troedfeddi sgwâr y byddai eu hangen er mwyn sicrhau bod safle'n addas.
- 61 Yn seiliedig ar ddealltwriaeth o'r farchnad bresennol, nid yw unrhyw breimiwm wedi ei ymgorffori wrth brisio les ar safle, nac ychwaith unrhyw gyfnod di-rent ar ddechrau'r les.
- 62 Mae rhagor o waith yn cael ei wneud mewn perthynas â lleoliad y sefydliad newydd. Caiff unrhyw newidiadau sylweddol i'r costau a amcangyfrifwyd eu nodi wrth graffu ar y Bil.

Costau eraill

- 63 Mae costau megis trydan, nwy, a dŵr; costau cyfreithiol a phroffesiynol; a chostau gweinyddiaeth swyddfa wedi eu seilio ar gostau y pen sydd wedi eu tynnu o sefydliadau cyfatebol.
- 64 Mae'r yswiriant a'r ffioedd archwilio wedi eu seilio ar sefydliad sy'n debyg o ran ei faint a chymhlethdod ei strwythur.

Cyllid

- 65 Er bod yna fwriad i'r sefydliad gynhyrchu swm bach o incwm annibynnol ymhen amser, at ddibenion priso'r costau hyn rhagdybiwyd y byddai'r sefydliad yn cael 100% o'i gyllid am ei bum mlynedd gyntaf drwy gymorth grant gan Lywodraeth Cymru.

Cyllido

- 66 Wrth amcangyfrif swm y cyllid y bydd ar Gymwysterau Cymru ei angen ar gyfer ei raglen, rhagdybir:
- mai dim ond costau mân a fydd yn rhaid eu talu ar gyfer datblygu cymwysterau, gan mai'r cyrff dyfarnu fydd yn atebol am y costau hyn;
 - na fydd unrhyw argyfwng mawr;
 - y bydd unrhyw gostau cyfathrebu mewnol neu gostau hyfforddi staff yn cael eu talu drwy'r gwasanaethau corfforaethol;

Atodiad B – Priso'r Opsiynau

- na fydd Cymwysterau Cymru ond yn meddu ar ychydig o arbenigedd pwnc (ac felly y bydd yn ei brynu i mewn pan fydd ei angen);
- y bydd Cymwysterau Cymru yn gwneud cyn lleied o waith â phosibl ar faterion yn ymwneud â'r cwricwlwm;
- y bydd unrhyw waith pwysig i ddiwygio cymwysterau neu systemau yn cael ei wneud drwy lythyr cylch gwaith a gyllidir;
- na fydd unrhyw achlysuron pan fydd angen mynd i'r llys;
- y bydd Cymwysterau Cymru yn cynnig cymorth, ond nid datblygiad proffesiynol parhaus, i ymarferwyr;
- na fydd Cymwysterau Cymru yn comisiynu Comisiwn y DU dros Gyflogaeth a Sgiliau i ddatblygu Safonau Galwedigaethol Cenedlaethol (sy'n llyncu £300k o gyllideb yr Is-adran Rheoleiddio a Chymwysterau ar hyn o bryd).

Pensiynau

- 67 Rhagdybir y bydd yr holl gyflogeion yn ymuno â Chynllun Pensiwn y Gwasanaeth Sifil ar delerau ac amodau tebyg, ac na fydd unrhyw broblemau yn codi wrth drosglwyddo staff presennol Llywodraeth Cymru.

Rheoliadau Trosglwyddo Ymgymeriadau (Diogelu Cyflogaeth) 1981

- 68 Yn yr un modd, rhagdybir na fydd unrhyw broblem mewn perthynas â Rheoliadau Trosglwyddo Ymgymeriadau (Diogelu Cyflogaeth) 1981 na Datganiad Ymarfer Swyddfa'r Cabinet, ac o ran y costau cyflogaeth a'r costau recriwtio a amcangyfrifir, y bydd pob aelod o staff yn yr Is-adran Rheoleiddio a Chymwysterau yn AdAS yn trosglwyddo i Gymwysterau Cymru.

Y farchnad gymwysterau

- 69 Amcangyfrifir na fydd effeithiau/canlyniadau rownd gyntaf y cymwysterau a gomisiynir i'w gweld nac ar gael tan fis Medi 2020 ar y cynharaf.
- 70 O ran cymwysterau cyffredinol, rhagdybir mai CBAC fydd yr unig ddarparwr hyd at y cyfnod adolygu nesaf pan fydd cyfle i gyflwyno dull newydd o gomisiynu. Gan fod hynny o leiaf 3-4 blynedd i ffwrdd, mae'n amhosibl rhagweld beth yn union fydd y gweithgarwch masnachol yn y dyfodol, ac felly ni cheisiwyd gwneud hynny.
- 71 O ran cymwysterau galwedigaethol, rhagdybir y bydd y corff newydd yn dechrau ystyried y ddarpariaeth bresennol ar gyfer amryw o sectorau'r diwydiant neu sectorau proffesiynol, ac o ganlyniad mae'n bosibl y bydd yn comisiynu cymwysterau newydd. Er y gallai hynny ddigwydd o fis Medi 2016, rhagdybir na fydd y dull gweithredu hwn yn effeithio ar y rhan fwyaf o gymwysterau galwedigaethol am o leiaf 3-4 blynedd, ac felly mae'n amhosibl rhagweld beth yn union fydd y gweithgarwch masnachol yn y dyfodol.

Staffio

- 72 O dan yr opsiwn hwn, amcangyfrifir mai 73 aelod o staff fydd cyfanswm nifer y staff yng Nghymwysterau Cymru. Bydd hynny'n cynnwys y 37 aelod o staff a gyflogir yn Is-adran Rheoleiddio a Chymwysterau Llywodraeth Cymru.
- 73 Bydd Cadeirydd a Bwrdd Llywodraethu'r sefydliad yn ychwanegol at y staff hyn, sef 11 o bobl ychwanegol, sy'n dod â chyfanswm nifer y staff ar gyfer yr opsiwn hwn i 84.

Cyfrifiadau

Costau refeniw: cost y prosiect i roi Cymwysterau Cymru ar waith

- 74 Mae cost y prosiect trosglwyddo yn cynnwys cost y prosiect i roi Cymwysterau Cymru ar waith, ond nid yw'n cynnwys y gost i Lywodraeth Cymru o gynhyrchu deddfwriaeth.

Tabl 18

Cost y prosiect i roi'r sefydliad ar waith	2015-2016	Parhaus	Ffynhonnell / Rhagdybiaeth
Cymwysterau Cymru – Tîm y Prosiect Trosglwyddo	661,000		Cyflogau, gan gynnwys argostau
Cyngor cyfreithiol a phroffesiynol	202,000		Amcangyfrif
Contractwyr TGCh	255,000		Amcangyfrif
Costau gweithredu eraill y prosiect	84,000		Teithio a chynhaliath/arlwyo //logi car/llety
	<u>£ 1,202,000</u>	<u>£</u>	<u>-</u>

Costau refeniw: staff - corfforaethol

- 75 Cyfrifwyd y costau hyn yn y disgwyl y byddai cyfran sylweddol o staff corfforaethol y sefydliad yn eu lle cyn iddo gael ei sefydlu.
- 76 Y gobaith yw y bydd y Prif Swyddog Gweithredol, ynghyd â phenaethiaid TGCh, Cyfathrebu, Cyllid ac Adnoddau Dynol yn dechrau yn eu swyddi ym mis Ebrill 2015, yn ogystal ag aelodau'r Bwrdd Cysgodol.
- 77 Dechreuodd y Prif Swyddog Gweithredol (dros dro) yn ei swydd ym mis Hydref 2014.
- 78 Bydd y gwaith o ddatblygu strwythur y sefydliad yn cael ei gwblhau erbyn mis Ionawr 2015, ond bydd yn cael ei gyflawni o fewn yr amlen gostau arfaethedig.

Atodiad B – Prisió'r Opsiynau

Tabl 19

Gradd	Cyflogau £	x	Cyflogau/ffioedd	Argostau %	Argostau £	2015-2016 Sefydlu	2015-2016 Gweithredu	Parhaus	Ffynhonnell / Rhagdybiaeth	
Amcangyfrif ar gyfer strwythur staff corfforaethol										
EB1	70,000	1	70,000	0.32	22,400				Amcangyfrif PWC (cost gyfartalog)	
EB2	65,000	2	130,000	0.32	41,600	35,750				
F	55,500	2	111,000	0.32	35,520	61,050				
E	42,850	6	257,100	0.27	69,417	22,675				
D	33,900	6	203,400	0.27	54,918					
C	25,750	1.5	38,625	0.27	10,429					
TS	20,950	6	125,700	0.24	30,168					
		24.5	935,825		264,452			1,200,277		
Pro rata am 7 mis hyd at fis Mawrth 2016							700,161			
Bwrdd Llywodraethu										
Cadeirydd	35,000	1	35,000	-					Amcangyfrif o ffioedd, gan gynnwys teithio a chynhaliadaeth	
Aelodau	7,500	10	75,000	-					- dim argostau	
		13	125,000							
Pro rata ar gyfer mis Ebrill – Awst 2016							52,083			
Pro rata am 7 mis hyd at fis Mawrth 2016								72,917		
Prif Weithredwr (pro rata cyn ac ar ôl sefydlu)							68,750	96,250	165,000	Amcangyfrif o gyflogau plws argostau.
						£ 240,000	£ 869,000	£ 1,490,000	Mae'r figurau wedi'u talgrynnu i'r £1,000 agosaf	

Costau refeniw: staff – swyddogaethau sy'n ymwneud â chymwysterau

- 79 Cyfrifwyd y costau hyn drwy greu cyfanswm newydd o ran nifer y staff a fyddai'n cyflawni swyddogaethau'r sefydliad arfaethedig. Y gobaith yw y bydd y rhan fwyaf o staff yr Is-adran Rheoleiddio a Chymwysterau yn AdAS yn trosglwyddo i'r sefydliad newydd, ond er hynny y gred oedd na ddylid trosglwyddo'r strwythurau presennol i'r sefydliad newydd. Felly nid yw'r costau hyn yn berthnasol i gostau staff rheoleiddio presennol.
- 80 Amcangyfrifir y costau ar begwn uchaf graddfeydd cyflog presennol Llywodraeth Cymru.

Tabl 20

Gradd	Cyflogau £	x	Costau Cyflogau	Argostau %	Argostau £	2015-2016 Sefydlu	2015-2016 Gweithredu	Parhaus	Ffynhonnell / Rhagdybiaeth
Amcangyfrif ar gyfer strwythur staff swyddogaethau									
SCS	85,000	2	170,000	0.32	54,400				Pegwn uchaf bandiau cyflog Llywodraeth Cymru
F	55,500	9	499,500	0.32	159,840				
E	42,850	12	514,200	0.27	138,834				
D	33,900	11	372,900	0.27	100,683				
C	25,750	11	283,250	0.27	76,478				
TS	20,950	2	41,900	0.24	10,056				
		47	£ 1,881,750		£ 540,291				
Cyfanswm y costau staffio y flwyddyn ar gyfer Cymwysterau Cymru					£ 2,422,041	-		2,422,041	
Pro rata o fis Medi 2015.							1,211,020		
Cost bresennol flynyddol staff swyddogaethau yr Is-adran Rheoleiddio a Chymwysterau									
37 aelod o staff					£ 1,561,947				
Pro rata						650,811			
						£ 651,000	£ 1,211,000	£ 2,422,000	Mae'r figurau wedi'u talgrynnu i'r £1,000 agosaf

Costau refeniw: staff – uned noddi

- 81 Amcangyfrifwyd y byddai'r strwythur canlynol ar gyfer Uned Noddi Cymwysterau Cymru yn cynnwys 4 aelod o staff.

Tabl 21

Gradd	Cylogau £	x	Costau cyflogau : Argostau %	Argostau £	2015-2016 Sefydlu	2015-2016 Gweithredu	Parhaus	Ffynhonnell / Rhagdybiaeth
<i>Amcangyfrif ar gyfer strwythur staffio'r Uned Noddi</i>								
F	£55,500	1	55,500	0.32	17,760			Pegwn uchaf bandiau cyflog Llywodraeth Cymru
E	£42,850	1	42,850	0.27	11,570			
D	£33,900	1	33,900	0.27	9,153			
C	£25,750	1	25,750	0.27	6,953			
		4	158,000		45,435			
Cyfanswm cost y fwyddyn ar gyfer staff yr Uned Noddi					203,435	-	203,435	
Pro rata o fis Medi 2015.							101,718	
					<u>£ -</u>	<u>£ 102,000</u>	<u>£ 203,000</u>	

- 82 Bydd y gwaith o lunio strwythur yr Uned Noddi wedi ei gwblhau erbyn Ionawr 2015. Caiff unrhyw newidiadau sylweddol i'r costau a amcangyfrifwyd eu nodi wrth graffu ar y Bil.

Costau refeniw: staff – ac eithrio cyflogau

- 83 Mae'r costau mwyaf sylweddol, nad ydynt yn cynnwys cyflogau, yn ymwneud â recriwtio ac adleoli staff, yn ogystal â chostau hyfforddi a thaliadau teithio ychwanegol ar gyfer staff sy'n gorfod gweithio o leoliad gwahanol o dan y telerau a'r amodau presennol.

Tabl 22

Costau refeniw: staff – ac eithrio cyflogau	2015-2016 Sefydlu	2015-2016 Gweithredu	Parhaus	Ffynhonnell/Rhagdybiaeth
COSTAU SEFYDLU				
Recriwtio staff (corfforaethol a rheoleiddio)	144,000			Yn ôl cyfartaledd CIPD o £2k y pen
Hyfforddiant ymlaen llaw ar systemau newydd i staff newydd	87,000			Yn ôl cyfartaledd o £1,214 y pen y fwyddyn
Adleoli	10,000			Cyfrifiad PwC
COSTAU GWEITHREDU				
Costau hyfforddiant arferol			87,000	Cyfartaledd o £1,214 y pen y fwyddyn
Costau sefydlu: pro rata ar gyfer mis Ebrill – Awst 2016	45,000			37 aelod o staff
Costau gweithredu: pro rata am 7 mis hyd at fis Mawrth 2016		51,000		
Teithio a chynhaliadau			36,000	Cyfartaledd o £505 y pen y fwyddyn
Costau sefydlu: pro rata ar gyfer mis Ebrill – Awst 2016	8,000			37 aelod o staff
Costau gweithredu: pro rata am 7 mis hyd at fis Mawrth 2016		21,000		
Tocynnau teithio dros ben			40,000	40 ceiniog y filltir, 30 aelod o staff, cyfartaledd o
Costau gweithredu: pro rata am 7 mis hyd at fis Mawrth 2016		23,000		15 milltir 156 wythnos 5 diwrnod
	<u>£294,000</u>	<u>£95,000</u>	<u>£163,000</u>	

Costau refeniw: safle

- 84 Mae'r costau hyn yn cynnwys cynnal a chadw, offer swyddfa a chostau postio.

Tabl 23

Costau Refeniw: Safle	2015-2016 Sefydlu	2015-2016 Gweithredu	Parhaus	Ffynhonnell/Rhagdybiaeth
COSTAU GWEITHREDU				
Rhent	102,000	143,000	245,000	Yn seiliedig ar £513 y m2, 10 m2 y pen, 72 o bobl
Adnoddau	80,000	112,000	192,000	Yn seiliedig ar £2,207 y pen, 72 o bobl
Trethi	32,000	44,000	77,000	Yn seiliedig ar c£6 y droedfedd sgwâr, 110 troedfedd sgwâr y pen, 72 o bobl
Atgyweirio a chynnal a chadw	18,000	25,000	42,000	Yn seiliedig ar £500 y pen a 72 o bobl
Costau gweinyddu a chostau swyddfa		112,000	192,000	Yn seiliedig ar £2,200 y pen a 72 o bobl
	<u>232,000</u>	<u>£436,000</u>	<u>£748,000</u>	

- 85 Mae rhagor o waith yn cael ei wneud mewn perthynas â lleoliad y sefydliad newydd. Caiff unrhyw newidiadau sylweddol i'r costau a amcangyfrifwyd eu nodi wrth graffu ar y Bil.

Costau refeniw: eraill, cyfreithiol a phroffesiynol

- 86 Mae'r costau hyn yn amcangyfrif o gostau cyfieithu, gwasanaethau ariannol, gwasanaethau cyfreithiol ac yswiriant.

Tabl 24

Costau Refeniw: Cyfreithiol a Phroffesiynol	2015-2016 Sefydlu	2015-2016 Gweithredu	Parhaus	Ffynhonnell/Rhagdybiaeth
COSTAU GWEITHREDU				
Archwilio mewnol ar gontract allanol		14,000	24,000	Gwybodaeth gan sefydliadau a'r sector
Cyflogres ar gontract allanol		11,000	18,000	CLG Llywodraeth Cymru gydag Estyn (100 o gyflogeion) = c£15k
Costau cyfreithiol a phroffesiynol		88,000	150,000	Yn seiliedig ar £1,700 y pen a 72 o bobl
Archwilio allanol		25,000	42,000	diw./bl. 31.03.2013, £30k am archwilio allanol Estyn
Yswiriant		42,000	72,000	Yn seiliedig ar £1,048 y cyflogai, wedi ei gapio ar £60k
	<u>-</u>	<u>£180,000</u>	<u>£306,000</u>	

Costau refeniw: TGCh**Tabl 25**

Costau refeniw: TGCh	2015-2016 Sefydlu	2015-2016 Gweithredu	Parhaus	Ffynhonnell/rhagdybiaeth
COSTAU SEFYDLU				
Ymgynghori	457,000			Pob cost yn cynnwys TAW
WAN	22,000			
Meddalwedd arall	101,000			
COSTAU GWEITHREDU				
Ymgynghori			95,000	
WAN			87,000	
Meddalwedd arall			70,000	
Cymorth Microsoft			47,000	
Caledwedd			27,000	
	<u>580,000</u>	<u>0</u>	<u>326,000</u>	

Costau cyfalaf: TGCh

- 87 Dechreuwyd ar brosiect cwmpasu yn yr hydref 2013 i benderfynu pa seilwaith TGCh fyddai fwyaf addas ar gyfer y sefydliad newydd. Datblygwyd model hybrid, sef cyfuniad o seilwaith cwmwl a seilwaith sy'n defnyddio gweinyddion, a hwn sy'n gyfrifol am gyfran fawr o'r costau hyn.

Tabl 26

Costau cyfalaf TGCh	2015-2016 Sefydlu	2015-2016 Gweithredu	Parhaus	Ffynhonnell/rhagdybiaeth
COSTAU SEFYDLU				
Trwyddedu a chymorth cwmwl*	247,000			
Caledwedd	204,000			
WAN	213,000			
COSTAU GWEITHREDU				
Darparu gwesteiwr a thrwyddedu			178,000	Ffi deirblwydd: darparu gwesteiwr, trwyddedu
	<u>£ 664,000</u>	<u>£0</u>	<u>£178,000</u>	

Dibrisiant

- 88 Mae'r raddfa ddibrisio wedi ei chyfrifo ar linell wastad dros gyfnod o 5 mlynedd wedi 12 mis ar ôl trosglwyddo asedau i Gymwysterau Cymru.

Tabl 27

Costau Refeniw: Dibrisiant	2015-2016 Sefydlu	2015-2016 Gweithredu	Parhaus	Ffynhonnell / rhagdybiaeth
COSTAU GWEITHREDU				
Caledwedd TGCh	0	24,000	40,800	
Gosodiadau a ffitiadau	0	26,000	45,200	
	<u>-</u>	<u>£50,000</u>	<u>£86,000</u>	

Costau'r rhaglen

89 Nid yw'r costau canlynol wedi eu cynnwys yn y gwariant a amcangyfrifir ar gyfer rhaglen Cymwysterau Cymru:

- Costau rhedeg y system sy'n disodli'r Gronfa Ddata Cymwysterau Cymeradwy yng Nghymru (wedi eu cynnwys yn y costau TGCh).
- Costau adnoddau (wedi eu cynnwys yn y costau staffio).
- Costau cyfieithu (wedi eu cynnwys yn y costau cyfreithiol a phroffesiynol).
- Costau cyfreithiol (wedi eu cynnwys yn y costau cyfreithiol a phroffesiynol).
- Offer swyddfa / costau postio (wedi eu cynnwys yng nghostau'r safle).
- Costau cynnal a chadw (wedi eu cynnwys yng nghostau'r safle).

90 Mae'r costau hyn yn gyson â llinell gwariant cyllidebol presennol yr Isdran Rheoleiddio a Chymwysterau

Tabl 28

Costau'r Rhaglen	2015-2016 Sefydlu	2015-2016 Gweithredu	Parhaus	Ffynhonnell/Rhagdybiaeth
Regulation / Quality Assurance				
Monitro	62,500	87,500	150,000	
Arbenigedd pwnc/Technegol	47,917	67,083	115,000	
Gorfodi	4,167	5,833	10,000	
Tribiwnlys a chostau eraill	4,167	5,833	10,000	
Datblygu meini prawf	83,333	116,667	200,000	
Grantiau ar gyfer y Gymraeg	375,000	525,000	900,000	
Cyfathrebu				
Arolygon blynyddol o hyder y cyhoedd	31,250	43,750	75,000	
Ymgyrchoedd hyrwyddo a chodi ymwybyddiaeth	20,833	29,167	50,000	
Gwybodaeth ar gyfer rhanddeiliaid	20,833	29,167	50,000	
Cymorth i ganolfannau ac ymarferwyr	20,833	29,167	50,000	
Diwrnod canlyniadau	8,333	11,667	20,000	
Ymgysylltu Ymchwil a Datblygu				
Ymgynghori/ymgysylltu – rhanddeiliaid	50,000	70,000	120,000	
Ymchwil	83,333	116,667	200,000	
Cymaroldeb	62,500	87,500	150,000	
Data ystadegol gan gynnwys dadansoddiadau	20,833	29,167	50,000	
Datblygu trefniadau rheoleiddio a sicrhau ansawdd	29,167	40,833	70,000	
Sganio'r gorwel	12,500	17,500	30,000	
Llywodraethu				
Costau cyhoeddi (gan gynnwys cyfieithu)	12,500	17,500	30,000	
Cynhyrchu adroddiadau (gan gynnwys cyhoeddi adroddiad blynyddol sglei)	8,333	11,667	20,000	
Archifo	4,167	5,833	10,000	
Oftqual	12,500	17,500	30,000	
Datblygiad proffesiynol i'r staff	16,667	23,333	40,000	
	<u>£ 991,667</u>	<u>£1,388,333</u>	<u>£2,380,000</u>	

Ffynonellau gwybodaeth

- 91 Defnyddiwyd gwybodaeth sydd ar gael i'r cyhoedd mewn perthynas â'r sefydliadau cyfatebol:

Ofqual
Awdurdod Cymwysterau'r Alban
Comisiynydd Plant Cymru
Estyn
Cyngor Addysgu Cyffredinol Cymru
Comisiynydd Pobl Hŷn Cymru
Comisiynydd y Gymraeg
Cyngor Gofal Cymru

- 92 Cafwyd rhagor o wybodaeth drwy gydweithrediad:

Comisiynydd Pobl Hŷn Cymru
Cyngor Gofal Cymru
Cyfoeth Naturiol Cymru
CCAUC
Amgueddfeydd Cenedlaethol Cymru
Cyngor Caerdydd
Cyngor Bwrdeistref Sirol Rhondda Cynon Taf
Prifysgol Metropolitan Caerdydd
Partneriaeth Cydwasanaethau GIG Cymru
Gwasanaeth Sifil Gogledd Iwerddon
Microsoft

- 93 Yn ogystal, wrth ddatblygu rhannau o'r wybodaeth brisio, manteisiwyd ar arbenigedd a ddarparwyd gan PricewaterhouseCoopers a Llywodraeth Cymru.

Atodiad C - GEIRFA

Achredu

Yng nghyd-destun y sefyllfa yng Nghymru o ran cymwysterau ar hyn o bryd, mae 'achredu' yn cyfeirio at benderfyniad gan Lywodraeth Cymru (a rheoleiddwyr eraill y DU yn eu hawdurdodaethau gwahanol) bod cymwysterau yn bodloni meini prawf dynodedig. Fodd bynnag, yn aml defnyddir y term yn anffurfiol mewn nifer o ffyrdd eraill: er enghraifft efallai y bydd cyrff dyfarnu yn defnyddio'r term 'achredu' i ddiffinio'r broses o gymeradwyo canolfannau i ddarparu eu cymwysterau, ac efallai y bydd asiantaethau ansawdd eraill yn defnyddio'r term i ddiffinio stamp ansawdd ar gyrsiau darparwyr. Oherwydd hyn, ac er mwyn bod yn glir, mae'r Bil yn defnyddio'r gair 'cymeradwyo' wrth sôn am benderfyniadau tebyg a wneir gan Gymwysterau Cymru. Nid yw'n defnyddio'r term 'achredu' wrth ddiffinio swyddogaethau, dyletswyddau a phwerau Cymwysterau Cymru.

Cymhwyster sydd wedi'i gymeradwyo

Fersiwn o gymhwyster sydd wedi'i gymeradwyo gan Gymwysterau Cymru o dan Ran 4 o'r Bil (cymeradwyo cymwysterau).

Trefniadau asesu

Trefniadau yw'r rhain ar gyfer asesu sgiliau, gwybodaeth a dealltwriaeth berthnasol mewn perthynas â chymhwyster. Gallai'r trefniadau hyn gynnwys, er enghraifft, bob agwedd ar ddatblygu, llunio a gweinyddu adnoddau asesu (er enghraifft arholiadau) yn ogystal ag, er enghraifft, ddyluniad yr asesiadau, eu dilysrwydd a pha mor ddibynadwy y maent.

Asesu cymhwyster

Mae gwahanol ystyron i hyn, yn dibynnu ar y cyd-destun. Yng nghyd-destun y Bil, mae'n cyfeirio'n gyffredinol at yr hyn y mae dysgwyr yn ei gyflawni er mwyn dangos bod ganddo'r wybodaeth, y sgiliau a'r ddealltwriaeth sydd eu hangen er mwyn bodloni gofynion cymhwyster. Fodd bynnag, gall gyfeirio hefyd at waith aseswr, arholwr neu farciwr i werthuso'r gwaith hwnnw.

Cyrhaeddiad

Mae cyrhaeddiad yn nodi'r wybodaeth, y sgiliau a'r ddealltwriaeth y mae disgwyl i ddysgwyr eu dangos neu fod wedi'u dangos er mwyn ennill cymhwyster, neu radd neu ganlyniad penodol mewn cymhwyster. Gellir ei fesur ar lefel unigolyn neu ar draws cohort penodol, a gall fod ar sail yr hyn a gyflawnwyd gan weddill y cohort. Gellir ei fesur yn feintiol (er enghraifft, ar sail canran y dysgwyr a enillodd radd C neu'n uwch) neu'n ansoddol (er enghraifft, i ba raddau y dangosodd dysgwyr gymhwysedd mewn sgil benodol).

Dyfarnu

Mewn iaith bob dydd, mae 'dyfarnu' yn gallu golygu pob math o bethau, yn dibynnu ar y cyd-destun. Gall gyfeirio at yr holl waith a wneir gan gorff dyfarnu mewn perthynas â darparu, asesu a dyfarnu cymwysterau. Gall gyfeirio weithiau at ran benodol o'r broses, er enghraifft penderfyniad 'pwyllgor

dyfarnu' ynghylch lle dylid pennu terfynau graddau cymhwyster. Fe'i defnyddir weithiau hefyd i gyfeirio at y foment pan roddir tystysgrif neu wobr i ymgeisydd. Yn y Bil, mae'n cyfeirio at y broses gyfan o ddarparu cymwysterau i ddysgwyr, lle caiff y dysgwyr hynny eu hasesu'n gyfangwbl neu'n bennaf yng Nghymru. Dyfernir cymhwyster yng Nghymru, at ddibenion y Bil, os oes yna, neu os disgwylir yn rhesymol y bydd yna unigolion sy'n dymuno ennill y cymhwyster sydd, neu a fydd, neu y gellir disgwyl yn rhesymol iddynt gael eu hasesu mewn perthynas â'r cymhwyster yn gyfangwbl neu'n bennaf yng Nghymru.

Corff dyfarnu

Person (sefydliad fel rheol) sy'n dyfarnu, neu'n cynnig dyfarnu cymhwyster. 'Corff dyfarnu' yw'r term a ddefnyddir yn y Bil hwn gan ei fod yn fwy cyfarwydd i'r rhan fwyaf o randdeiliaid na 'sefydliad dyfarnu', sydd hefyd yn cael ei ddefnyddio weithiau.

Ymgeisydd

Dysgwr yw ymgeisydd sydd wedi'i gofrestru, neu a allai gael ei gofrestru ar gyfer cymhwyster.

Canolfan (neu 'Ddarparwr Dysgu')

Sefydliad sy'n cofrestru dysgwyr ar gyfer cymwysterau ac sydd â phob math o gyfrifoldebau o ran darparu a rheoli gweithgareddau asesu (ac weithiau o ran asesu perfformiad ymgeiswyr, yn benodol mewn perthynas ag arsylwi perfformiad neu farcio asesiadau 'mewnol'). Mae canolfannau yn ymwneud â Chyrff Dyfarnu ar ran ymgeiswyr. Mae'n beth prin i ymgeiswyr ymwneud yn uniongyrchol â Chyrff Dyfarnu. Fel arfer, sefydliadau addysgol, darparwyr hyfforddiant neu gyflogwyr yw canolfannau.

Tystysgrif

Cofnod o'r credyd a enillwyd neu o'r cymhwyster a ddyroddwyd gan gorff dyfarnu.

Comisiynu

Y broses o ddod i drefniant gyda darparwr gwasanaethau, fel y trefniadau hynny a ddisgrifir yn y Bil mewn perthynas â threfniadau i ddatblygu Cymwysterau Blaenoriaethol Cyfyngedig.

Cyfatebiaeth

I ba raddau y mae cymwysterau yn debyg i gymwysterau eraill, yn nhermau lefel anhawster; dilysrwydd yr asesiad; yr wybodaeth, y sgiliau a'r ddealltwriaeth sy'n ofynnol; neu unrhyw nodweddion eraill y gellir eu cymharu. Fel rheol, caiff cymwysterau, a data am gymwysterau a enillwyd, eu cymharu dros gyfnod o amser yn ogystal ag ar draws cyrff dyfarnu. Mae'n anoddach cymharu rhwng pynciau, ond gall datganiadau cyffredin am y math o sgiliau a ddisgwylir ar wahanol lefelau fod o gymorth.

Credyd

Defnyddir 'credyd' yn y Bil i gyfeirio at y gydnabyddiaeth a roddir am gyflawni *rhan* o gymhwyster. Gellir ei ddefnyddio hefyd, o'i ddefnyddio gyda gwerth rhifol, i gymharu gwerth cymharol gwahanol gymwysterau, neu rannau o gymwysterau.

Y Gronfa Ddata Cymwysterau Cymeradwy yng Nghymru (DAQW)

Datblygwyd y gronfa ddata hon er mwyn rhannu gwybodaeth am gymwysterau gyda darparwyr dysgu. Y nod yw disodli'r gronfa ddata hon ag un newydd, Cymwysterau yng Nghymru, a gyhoeddir gan Gymwysterau Cymru.

Darparu/cyflenwi cymwysterau

Mae 'darparu/cyflenwi cymwysterau' yn cyfeirio at y camau ymarferol a gymerir gan gyrff dyfarnu i weinyddu cymwysterau. Mae'r gwaith hwn yn cynnwys cynllunio, cynhyrchu, cyfieithu a dosbarthu papurau, tasgau, cynlluniau marcio, deunydd cymorth addysgu ac adnoddau eraill (cylchlythyrau, adnoddau sesiynau DPP, a sesiynau un-i-un), recriwtio a hyfforddi arholwyr, trefnu cyfarfodydd i arholwyr a chymedrolwyr, creu data fel sail i benderfyniadau dyfarnu, cynhyrchu'r canlyniadau, ymateb i ymholiadau yn dilyn canlyniadau, a chreu tystysgrifau. Mae canolfannau yn chwarae rhan fawr yn y gwaith o asesu cymwysterau. Maent yn cofrestru ar gyfer arholiadau, yn gweinyddu ac yn goruchwyllo ac yn cynllunio tasgau neu brofion, yn marcio, yn cymedroli ac yn dilysu.

Addysgu

Cyfrifoldeb canolfannau yw'r gwaith o addysgu cwrs astudio sy'n arwain at gymhwyster. Mae Estyn (Arolygiaeth Ei Mawrhydi dros Addysg a Hyfforddiant yng Nghymru) yn arolygu ansawdd a safonau darparwyr addysg a hyfforddiant yng Nghymru.

Lefel mynediad

Y lefel mynediad yw lefel isaf y Fframwaith Cymwysterau Cenedlaethol yng Nghymru, Lloegr a Gogledd Iwerddon. Mae cymwysterau ar y lefel hon yn cydnabod sgiliau a gwybodaeth sylfaenol a'r gallu i gymhwyso'r hyn a ddysgwyd i sefyllfaoedd bob dydd o dan gyfarwyddyd neu oruchwyliaeth uniongyrchol.

Asesu allanol

Yn gyffredinol, mae hyn yn cyfeirio at ddull asesu lle pennir papurau, aseiniadau a/neu dasgau gan y corff dyfarnu, i'w cwblhau dan amodau penodedig (gan gynnwys manylion goruchwyllo a hyd y cyfnod a ganiateir), a gaiff eu marcio gan y corff dyfarnu. Fodd bynnag, mae yna amrywiadau ar hyn lle, er enghraifft, bydd corff dyfarnu yn marcio atebion ymgeiswyr i gwestiynau sydd wedi'u pennu gan ganolfan.

Amod capio ffioedd

Amod arbennig sy'n cyfyngu ar y swm a godir gan gorff cydnabyddedig mewn perthynas â dyfarnu cymhwyster a gymeradwywyd ac a gyllidwyd yn

gyhoeddus neu am ddarparu unrhyw wasanaeth neu gyfleuster mewn perthynas â dyfarnu cymhwyster a gymeradwywyd.

Meini prawf cydnabod

Bydd Cymwysterau Cymru yn pennu ac yn cyhoeddi meini prawf cydnabod i'w bodloni wrth gydnabod corff dyfarnu yn gyffredinol.

Gradd

Pwynt ar raddfa perfformiad a ddefnyddir i wahaniaethu rhwng pwyntiau cyrhaeddiad o fewn cymhwyster.

Asesu mewnol

Dull asesu nad yw'n gorfod cyflawni amodau arholi llawn a lle, fel rheol, mae'r Ganolfan yn chwarae rôl asesu fwy na'r corff dyfarnu. Fel rheol, y corff dyfarnu fydd yn nodi'r rheolaethau penodol ynghylch sut dylid asesu ymgeiswyr a'r amodau ar gyfer gweinyddu hyn.

Dysgwr

Person sy'n dilyn rhaglen ddysgu, yn bwriadu ei dilyn neu'n debygol o'i dilyn. Efallai mai rhaglen ddysgu yw hon sy'n paratoi dysgwyr am gymhwyster. Unwaith bydd dysgwr wedi cofrestru ar gyfer cymhwyster neu wedi cael ei gofrestru, cyfeirir ato ef neu hi fel 'ymgeisydd' yn aml.

Rhaglenni Dysgu

Y prif gyfrwng cynllunio, dyrannu, darparu a monitro o dan y fframwaith cynllunio a chyllido ôl-16 newydd, a phob rhaglen ddysgu yn cael ei diffinio yn ôl ei phwrpas, ei chanlyniadau a'i hallbynnau. Pecynnau dysgu yw Rhaglenni Dysgu sydd â phwrpas clir a chanlyniadau penodol.

Lefel

Mae 'lefel' yn dynodi'r anhawster cymharol, y cymhlethdod a/neu raddau'r cyrhaeddiad, a/neu i ba raddau y mae'r dysgwr wedi gweithredu'n annibynnol.

Cynllun marcio

Cynllun yn nodi manylion sut caiff marciau eu dyfarnu mewn perthynas ag uned neu elfen asesu benodol. Fel rheol, mae cynllun marcio yn nodi'r math o atebion/camau sy'n dderbyniol ar gyfer cwestiynau/tasgau neu rannau o gwestiynau/tasgau, ac yn nodi faint o gredyd y dylid ei roi am bob un.

Cymedroli

Y broses ar gyfer monitro sut caiff asesiadau eu marcio mewn canolfannau er mwyn gwneud yn siwr y dilynir y safonau gofynnol; proses a ddefnyddir i addasu canlyniadau, lle bo angen, er mwyn sicrhau bod y canlyniadau yn seiliedig ar y safon ofynnol.

Safonau Galwedigaethol Cenedlaethol

Disgrifiadau sydd wedi'u cyhoeddi, ac y cytunwyd arnynt gan arbenigwyr y sector galwedigaethol, o'r hyn y mae angen i berson ei wneud, ei wybod a'i ddeall mewn swydd er mwyn cyflawni'r rôl mewn ffordd gyson a medrus, yn

unol â'r hyn y mae cyflogwyr yn chwilio amdano. Un o'u prif amcanion yw darparu sail ar gyfer gofynion cymwysterau galwedigaethol.

Ofqual

Swyddfa Rheoleiddio Cymwysterau ac Arholiadau - un o gyrff anadrannol y Llywodraeth sydd â chyfrifoldeb dros gymwysterau yn Lloegr (a thros gymwysterau galwedigaethol yng Ngogledd Iwerddon).

Pobl ag Anawsterau Dysgu

At ddiben y Bil hwn, os oes gan berson anghenion addysg arbennig neu'n ei chael yn sylweddol anoddach dysgu o gymharu â'r rhan fwyaf o bobl o'r un oed, neu os oes ganddo anabledd sydd naill ai'n ei atal neu'n ei rwystro rhag defnyddio cyfleusterau addysg a ddarperir yn gyffredinol ar gyfer pobl ei oed.

Rhaglenni a gyllidir yn gyhoeddus

Yn cael eu cyllido gan Weinidogion Cymru neu gan Awdurdodau Lleol yng Nghymru, ac fel rhan o ymrwymadau polisi.

Rhestr o Gymwysterau Blaenoriaethol

Rhestr o gymwysterau a baratowyd ar y cyd gan Gymwysterau Cymru a Gweinidogion Cymru er mwyn nodi'r cymwysterau hynny sy'n arbennig o bwysig i Gymru.

Corff cydnabyddedig

Corff dyfarnu sydd wedi'i gydnabod gan Gymwysterau Cymru mewn perthynas â dyfarnu cymwysterau.

Cydnabod

Penderfyniad gan Gymwysterau Cymru bod corff dyfarnu yn bodloni meini prawf yn ddigonol i allu cyflwyno cymwysterau i'w cymeradwyo gan Gymwysterau Cymru a chynnig y cymwysterau hynny unwaith y cânt eu cymeradwyo.

Corff rheoleiddiol

Corff sydd wedi'i gydnabod mewn perthynas â rheoleiddio cymwysterau, megis Gymwysterau Cymru neu Ofqual.

Cymhwyster blaenoriaethol cyfyngedig

Penderfyniad gan Gymwysterau Cymru sy'n nodi nifer y fersiynau o'r cymhwyster hwnnw y bydd Gymwysterau Cymru yn fodlon eu cymeradwyo.

Y Cyngor Sgiliau Sector

Corff annibynnol sy'n gweithredu ledled y DU ac a arweinir gan gyflogwyr. Mae'n gyfrifol am ddatblygu safonau uchel ar gyfer sgiliau, er mwyn hybu cynhyrchiant, elw a thwf, a gwneud marchnadoedd y DU a marchnadoedd tramor yn fwy cystadleuol.

Manyleb

Disgrifiad cyflawn - gan gynnwys agweddau gorfodol a dewisol - o gynnwys, trefniadau asesu a gofynion perfformiad cymhwyster.

Amodau trosglwyddo

Amod arbennig lle bydd Cymwysterau Cymru yn rhoi cyfarwyddyd i gorff dyfarnu drefnu i gorff arall ddyfarnu cymhwyster y cymeradwywyd y corff cyntaf i wneud. Dim ond mewn achosion eithriadol y byddai hyn yn digwydd, lle byddai dysgwyr mewn perygl o beidio â chwblhau eu cymwysterau am nad yw'r corff dyfarnu cyntaf yn cydymffurfio â'r gofynion.

Cymhwyster blaenoriaethol anghyfngedig

Cymhwyster blaenoriaethol nad yw'n ddarostyngedig i'r penderfyniad ynghylch cymwysterau blaenoriaethol cyfyngedig.

Talfyriadau

ACCAC	Awdurdod Cymwysterau, Cwricwlwm ac Asesu Cymru cyn 2006
Safon UG/Uwch	Y prif gymwysterau cyffredinol (nad ydynt yn alwedigaethol) ar lefel 3 a gymerir rhwng 16 ac 19 oed
CCEA	Cyngor Cwricwlwm, Arholiadau ac Asesu Gogledd Iwerddon
TGAU	Tystysgrif Gyffredinol Addysg Uwchradd
QQI	Sefydlwyd <i>Quality and Qualifications Ireland</i> yn 2012 fel asiantaeth integredig newydd (gan ddisodli'r <i>Further Education and Training Awards Council</i> , yr <i>Higher Education and Training Awards Council</i> ac Awdurdod Cymwysterau Cenedlaethol Iwerddon, a chan ymgorffori swyddogaethau Bwrdd Ansawdd Prifysgolion Iwerddon). Mae QQI yn gyfrifol am sicrhau ansawdd addysg bellach ac uwch a hyfforddiant yn allanol (gan gynnwys darpariaeth Saesneg), ac mae'n dilysu rhaglenni ac yn creu gwobrau ar gyfer rhai o ddarparwyr y sectorau hyn. Mae QQI hefyd yn gyfrifol am gynnal, datblygu ac adolygu'r Fframwaith Cymwysterau Cenedlaethol.
SQA	Awdurdod Cymwysterau'r Alban yw corff cyhoeddus anadrannol gweithredol Llywodraeth yr Alban sy'n gyfrifol am achredu gwobrau addysgol. Caiff ei gyllido'n rhannol gan Gyfarwyddiaeth Addysg a Dysgu Gydol Oes Llywodraeth yr Alban.

Atodiad D – Tabl Tarddiadau

Bwriedir i'r ddogfen hon roi cymorth anffurfiol wrth gynnal dadl ar y Bil yng Nghynulliad Cenedlaethol Cymru. Er bod gofal wedi ei gymryd i sicrhau bod y ddogfen mor gywir ag y bo'n rhesymol ymarferol, nid yw'n honni bod yn awdurdodol, ac ni ddylid dibynnu arni fel pe bai'n awdurdodol.

Bwriedir i'r tablau atodedig ddarparu gwybodaeth ynghylch tarddiad y darpariaethau ym Mil Cymwysterau Cymru ac maent yn rhestru pan fo darpariaeth bresennol mewn deddfwriaeth gyfredol. Nid ydynt yn darparu canllawiau diffiniol na chyflawn, a dylid eu darllen ar y cyd â'r Bil a'r nodiadau esboniadol ar y Bil.

Yr Allwedd i'r Byrfoddau

DA 1997: Deddf Addysg 1997

DDS 2000: Deddf Dysgu a Sgiliau 2000

BIL CYMWYSTERAU CYMRU – TABL TARDDIADAU		
ADRAN/PARAGRAFF	DEDDFWRIAETH BRESENNOL	NEWID SYLWEDDOL
RHAN 1 – TROSOLWG		
1	-	-
RHAN 2 – SEFYDLU A PHRIF NODAU CYMWYSTERAU CYMRU		
2 (Sefydlu) 3 (Prif nodau)	Newydd Yn ystyried materion yn a.30(1) ac a.32(1) o DA 1997	- Mwy diffiniedig
RHAN 3 – CYDNABOD CYRFF DYFARNU		
4(1) (Cydnabod cyrff dyfarnu)	a.30(1)(e) o DA 1997	Yn rhannol
4(2)	Newydd	-
5 (Dyletswydd i osod meini prawf cydnabod cyffredinol)	a.30(1)(d) o DA 1997	-
6 (Pŵer i osod meini prawf cydnabod sy'n benodol i gymhwyster)	a.30(1)(d) o DA 1997	Mwy diffiniedig
7 (Diwygio meini prawf cydnabod cyffredinol a	a.30(1)(d) o DA 1997	-

meini prawf cydnabod sy'n benodol i gymhwyster)		
8 (Cydnabod corff dyfarnu yn gyffredinol)	a.30(1)(e) o DA 1997	-
9 (Cydnabod corff dyfarnu mewn ffordd sy'n benodol i gymhwyster)	a.30(1)(e) o DA 1997	Mwy diffiniedig
10 (Pŵer i wneud rheolau ynghylch ceisiadau am gydnabyddiaeth)	Newydd	-
11 (Darpariaeth bellach ynghylch cydnabyddiaeth)	Newydd	-
12 (Cydnabod: dehongli)	Newydd	-
RHAN 4 – CYMERADWYO CYMWYSTERAU		
13 (Dyletswydd i lunio rhestr o gymwysterau blaenoriaethol)	Newydd	-
14 (Cymwysterau blaenoriaethol cyfyngedig)	Newydd ond mae gan a.30(1)(f) o DA 1997 ac a.30(1A) ystyriaethau tebyg	Yn flaenorol roedd system achredu gyffredinol o dan a.30(1)(h) o DA 1997 sydd bellach wedi ei rhannu yn 4 ffordd wahanol o gymeradwyo cymhwyster, gan ddibynnu ar natur y cymhwyster
15 (Pŵer i wneud trefniadau i ddatblygu cymhwyster blaenoriaethol cyfyngedig)	Newydd	
16 (Cymeradwyo cymhwyster blaenoriaethol cyfyngedig a ddatblygir yn unol â threfniadau a.15)	Newydd	
17 (Cymeradwyo cymhwyster blaenoriaethol cyfyngedig yn absenoldeb trefniadau a.15)	Newydd	
18 (Cymeradwyo cymwysterau blaenoriaethol anghyfyngedig)	Newydd	
19 (Cymeradwyo cymwysterau nad ydynt yn gymwysterau blaenoriaethol)	Newydd	
20 (Meini prawf cymeradwyo)	a.30(1)(g) o DA 1997	
21 (Pŵer i bennu gofynion sylfaenol)	Newydd	
22 (Amodau	a.32(3A) o DA 1997	

cymeradwyo)		
23 (Cyfnod para'r gymeradwyaeth)	Newydd	-
24 (Rheolau ynghylch ceisiadau am gymeradwyaeth)	Newydd	-
25 (Ildio cymeradwyaeth)	Newydd	-
26 (Darpariaeth drosiannol mewn cysylltiad ag ildio cymeradwyaeth)	Newydd	-
27 (Tynnu cymeradwyaeth yn ôl)	Newydd	Mae a.32B(3) a (4) o DA 1997 yn debyg o ran methiant i gydymffurfio ag amodau achredu, ond y canlyniad yw tynnu cydnabyddiaeth yn ôl yn hytrach nag achrediad.
28 (Darpariaeth drosiannol mewn cysylltiad â thynnu cymeradwyaeth yn ôl)	Newydd	-
RHAN 5 – DARPARIAETH BELLACH SY'N BERTHNASOL I GYDNABOD A CHYMERADWYO		
29 (Cyfyngu ar gyllido a darparu cyrsiau penodol)	a.96-102 o DDS 2000	Yn rhannol. Yn benodol, mae diwygiadau yn eithrio o'r cyfyngiad cyllido cyffredinol 1. cyrsiau addysg neu hyfforddiant a ddarperir i bersonau ag anableddau dysgu, a 2. cyrsiau neu bersonau sydd wedi eu dynodi gan Weinidogion Cymru.
30 (Dyfarnu fersiwn Gymreig o gymhwyster yng Nghymru: cyfyngu ar gymhwyso amodau a osodir gan Ofqual)	Newydd	
31 (Dyfarnu cymhwyster y tu allan i Gymru: cyfyngu ar gymhwyso amodau a osodir gan Gymwysterau Cymru)	Newydd	
RHAN 6 – PWERAU GORFODI CYMWYSTERAU CYMRU		

32 (Pŵer i roi cyfarwyddydau)		
(1) methiant neu fethiant tebygol i gydymffurfio ag amodau cydnabod	a.32A(1) o DA 1997	Gwneir darpariaeth fanylach
(2) methiant neu fethiant tebygol i gydymffurfio ag amodau cymeradwyo	a.32A(2) o DA 1997	Gwneir darpariaeth fanylach
33 (Pŵer i osod cosbau ariannol)	a.32AA o DA 1997	Gwneir darpariaeth fanylach
34 (Cosbau ariannol: apelau)	a.32AC o DA 1997	
35 (Cosbau ariannol: llog)	a.32AD o DA 1997	Gwneir darpariaeth fanylach
36 (Adennill costau ar gyfer gosod sancsiynau)	a.32BA o DA 1997	Gwneir darpariaeth fanylach
37 (Adennill costau: apelau)	a.32BB o DA 1997	
38 (Costau: llog)	a.32BC o DA 1997	Gwneir darpariaeth fanylach
39 (Mynd i mewn i fangre a'i harolygu)	Pŵer newydd sy'n sefyll ar ei ben ei hun ond mae darpariaeth debyg yn a.32(4)(b) o DA 1997	Gwneir darpariaeth fanylach/gorchymyn llys yn ofynnol
RHAN 7 – ATODOL		
40 (Darparu gwasanaethau etc gan Gymwysterau Cymru)	Newydd	-
41 (Adolygu ac ymchwil)	a.30(1)(a) o DA 1997 (adolygu) ac a.30(1)(c) o DA 1997	-
42 (Datganiad polisi a datganiad ynghylch ymgynghori)	Newydd	
43 (Cwynion)	Newydd	
44 (Cynllun codi ffioedd)	Newydd	
45 (Grantiau)	Newydd	
46 (Darparu gwybodaeth neu gyngor)	Newydd	
47 (Cydweithio)	a.32ZA(1) o DA 1997	
48 (Dyletswydd i roi sylw i bolisi llywodraeth a materion eraill)	Newydd	
49 (Cyflawni)	Newydd	

gweithgareddau rheoleiddiol gan Gymwysterau Cymru)		
RHAN 8 – CYFFREDINOL		
50 (Rheoliadau)	Newydd	
51 (Dehongli cyfeiriadau at “cymhwyster”)	a.30(5)-(5C) o DA 1997	
52 (Dehongli cyffredinol a mynegai o ymadroddion wedi eu diffinio)	Newydd ond mae rhai diffiniadau wedi eu diffinio eisoes mewn Deddfau Addysg eraill, sef Deddf Addysg 1996.	
53 (Diwygiadau canlyniadol)	Newydd	
54 (Pŵer i wneud darpariaeth ganlyniadol a throsiannol etc)	Newydd	
55 (Dod i rym)	Newydd	
56 (Enw byr etc)	Newydd	
ATODLEN 1 – CYMWYSTERAU CYMRU		
Rhan 1 Paragraffau 1-16, 27-35 Paragraffau 17-22	a.32ZA(3)-(12) newydd o DA 1997	
Rhan 2 Paragraffau 36-40	Newydd	
ATODLEN 2 – TROSGLWYDDO EIDDO A STAFF I GYMWYSTERAU CYMRU		
Paragraffau 1-5	Newydd	
ATODLEN 3 – DARPARIAETH BELLACH YNGHYLCH CYDNABOD CYRFF DYFARNU		
Paragraffau 1(1) ac 1(2)(c)	Newydd	
Paragraff 1(2)(a)-(b)	a.32B a 32C o DA 1997	
Paragraffau 2-6	a.32(3)-(4) o DA 1997	
Paragraffau 8-16	Newydd	
Paragraff 17	a.32C o DA 1997	
Paragraff 18	Newydd	
Paragraffau 19-23	Newydd	

ATODLEN 4 – DIWYGIADAU CANLYNIADOL		
Paragraffau 1-7	Newydd	